

ХУРШИД ДҮСТМУҲАММАД

Қиссасарап

«SHARQ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ – 2011



Сырой

Сўроққа туттилмай туриб, ўзларингни ўзларинг сўроқ қилинглар.

Ҳадис

Шабнамнинг ой-куни тўлганидан уч ой ўтди ҳами-ки, ҳали кўзи ёримади. Шўрлик гумбаздек қорни кўз-кўз бўлишидан, хотин-халажнинг «Вой, келин, тая гўшти еганмисиз?» деб ҳол-жонига қўймай сўроқлайверишидан безиб остона ҳатлаб кўчага чиқмас, ёлғиз қолса бирдан дард тутиб қоладигандек вахимага тушар – қайнонасининг ёнидан нари жилмас, кейинги пайтда серқатнов бўлиб қолган онасининг кўзларидаги ваҳима шарпасини кўргани сайин ўзини баттар қаёққа қўйишни билмас, дам дўхтирга, дам синчию фолчи, табибу ҳоказога зир қатнар – ҳомиладорлик ўн икки ойга чўзилиши мумкинлигини бу яқин-орада инсон зоти эшитмаган, яккаю ёлғиз юпанчи, ишонгани – эри эса... келинг, ошиқмайлик, яххиси, воқеани бир бошдан ҳикоя қиласлийлик.

1

Бозор қорни оч – қулоги тинч кўча чангитиб юрганди ялло қилиб – уйландию, балога қолди. Ҳай, энди, уйлангани ҳам майли-я (бизнинг шароитларда йигит кишига уйланишдан бўлак юксакрок орзу-ҳавас қаерда!), тракторини тариллатиб юравермайдими, дўппини чаккасига қўндириб!.. Йўқ, у одам қуригандай Аминвой гуппининг йўриғига учди, пахта зоводига юкчи бўлиб ўтдию, «falva» отлик тубсиз жарнинг қоқ ўртасига икки оёқлаб сакради-қўйди. Ундей деса гуппида нима гуноҳ? Бозорнинг ўзи, «Уйланишга уйландим-у, бўғзимгача қарзга ботдим, ака», дея ҳасрат қилди. Гуппи аввалига лабининг бир чеккаси билан беписанд кулди – «Қарз узилади – хотин ёнга қолади, жиян», деди димогидан курт ёғиб. Мақолгами-маталгами ўҳшаб кетадиган бу ҳикмат

илгари Бозорнинг қулоғига кў-ўп хуш ёқарди, мана энди, унинг таъмини ўз оғзида татий бошлагач, хикматнинг тахири чиқиб кетди. Шу боис, «Чўтладим, aka, ҳозирги топиш-тутишим билан етти йилда қарздан узилар эканман. Шундаям емай-ичмай жамғарсам», деди зорланиб у. «Унда, – деди гуппининг ҳожатбарорлиги тутиб, – пахта зовутга ўт – икки сезонда қарздан қутуласан, қаддингни тиклаб оласан! Юкчилик ёқмаса, сўнг тағин тракторингни ҳайдайвурасан».

Бу ёғи ҳамирдан кил суғургандек енгил кўчди: Аминвой ёрдамини дариф тутмади – Бозор тракторини топшириб, заводга борди – юкчилик қила бошлади. У ўзини дунёнинг пасту баландидан анча хабардор, тенгқурлари орасида билармонлардан санаб юрарди, заводга келгач эса оламда сиру синоат ўша ердаги пахта ғарамларидек тоғ-тоғ бўлиб уюлиб ётганини кўрди – кўзи мошдек очила бошлади. Йўқдан йўндириб, бирни ўн, ўнни юзга дўндирадиган, юлдузни бенарвон урадиган ишбилармонлар гавжум шаҳарларда, ажнабий юртларда яшайди деб ўйларди Бозор, кўрсаки, таниган-билган ҳамқишлоқлари орасида ҳам пиҳи қўйруғига қайрилганлари талайгина экан. Бундайларни кўргани сайин Бозор «Тракторнинг «тар-тар»ида гунгу сўқир бўб юраверган эканмиз-да», деб таажжубнинг зўридан бош чайқар, дам-бадам «Мана энди биздан ҳам кўрасиз!» дегандек нималарнингдир режасида ўзини ўтга-чўкка урар, лекин кўп ўтмай дами чиққан тўпдек бўшашиб қолар эди...

Одамлар «Ҳарбийда ундоқ-ҳарбийда бундоқ» деб зорланишади-ю, хизматга янги келган ёш-ялангни ўзимизда ҳам етти қават кўрпачага ўтқазиб қўйишмайди, аксинча уни энг оғир юмушлар билан сийлашади. Бу урфдан Бозор ҳам бенасиб қолмади. Заводга келганида ишчиларга қўшилиб пахта ғарамларига майдон ҳозирлашда кўмаклашди, терим бошландию, кўл-кўлга тегмай қолди. Бозорни «ёш» дейишиди, «янги» дейишиди, хуллас уни тунда пахта қабул қилувчилар тўдасига қўшиб қўйишди. Бозор чидади, чидадигина эмас, хомтама хаёлларга учиб, елиб-югуриб тер тўкаверди. Хўроз учинчи ё тўртинчи қичқирганида тегирмон тортгич хачирдек

чангга беланиб, йўлни пахта даласининг ўртасидан солар – ҳолдан тойган эса-да, шаҳд-шиддати баданига тинимсиз куч-кудрат ато этаётган девдек пахтаси иккинчи ё учинчи сафар шилиб-қиртишлаб терилган ғўзаларни «шарт-шурт»латиб эгат оралаб уйига етиб келгунича тонг ёришай деб қолар эди.

Бозор башарти шу тахлит кунни тунга улаб юраверса, уйига пахтазор орқали қатнайверса, ким билсин, ишлари жўнашиб кетар, қарзлари узилар, хотини ёнга қолар, бола-чака орттирап ва яна тракторининг дийдорига тўйиб, давру даврон суриб яшаб ўтармиди дунёдан... Асло! Инсон зоти зинҳор-базинҳор беташвиш, беғалва умргузаронлик учун келмайди бу ёруғ дунёга, балки у йўқ ерлардан бошига дўлдек ёғадиган балоқазоларни излаб-истаб топади, балога гирифтор бўлади, пешонасига «шақ!» этказиб уради-да, «Хах, аттанг-а, ўшандада!..» деб ҳамма айбу қарохатни шайтонга тўнкаб, сувдан курук чикмоқ пайига тушади. Ахир Бозорқул биродаримиз ҳар кун-ҳар тунда пахтазор оралаб заводга қатнаётган бўлса оёғи узилиб тушмаётган эди – ҳа, энди ғарам тепасида белигача, баъзан кифтигача ботиб-кўмилиб пахта тепкилагач, толиқса-толиқар, яна пиёда йўл юриб оёқлари унча-бунча қақшаса-қақшаётган эди, лекин күш уйқусида ширингина ором олиб ётган Шабнамнинг пинжига кирганида – ҳали келинчаклик мушку анбарлари аримаган Шабнамгинасининг маст қилувчи бўйлари уни ўз «коми»га тортганида бутун чарчоклари аъзои баданидан мойдай эриб чиқиб кетаётган – эртасига яна кўкка сапчийдиган саман тойчоқдек ирғишлиб юрган эди. Мутлақо, ўла қолсак қаноат килмаймиз, тезроқ ва эртароқ ҳаловатга етишнинг янайм осонроқ йўлларини ғаламисларча истаб топамиз!..

Бозорвой ҳам ўзимиз янглиғ одамзоднинг ношуқр бандаси-да, заводдан чиқиб пахтазор томон юрган жойида тракторчилардан бири, «Юр, жўра, кўчанг бошига ташлаб ўтаман», деб қолди. Бозор севинди. Уйига пича эртароқ етиб олиш илинжида гижинглаб бориб тракторчининг ёнига сукулди. Кўчалари бошига келишди ҳам, Бозор трактордан сакраб тушиб тор кўчага ичкарилаб

уйининг ёнгинасига борганди ҳамки, шундокқина боши-
нинг тепасида нимадир чараклаб ёришди, азбаройи қоқ
тунда қишлоғига қуёш ағдарилиб тушаётгандек бўлди.
Бозор ҳаётда унча-бунчага қўрқадиган йигит эмасди,
шу боис қоқ тунда туйкус чараклаган бу шуълага пар-
во қилмади, бирок... қўрқмасликнинг сира иложи йўқ –
Бозор бундайин ҳолатга дуч келаётган инсон қавмининг
биринчи вакили эди. У ўтакаси ёрилиб беихтиёр қочарга
жой мўлжаллаганида боши узра ниманингdir майин
ғувури эшитилди – бирдан вужудидан қўрқув ҳисси
йўқолди – тепага қаради – рўпарасида ўзига иккита ке-
ладиган дароз, кумушдек оқ зирхли лиbosга ўранган
ғалати одамнусха махлукни қўриб тек қотди. Шу пайт
бўлса керак деразадан хотинининг ипакдек майин товуш-
да, «Бозор ака, нима у?» дегани эшитилди. Бозор қўрқув
туйғуси йўқолганини тушунолмай, «Ётавер, ҳозир кира-
ман», деб овоз берди.

- Кимсан? – сўради одамнусха махлук.
- Бозорман, – деди Бозор. – Бозорқулман.
- Кимнинг ўғлисан?
- Алимқул бобонинг... отам қайтиш қилган... – деди
Бозор қўрқмаса-да, анг-танг бўлиб.
- Касбинг? Нима иш қиласан? Қачондан буён ишлай-
сан? Оиланг борми? Боланг-чи?

Одамнусха махлуқ саволларни қалаштириб ташлади,
Бозор «барини эслаб қололмасман» деб ҳайикқан эди,
йўқ, ҳартугул, сўроқ шиддатига ҳамоҳанг жавобни уд-
далади:

- Хлопзаводда ишлайман. Юқчиман. Яқинда жой-
лашдим. Хотиним бор. Болам йўқ.

У жавобни ўринлатдим деб ўйлаганди, чамаси одам-
нусха махлуқ қониқмадими, қайта савол қотди:

- Заводга қачон жойлашдинг?

Бозор ўйга толди. Шу чоғ уйининг деразаси шарақлаб
очилиб Шабнамнинг хавотирли овози эшитилди. Бозор
«Жим тур!» – демокқа лаб жуфтлаганида тепада – шуъла
сочаётган жисмнинг гувиллаши тезлашди – рўпарасида
муаллак бўй чўзиб турган ножинс махлуқ арқон пилла-
поядан кўтарилаётib: «Биз «Холис» сайёрасиданмиз.
Саволга жавоб топиб қўйгин», деди мулойимлик билан...

Шуларниинг бари кўз очиб-юмгунчалик лаҳзада со-дир бўлди. Бозор эс-хушини йигиб, олислашиб бораётган ёруғ шуъла изидан анграйди. Қишлоқ итлари безовта ув тортди. Бозор чўчиб уйғонган одамдек ҳовлиқаётганига қарамай ғалати мажолисизланиб бир-бир босиб ҳовлига кирди – ичкаридан югуриб чиқаётган Шабнам айвон остонасида эрини ағдариб юбораёзди.

– Ким, Бозор aka? Нима деяпти?! – хавотирланиб сўради Шабнам эрига ёпишиб.

– Учадиган одамлар!.. Учадиган!.. – Ҳаяжонини бо-солмай деди Бозор.

– Қанака учадиган? Сизда нима юмуши боракан? – сўрайверди баттар таҳликага тушиб Шабнам.

– Деразани бекор очдинг-да, чўчитиб юбординг уни, – деди Бозор астойдил афсусланиб, – Ҳол-аҳвол сўради, холос... «Учар баркаш» деган гап чиқдию, ўшалар!..

2

Эрталаб ҳовлига чиқкан Шабнам кўчадаги ғала-ғовурга беихтиёр қулоқ солди.

– Ҳе-е, тунда ташқарилагандим, қарасам, манов Чу-чук момонинг уйи теппаси кундек яруг!.. Ой қулағанми дедим!..

Шабнам инқиллаб бўлса-да, илдам юриб, дарво-за ёнига борди. У йўлакда туриб қўшни Фотма бийи-нинг ваҳима кўтаришига қулоқ солмоқчи эди – дарвоза тавақасини қандай очиб қандай кўчага чиққанини бил-май қолди.

– Кўзим минан кўрдим-а!. Сўнг, ўша чироғ осмонга учди-ке-етди!.. Ўлай, агар...

Тўдалашган хотин-халаж, бола-бақра ҳайрат-тааж-жубларга тўла хитоблар билан кўчани бошига кўта-ришаётганида Фотма бийи тўсатдан тунги чироқни қай-тиб кўргандек бақириб юборди:

– Ана! Ана, айналайлар, манов келиннинг эри бор-ку, Бозорқул – ўша сўйлашди! Кўзим минан кўрдим-а! Ана, келин айтсин, келин!..

Тўдалашганлар гув этдию, шундайига ҳам ўнғайсиз-
ланаётган Шабнам кўчкининг орасида қолди.

– Тўғри, – деди Шабнам дўнгдек қорнини кафтла-
ри билан паналамоққа бехуда уриниб, – у киши, ишдан
келаётгандилар... Уйимиз ёни ёришиб кетди, кўзим
қамашиб уйғондим... Деразадан қарасам, гаплашаяпти-
лар... «Учар баркаш» эмиш...

– Во-ой!..

– Тавба-а!

– Нимани гаплашибди Бозорвой?

– Улар нима дебди?

Шабнам эрининг «ваҳима кўтариб юрма, тағин» де-
ганини эслаб гапни кисқа килди:

– Ҳол-аҳвол сўрабди, холос...

Биронкида сичқон болаласа етти иқлимга тар-
қайдиган Пахтақайнардек қишлоққа «учар баркаш»
қўнадию, ваҳима кўтармай бўладими! Келгиндилар ово-
заси бола-бақра, хотин-халажни қўяверинг, нақ тўшакка
қадалиб ётган чолу кампирларни ҳам оёққа турғазди.
Пахтақайнар шов-шув, миш-мишга кўмилди: кимсан
Бозоркул деганинига осмондан келгиндилар тушган-
миш!.. Ҳол-аҳвол сўраганмиш!.. «Ёрдам берамиз» де-
ганимиш!..

Чучук момо кун обдон ёйилганда янгиликдан дарак
топди. У алпанг-талпанг юргуғилаб ўғлининг уйига ки-
риб борди. «Хой-чи, хой, нима бўлли? Айт-чи, айт!» деб
туриб олди. Тарападек қотиб ухлаётган Бозор енгил-
елпи жавоб билан қутулмади, охири момосини жеркиб
ташлади.

– А-айт, нима худо урди сени? Бутун қишлоқ сени
гапирёбди! – деди уввос солиб Чучук момо.

– Э, осмондан тушгичларга йўлиқдим!.. Ҳеч нарса
демади... Қайтиб учиб кетди... – деди Бозор кўзини оч-
май.

– Нимага тушибди? Нега сенга йўлиқади? – дея ижи-
килади момо.

– Самолётида тушган... Тунда ёлғиз эдим... Шунга
менга йўлиқкан-да... Боринг, ухлай!..

Ухлаш қаёқда! Овоза етти иқлимга болалаб кетадиу,
Бозорбек жаноблари «қилиғиликни қилиб қўйиб» хотир-

жам ухлайверадиларми?! Биринчилар қатори маҳаллий рўзнома мухбири дарвоза қошиб келди. «Ўғлингизни уйғотинг, энажон, эртанги газитга чиқарамиз», деди у Чучук момони тезлаб. Момо ўғлининг тепасига кириб чиққунича ҳовлида ёнбошига жомадоннусха халта осган ўспирин пайдо бўлди. «Радиодан эшиттирамиз», деди у ҳам ҳовлиқиб.

Бозор ортиқ ётолмади – турди, ювинди. «Шундок, шундок» деди бор гапни бўямай-бежамай айтди. Иккала мухбир канот қошиб чиқиб кетди ҳовлидан. Савол-жавоб битгунича ҳовлига тумонат йигилганди. Бозор лоф эмас, бир ўн беш дафъя қайтарди-ёв кўрган-нетганини!.. Шабнам шўрлик этақдаги уйга қамалиб олди. Ҳовлида, дарвозахонада одам сийраклашадиганга ўҳшамади. Кўчага мошин келиб тўхтади. Раисники экан. Шофири кириб, «Юр, ука, раис сўроклаяпти», деди Бозорга. Ҳаётда раисга юзма-юз келмаган Бозорнинг капалаги учди – ичида нимадир «тирс» этиб узилгандек бўлди. Чиқди. Мoshинга минди. Хотини ҳамон ичкарида, кўчада момоси, кўни-кўшничувиллаб чапак уриб қолишиди.

Қабулхонадан ўтиб ўйма гулли эшикни очганида раис ўрнидан тура солиб Бозорга пешвоз чиқди, у билан кўш қўллаб кўришди, невараси тенги йигитни юқорига чорлаб, «Айт, болам, бир бошдан айт!» деди сабри чидамай. Бозор аввалига айб иш қилган боладек тутилиб дудукланди, сўнг, раис бованинг тагини хўл қилиб кўйган гўдақдек жавдираф ўтиришини кўриб дадиллашди. Кўрганларини бамайлихотир, оқизмай-томизмай баён этди. «Яна айт. Шошмай, бир бошдан айт», деди раис. Бозор айтди. Раис тафсилини иккинчи қайта тинглагач, «Ё, пиrim!» деб туриб кетди. Хонани гир-гир айланди. Бир кўнгли Бозорни ёнидан жилдирмай олиб ўтирмақчи эди, котиба эшиқдан бош суқиб, «Сизди Раҳматов чақирибди. Шофири келли», деди Бозорга.

Раис кузатувида ҳовлига чиққан Бозорнинг кўзи Аминвой гуппига тушди. Гуппи гўё хориждан жаҳон мусобақасининг ғолиби бўлиб қайтган шогирдини кутиб олаётгандек Бозорнинг хумдек калласини бағрига босди, обдан омонлашди, раис билан сўнгра сўрашди. Бозорни қўлтиқлаб мошинга ёнма-ён ўтирди. «Астароқ

ҳайда», деди у шофёрга катта йўлга чиқишигач. Мошин йўл ёқалаб йўргалай бошлади. Аминвой гуппининг саволи – Бозорнинг ҳикояси тугай демасди, нихоят, гуппи, «Бирпас тўхтат», деди шофёрга. Шофёр жон-жон деб тўхтатди мошинни. Бозор қайта бошдан ҳикоя қилди, шофёрнинг саволлари ҳам жавобсиз колмади. Гуппи дам ишониб-дам ишонмай Бозорнинг елкасидан қўлини узмас, гоҳ қулиб-гоҳ жиддийлашиб бош чайқар, дилидагини тилига чиқаришга муносиб сўз тополмай мошинга сиғмай ўтиради.

– Э, ўзинг покиза йигит экансан-е, Бозорвой, – деди тиржайиб гуппи. – Ўзиям, бекорга зовитга жойлаштирамадим-да, сени, акаси!.. Додинг худога етгани шу-да!.. Худонинг шахсан ўзи ҳолингдан хабар олгани одам жўнатиби-я!.. Авлиё экансан, Бозор!..

Раҳматов ташқарида экан – мошиннинг эшигини ўзи очди. Бозорни қарийб Аминвойнинг қучоғидан суғуриб олди. Калтабақай қўлларини чўзиб Бозорни бағрига босмоқчи эди, қорни халал берди – худди жонли ўйинчок топиб олгандек йигилган завод аҳли издиҳоми орасидан уни етаклаб қабулхонага бошлади.

– А, бу заводди тўхтатиб қўйдинг-ку, уккағар! – деди Раҳматов тилла тишларини чиройли йилтиратиб. – Эртадан бери ҳеч ким ишламаяпти. Бор гапми, ўзи? Қани, гулла, тезроқ!

Директорнинг қатида турган Фаол мошхўрдага қатик бўлди:

– Раҳматоб!.. Бозорбой ташқарида, жамоанинг хузурида ошкора айтгани дурустмиди...

Раҳматов Фаолга чапақай қарашиб қилдию, индамади. Унинг бўғзида қотган гапни хонада савлат тўкиб юринаётган Аминвой айтди:

– Жамоани қўйинг, Абдуфаол, – деди у беписандлик билан, сўнг овозини мулойимлаштириб Бозорга деди: – Айт, бошла, олдин ўзимиз эшитайлик!

Бозор айтди – бир бошдан, раисга айтгандек, халоийиқча айтгандек сўзма-сўз такрорлади. Раҳматов ҳам, Фаол ҳам бақа бўлиб қолди. Бозор хонадан чиқаётганида ҳамон жойидан қимирламай ўтирган Раҳматов уни тўхтатди:

– Бозорбой! – деди у мерганқараш қилиб. – Кайфинг йўқмиди, ишқилиб? Тағин шармандамиз чиқиб юрмайлик, жиян!.

– Йўғ-э! – деди Аминвой гуппи Бозор учун жавоб бериб. Сўнг масҳарадаб ҳиринглади: – Бозорвой нимасига ичади, ака.

Фаол гуппининг киноясини тушунмай-нетмай унинг гапини маъқуллади:

– Бозорвой оғзига олмайдиган кадрларимиздан, Раҳматоб...

Раҳматов гўштдор жагини, юмалоқ қорнини силкиллатиб мамнун кулди.

3

Бозорнинг ажабтовур ҳикоясини радиодан эшииттиришди, рўзномада сурати билан босиши – ҳафта-ўн кун на хушида, на уйқусида ҳаловат топди у. Бозорнинг номи пахтақайнарликлар оғзидан тушмади, ўша кунларда ўғил кўрганларнинг ярмидан ортиғи янги меҳмонга «Бозорбой» деб исм қўйди. Лекин айни терим палласи эмасми, одамлар яна пахтага чалғиди, миш-мишлар сўна бошлиди. Факат кўча-кўйда учраган таниш-билишлар Бозорвойга энди одатдагидан бўлакча қарашар, у билан фавқулодда сеҳрли одамдек муомала қилишарди. Завод ишчилари нари турсин, ҳатто Раҳматовдек зот ҳам у билан тўхтаб сўрашадиган, ўнақай келса, бирпас-яримпас сухбатга тутадиган одат чиқарди. Бошқа бирон рўшноликдан дарак йўқ. Бозор ўша-ўша – гоҳ йўловчи тракторларда, гоҳ пахтазор оралаб завод билан уйи орасида пиёда қатнайверди. Учар махлукларни унутиб яна фикри хаёли, ташвиши хотинининг қадам олишига қараб қолган кунларда...

Бу сафар у пахтазор оралаб қайтаётганди, уйига етишига ярим чакирим қолганди чоги – туйкус тепасида чакмоқ чаққандек нимадир қарсиллади. Бозор бош кўтариб қаради – ёругнинг зўридан кўзини чирт юмди. Юмдию, нега, қандай куч таъсирида чўйкалаб қолганини билолмай, гарангсиди – нуқул қўрқмаётганига таажжубланар, ҳайратининг тагига етолмасди. Шу пайт таниш овозни эшиитди:

– Қачон жойлашдинг ишга?

Бозор сомеларча чўк тушган кўйи тепага қаради, арқон пиллапояга тармасиб турган баҳайбат одамнусхани кўриб унинг турки тунов кундаги келгиндиникига ўхшамаслигини пайқади. У маҳлукни бошдан-оёқ назардан ўтказмоқчи эди, негадир ғайришуурый бир алфозда шошилиб жавоб қилди:

– Уч ойю ўн кун бўлди.

– Яъни? – сўради келгинди.

– Июннинг йигирмасида.

– Бурун қаерда ишлар эдинг?

– Тракторчи эдим.

– Нега юкчиликка ўтдинг?

– Ўзим...

Бозор шундай дедиу, тили тутилди.

– Сўзлайверсанг-чи? – деди маҳлук.

– Уйлангач... ўтдим, – деди Бозор.

– Нега Шабнамга уйландинг?

– ...

– Шу қизга уйланишдан бирор мўлжалинг бормиди?

– Й-йўқ...

– Уйланганлар пахта заводида ишлайдими? – сўрай-верди маҳлук.

– Йўқ, мен... биз...

Юқорида муаллақ турган баркаш ғувуллади, бир оёғини арқон пиллапоядан узмай савол ёғдираётган маҳлук шошилди чоғи, бидирлади:

– Турмуши оғирлашганлар ишлайди, заводда. Шундайми? Сен қийналдингми? Тракторчилик ярамай қолдими? Энди дурустми ишинг?.. Дурустми, ишқилиб?..

Бозор саволларни илғаб олгунича қишлоқ томонда шовқин-сурон кўтарилди – хотин-халаж, бола-бақра дод солди, нималардир даранглади, итлар акиллади, сўнгти дақиқада одамнусха маҳлукнинг майнин-мулойим оҳангда, «Омон бўл, Бозорбой» дегани қулогига элас-элас чалинди. Бозор – у бош кўтариб нигоҳлари билан баркашни кузата олмади – ёруғдан қамашган кўзларини бир юмиб очганида қишлоқ томондан «Бозор!.. Бозор ака!.. Бо-зор а-ка!»лаб ҳаллослаб югуриб келаётган Шабака!

намнинг овозини таниди. «Югур-ма, Шабнам!.. Кўрқма! Кўрқма!» деб бакирди жон ҳолатда Бозор қад ростлаб, у қад ростлаб улгурмай хотини етиб келдию, ўзини эрининг устига ташлаб қучоқлаганича ўпкаси тўлиб йиғлаб юборди.

Бозор дағ-дағ титраётган хотини билан етаклашиб йўл ёқасига чикқанида бир катор тизилган қўни-қўшнилар ҳамон овози борича бақириб-чакирав, қўлига тушган нарсани бир-бирига уриб шовқин кўтаришарди. Бозор билан Шабнамнинг қораси кўрингач, тарақ-туруқ тинди,чувир-чувир бошланди, хар ёқдан саволлар ёғилди. Шабнам эрини бирор тортиб оладигандек унинг билағига икки қўллаб тармашган, ҳамон қалтирав, қийналиб нафас олаётганига қарамай нуқул, «Ҳеч нарса демабди!.. Гаплашмабди!» дер, эри учун жавоб бераб уни тортиб-сургаб уйга киришга ундар эди. Ўғлининг дамо-дам тўхтаб қолаётганини кўрган Чучук момо:

— Сен не ёмонлик қибсан уларга, ули-им?.. Кир, уйга-а! — деб зор қақшади.

Уйга киришгач, Шабнам эрининг ранг-рўйини кўриб баттар кўрқиб кетди, уни саволга тутди, «Кўрқяпман, Бозор ака, улар нега сизди сўроқ қиляпти?» деб йиғлади. Бозор рангидан ранг қолмаган, қалт-қалт титраётган хотинини тинчлантирди. «Чўчиди, бирон кор-ҳол бўлмасайди!» деган хавотирда хотинининг қорнига дамбадам кўз ташлади, момоси қўллари қалтираб дераза қанотларини зичлаб ёпаётганини, ҳовли этагидаги уйига бормай айвонда чўк тушганча бир нималарни шивирлаётганини кўриб зўрма-зўраки кулди, «Кўйсанглар-чи, ҳеч ган йўқ. Тозза қизиқувчи экан учар маҳлук, нуқул ҳол-ахвол сўрайди-я!» деди ярим таажжуб, ярим ҳангома оҳангода.

Эртасига эрталаб газетчи бола келди, Бозорни йўқлади, Чучук момо уни совуқ қаршилади, «Кўй, улим, Бозор ухляяпти», деди норозиланиб. «Яна учар келгин-диларга йўлиқибди, деб эшитдим» деди у хирадлик қилиб. «Мен эшитмадим – биззи ўз ҳолимизга кўй», деди юзини терс буриб момо. Мухбир, «Келин-чи, келин – у ҳам кўрган эмиш», деб эзмалик қилаётганди, момо: «Э, кели-

ним касал, ўзи, зўрға юрибди!» деб қувиб солди. Мухбир кетди. Кейинидан раиснинг шофёри келди – момо уни изига қайтарди, аллақайтдан ўғлининг жўраси келди – унга ҳам ўзи жавоб қилиб юборди – «Ҳақ!» деб дарвоза ёнида тиззаларини қучоқлаб ўтиргди.

Тушга яқин велосипед минганди бола дарвоза ёнида айланиша бошлади, момо уни олдига солиб ҳайдамоқчи эди, бола, «Бозорбой акани Опа чақиряпти, шўрога. Тез борар экан», деб уловидан тушмай жўнаб қолди.

Бозорнинг энсаси қотса-да, иложсиз, борди. У қишлоқ шўросининг раисаси – Опанинг ёнида мелиса ўтирганини кўриб ортиқ ажабланмади ҳам. Опа билан мелиса обдан Бозорни кўкларга кўтаришди, Бозор туфайли Пахтақайнар қишлоғининг донғи дунёга таралганини оғзиларидан бол томиб изҳор қилишди. Ҳангома маромини туйкус мелиса бузди:

– Ука, дунёнинг ишларини тушуниб бўлмай қолди, – деди у қирра бурнининг учидаги терни артиб, қалам-дафтарини оларкан. – Ҳар қалай, бор гапларни хужжатлаштириб кўяйлик. Тағин бир ишкал бўб юрмасин...

Бозор ўйланиб қолди.

– Хизматчилик, ука...

Опа мелисанинг гапини маъқуллаб бош иргади. Бозор дўриллаб ёд бўлиб кетган ҳикоясини бошлади. Икки оғиз айтиб улгурмай Опа унинг гапини бўлди:

– Аввалгисини эшиитмаган одам қолмади, укажон, бу киши кечагисига қизиқяптилар.

Бозор шундагина ҳали ҳеч кимга учар баркаш қаердан келганини айтмаганини эслади.

– Ҳикоя қилиб жонимга тегдию, Опа, – деди у, – учиб келгичлар қаерлик эканини айтмабман.

– Қаерлик эди?! – Ҳайқириб юборди Опа кўзлари олайиб.

– Айтганмиди?! – сўради ҳовлиқиб мелиса.

– «Холис» сайёрасиданмиз» деганди... мутлақо ёдимдан кўтарилибди...

– «Холис» сайёрасидан?! – баравар сўради Опа билан мелиса. Сўнг Опа илова қилди: – «Холис» сайёраси қаттайкан?

Бозор бош чайқаб елкасини қисди.

Мелиса унинг айтганларини батафсил хатга битди. Шундан сўнг сухбат кечаги ташриф тафсилотига кўчди.

– Ўша маҳлукларнинг оёғи ерга тегдими? – сўради мелиса. – Бозордан «ҳа» жавобини олгач, худди кўз ўнгидаги жиноятчи қочиб кетаётгандек шошқалоқланди: – Шунисини айтмайсанми, ука! Тошини чамаладингми келгиндининг?

– Юз йигирма-юз ўттиздан ошмас! – деди Бозор.

– У ҳолда... оёғининг изини топсак бўлармикан?

– Йўқ, – деди Бозор бўшашиб, – пахтазорнинг қаеридан излаймиз, уни...

– Сиз тахминан кўрсатсангиз бас. Биз маҳсус изто-парларни чақиртирамиз. Келади, текширади. Тангадек из бўлса ҳам – топилади.

Бунга Бозорнинг ўзи ҳам қизиқди.

– Ўша жойни ўраб, текширилса-чи? – гапга араплашди Опа. – Зора топилса? Бутун дунё одамлари учун томошагоҳга айланарди-да, ўзиям!..

– Чиқмаган жондан умид, – деди мелиса жонланиб. – Бу ёғи Бозорбойда қолган...

Шу пайт телефон чўзиб-чўзиб жиринглади. Опа истамайгина дастакни қулоғига яқинлаштириди, сапчиб ўрнидан туриб кетди. Бети дам қизариб-дам оқариб кўйлак ёқаларини, соchlарини тузатган бўлди. Телефондан овоз эшитилиши билан қуюқ саломлашди.

– Ҳозир шуни гаплашаётгандик. Ҳа-ҳа, – деди у хийла жиддий тортиб. – Марказдан... Милициядан ходим... Ҳа, шу ерда... Бозорбой ҳам шу ерда...

Чамаси Опа билан гаплашаётган киши Бозорни танимади шекилли, Опа, «Анув, учар маҳлуклар билан учрашган йигитимиз-чи» деди. Сўнг Бозордан ҳозир эшитганларини чала-ярим ҳикоя қилди, пировардида, «Кеча келгинилар қўнган жойда текшириш ўтказсан... Ҳа, ха, пахтазорни ўраб оламиз-да...» Опа шундай де-дию, бирдан ранги гезариб кетди. Дами ичига тушиб, зумда бояги шашти-шиддатидан асар қолмади. Қўли бўшашиб дастакни қулоғидан узди. Эркак кишининг дарғазаб пўписаси эшитилди:

– Айни терим пайтида аҳолини чалғитасизларми?!
Пахтазорни пайҳон қилиб-а?! Йўқ ердаги чўпчакка учиб
ўтирибсиларми, кап-катта одамлар?!.

Дастак қулоғидан қисқа-қисқа садо келди. Опа на-
фаси ичига тушиб ўзини оромқурсига ташлади. Мелиса
«нима гап, ким ўзи ҳайқирган?» дегандек дам Опага,
дам Бозорга аланглади. Бозор «менга барибир» дегандек
ғўдайиб ўтираверди. Жимликни Опа бузди:

– Оқсоқолнинг ёрдамчиси... Улар учун пахта терими-
дан муҳимроқ гап-сўз йўқ...

Мелиса «Ол-а» дегандек бош чайқади. Сўнг чора
топгандек Опага қараб деди:

– Марказдан қўнғироқ қилдирсак-чи, Оқсоқол рах-
барларнинг раъйини қайтаролмас, ахир?

Опа ҳафсаласизлик билан кулди.

– Кўйинг, – деди у пича дадилланиб, худди Оқсоқол-
нинг ёнини олаётгандек. – Теримга зиён етадиган жойда
Оқсоқол ҳеч кимдан ҳайиқмайди...

4

Босим ёмғир шаррос қуйиб теримчиларни уй-уйига
қамади. Бозор уйда эканлигидан онаси ҳам, хотини ҳам
хурсанд – оқшом жамулжам ўтиришганида Шабнам бир
гапириб-ўн кулар, у туну кун, лаҳза сайин ортиб бора-
ётган ваҳимасини ҳам унутган эди. Ундан кам ташвиш-
ланмаётган Чучук момо келинининг руҳи енгиллигини
кўриб севинди, «соғ бўлмаса кулармиди», деб ичидা ху-
дога шукрлар килди.

Улар алламаҳалгача гурунглашиб ўтиришгандек
эди, кутилмаганда Чучук момо қўзғалди, «борай, ёта-
ман» деди. Ўғлининг, «Ўтиринг, она, ҳали барвақт-ку»
деганига, «Сен уйда бўлсанг хавотиримиз йўқолади бо-
лам, уйимга бориб хотиржам ётай» деб жавоб қилди.
«Ўрнингизни тўшаб берай, эна» деб ортидан эргашган
келинни изига қайтарди: «Қоронғида юрманг, дейман-ку,
болам, сиз эҳтиёtingизни қилинг, ўрнимни ўзим эплай-
ман».

Шабнам дастурхонни йигиштириб ичкарига кир-
ганида Бозор ўринга чўзилган эди. «Ҳа, куниминан

ухлаб уйкуга тўймадингизми?» – деди қув қараш қилиб хотини. «Йўқ, яна уйқу босяпти», деди Бозор кўзини юмиб. Шабнам эшикни ёпди, дераза пардаларини туширди, сўнг энгил-бош илинадиган ишкоф рўпарасида чўнқайиб узок тимирскиланди. Эри – ухлаш қаёқда! – ўзини мудраётгандек кўрсатиб ётганини сезганди... Ўз навбатида Бозор ҳам хотини атайин ўзини банд қилиб кўрсатаётганини, у шу тахлит равиш қилаётганини фаҳмлаганди...

У аста ўрнидан турди-да, оёқ учидаги юриб келиб Шабнамнинг елкасидан кучди. Шабнам шундай бўлишини кутганди, кутса-да, ҳуркак охудек чўчиб тушди. «Вой! Мени ишдан кўйманг, Бозор ака!» деди шикоятомуз зорланиб – Бозор бунинг шикоят ёхуд норозиланиш эмаслигини яхши биларди – у қаллиғининг қулоғига, «Ётақол, Шабнам» деб шивирлади. «Йўқ, мен ҳаливери ётмайман» деди Шабнам ҳам шивирлаб. «Ётмайсанми?» деб сўради ёлғон иddaо аралаш Бозор. «Ётаверинг, юмушим бошимдан ошиб ётибди», деди Шабнам ҳамон аёлларга хос ясама қувликни бўшаштирмай. Бозорнинг тоқати тоқ бўлди – «Юмушинг кўпми?.. Ётмайсанми? Ётмайсанми-а?» деб қайлиғининг бўйнига лабини босди, кўйиб юбормай унинг соchlарини хидлади. Энди, «Қўйинг, қўйворинг» деб ўтирган Шабнам ҳам чидолмади – у даст ўгирилиб ўзини эрининг қучоғига... Шабнам ўзини эрининг қучоғига ташламаганига, улар бир-бирларига бундайин навозишлар қилишмаганига ҳам йиллар бўлгандек эди. Бундай суурурли-тотли дамларда Бозор билан Шабнамдан баҳтиёрроқ одамлар бўлмас эди дунёда... Ташқари зулмат оғушида, ичкарида – нимқоронги хонада табиатнинг бир жуфт эрка фарзанди маъсум ва масрур туйгулар гирдобига ғарқ бўлгандан бўлар... Шабнам қачон, қай алфозда ўрнига ётиб қолганини сезмасди – кўзлари юмуқ, ихтиёrsиз, «қўйиб юборинг...» дерди, ҳозир ташқарида шивалаётган ёмғирдан-да майинроқ шивирлаб... Кўзлари сархуш юмилган Бозор томонидан ғайришуурый бир мақомда «қўйиб юбормайман» деган жавоб бўларди... Аслида дўрилдоқ овози шундай дамларда жуда майин-мулойим

эшитиларди Бозор акасининг. Бул жуфт вужуд ҳаводанда енгил, шамолдан-да озодроқ ҳис қиласида ўзини... Энди ундаи эркалашлар-эркаланишлар йўқ, тўғрироғи, улар ўрнини гоҳ пинҳона, гоҳ ошкора «оҳ-у-уф»лар, ташвишли боқишилар эгаллаганди.

– Ухлаяпсизми? – сўради Шабнам эрининг тепасига келиб.

«Ухлаш қаёқда! Ухлаш қаёқда! Ухлаш!..» Бозор зўр бериб ўзини босди, хотинига оғир гапириб юбормаслик учун вазминликни йўқотмай кўзини очди.

– Ётақол, Шабнам... Дамингни ол, – деди меҳрибонлик билан. – Ётгин, мен чироқни ўчираман...

Бозор чироқни ўчириб келиб жойига ётди. Хотининг кафтини сўлоқмондек кафтлари орасига олиб силади, бармоқларини қисиб унга далда берди. Шабнам чукур хўрсинди. Бозор унинг юз-кўзини, бўйини силади, хотинининг юзи шишгани пайпаслаганда ҳам билинаётганидан кўнглига ваҳм тушди – Шабнамнинг пишиллаб нафас олишига қулоқ солиб, унга сездирмай хўрсинди.

– Ҳаммаси яхши бўлади, Шабнам... – деди.

Хотини индамади, эри ёнида эканидан хотиржамлик боис дарҳол кўзи илинган эди. Бозор уйқу элитган Шабнамнинг қорнини силаб-сийпалаб худога зорланди: «Ўзинг мадад бергин. Хотинимга раҳминг келсин. Ўзинг...» Шу пайт... хотиржамлаша бошлаган кўнглининг аллақаерларига тўсатдан мубҳам бир ҳавотир кўлагаси қуюқ соя ташлаб ўтди – Бозорнинг жисмижони қулоққа айланди. Унинг қулоғига ёмғир шивири орасидан элас-элас бегона гувур садоси чалинди. Бозор чўчиб тушди. У ғайришуурый таҳликада хотинининг юз-кўзи аралаш кўрпа тортди. Сўнг нафас олмай, «чурк» этмай ётавермокчи эди, ётаверса – ташқаридаги гувиллаш узоқлашадигандек эди назарида – қимир этмади, дам «менга шундай туюлдимикан?» деган ўйда янайм қулоғини динг қилди. Шунда дераза ойнаси чирсиллаб қандайдир босим зўридан синиб кетаёзди. Бозор сапчиб турмокчи эди, ташқаридан келган овозни эшитиб бетини ёстиққа босди.

— Турмуши оғирлашганлар ишлайди завода, шундай-ми? Сен қийналдингми? Тракторчилик ярамай қолдими? Энди дурустми, ишинг?.. Дурустми, ишқилиб?..

Бозорнинг назарида оёқ-кўли музлаб қолгану факат мияси ундан холи – бегона куч таъсирида жимиirlаб ишләётгандек эди. У тақдирга тан бергандек ошиқмай ўрнидан турди, ғимирлаб-пайпасланиб кийинди, Шабнамнинг эркаланиб, «Ки-им, Бозор ака?..» деганига тил учиди, «Завуддан келишибди, мен ҳозир қайтаман», дедиу, илдам ташқарилади.

Агар ҳовли, кўча кундек ёришиб турганида бунчалик ажабланмас эди Бозор. Аксинча – чор-атроф сим-сим зими斯顿 эканини кўриб ҳайрон қолди. Шунга қарамай, дарвозани кия очиб кўчага чиқди. Чиқдию, илк учрашувда тўқнаш келган дароз келгиндининг кумушдек оқ шарпасига кўзи тушди, ундан икки-уч одим нарида хийла пастроқ, хипча бел, хушқомат яна бир одамсимон махлук турарди.

— Жавоб беравер, – деди «таниш» келгинди Бозор кўринган заҳоти.

Бозор теварак-атрофга, юкорига аланглади, учар баркашнинг қораси кўринмаганига тушунолмади, иккала келгиндини саросар кўздан ўтказа туриб, боягина тўшакда ётган ҷоғидагидек вужудига титроқ югурди, бироқ у титрай бошлаганини англаб улгурмай қалтироғи босилиб, беихтиёр жавоб беришга киришди:

— Ҳа, турмушим оғирлашганди... Тракторчилик сабилнинг тушуми оз... Завуддан хам ҳали-вери барака бўладиганмас...

— Заводга кимнинг кўмаги билан жойлашдинг?

— Аминвой акамнинг...

— У – ким орқали?

— Бўласи завудда ҳисобчи...

— Қачон барака бўлади, Бозорқул? – сўроққа қўшилди хушқомат махлук.

Бозор унинг кўзи ўрнидаги мунчоқдек тешикчаларга, сўнг ярқираб кўринаётган тангадек кулокларига разм солди. «Аёл киши», деган ўй кечди хаёлидан.

Сўнг:

— Билмадим, дарак йўқ, – деди у умидсизланиб.

Анчагина тепадан – қоронғилик қаъридан таниш ғувиллаш эшитилди. Келгиндилаар жўнаб қолишини билган Бозор шошилинчда уларга савол қотди. Аёл махлук узун, хушбичим оёқларини пиллапояга бир-бир қўйиб юқорилагунича унинг дароз шериги гўё Бозорнинг саволини эшиитмагандек, шунчаки гапираётган оҳангда фўлдиради:

– Бизлар – «Холис» сайёрасиданмиз!.. «Холис» сайёрасиданмиз!.. Мақсадимиз – сизларга ёрдам... Мақсадимиз – ёрдам... Мақсадимиз...

Зум ўтмай келгиндилаар ташрифидан дарак берувчи аломатлардан асар ҳам қолмади – на шарпа, на самовий товушлар... Бозор мажхул бир кайфиятда юриб бўғот панасига ўтди – у шу чоққача ёмғир остида бош яланг, юпун турганига, хийла ивиганига қарамай на ёмғирни, на-да этни жунжиктирадиган совуқни сезганига ҳайрон бўлди. «Холис» сайёраси қаерда экан?» деб хаёлланди, ўйлаб ўйига етолмади. Шунда бирдан ташриф буюрувчилар бу сафар дабдабаю-асасасиз – чирогини ёқмай келганини эслаб севинди. Бозор эл-юрг орасида гапсўзлар кўпайишидан юраги безиллаб қолганди...

5

«Қачон барака бўлади?» деб сўради-я!.. Ачиниб, худди ҳамдардлик изҳор қилаётгандек сўради... Ердами, «Холис» сайёрасидами, қаерлик эканидан катъи назар, аёл аёл-да!.. Кўнгли бўш бўлади... Саволни эшитиб Бозор ялтоқланди, ўзининг бечораҳоллигини намойиш қилмоқчилик умидсизланиб, мискин бир оҳангда жавоб қайтарди. Не муддаода «Билмадим, дарак йўқ» деди? Ёки шундай деса ўша махлуклар «Ол, Бозорбой, бундай одамга ўхшаб яшагин» деб ярим қоп тилла-пилла ташлаб кетади деб ўйладими? Ундей деса «Мақсадимиз – сизларга ёрдам», деб қуруқ такрорлагани-такрорлаган, нақдидан эса дарак йўқ.

Бозор неча кунгача шу хаёлда юрди. Баъзан хаёл олиб қочганда кўнглига қил сиғмас, ёлғиз қолгиси, башарти учар мавжудотлар яна келгудай бўлса, улардан талай нарсаларни сўраб олишни кўнглига тугар, бу ёқда

бирортаси билан ўйларини дардлашишга иккиланар, шунда у жилла курса Аминвой акага бориб маслаҳат со-лишни кўнглига тугди, тугдию, ниятидан қайтди, ўтган сафарги ташрифлар овозаси энди-энди сусайган – ке-йинги ташрифни ҳеч ким сезмагани ғалати бўлди-да! – шу боис Бозорбойнинг ўзи гап болалаб кетишидан эҳтиётланиб юрарди. Фақат у бир-икки одамдан гурунг асносида «Холис» сайёрасини суриштирди. Ҳеч ким уни билмади – елка қисиб қўя қолишиди.

...Оқшом завод дарвозаси ёнида бош ҳисобчи Давлатовга дуч келганида хаёлида шундай ўйлар бормиди-йўқми – эслолмади. Давлатов унча-бунча одам билан саломлашмас, ҳатто бутун қишлоқда шунча шов-шув қаҳрамони бўлган Бозорнинг саломига ҳам оғрингандай бош иргаб ўтиб кетарди. Бозор дуч келганда Давлатовнинг салобати босаётганини сезса-да, ўзини атанин дадил тутишга уринар, ҳатто эпини қилса унга беписанд – тил учида салом беришга уринарди.

Бу сафар Бозорнинг товуши чиқмади, бош иргади, холос. Гўё Бозор – заводнинг бош ҳисобчисиу, Давлатов – оддий қора ишчи!.. Бироқ кутилмаганда Давлатов мутлақо ўзга мақомда алик олди. У юм-юмалоқ, семиз афтини ёнбошга қийшайтириб Бозорга ғилай қарашиб қилди, ҳатто Бозор томон бир-икки қадам юрди ҳам. Бозор шундагина хушини йиғди, кимга (Аминвой гуппининг бўласи-я!) беписанд-безътибор қараётганини, кимсан Давлатовдек зоти олийга бетакаллуфлик қилаётганини пайқаб қолди ва илдам қадам ташлаб унга пешвоз чиқди. Кўришиш учун қўл чўзиш-чўзмаслигини билолмай талмовсиради. Шунда Давлатов калта, йўғон кўлинин чўзиб унинг билагидан тутиб четга тортди. Бозор «Бош ҳисобчининг менда қандай гапи бўлиши мумкин?» – деб ўйлай бошламасидан Давлатов тўсатдан сўради:

– Уккағар, анавилар келяптими?

У шундай деб юзига қўшилиб кетган даҳани билан киши билмас осмонга ишора қилди. Бозор дабдурустдан муддаони тушунмади. Бош ҳисобчига саволомуз чимирилди.

– Келгиндилалингни сўраяпман? – деди Давлатов пишиллаб, зарда аралаш.

Бозор «келгиндилалингни» деган сўзни эшитиб кулиб юборди – Давлатов кулмади. У худди бесўнақай қорни билан деворга қапиштириб қўймоқчидек Бозорга якин келди, бироқ қорни Бозорга тегиб қолганидан унинг кулоғига энгаша олмади.

– Қизиталоқлар қанақа гаплашади? Одамга ўхшаганми, ўзи, уларинг?

Бозор кулимсиради – Давлатов кулимсирамади. Аксинча, у шу чокқача қўл бериб кўришишни ўзига эп кўрмаган боланинг кулиб-кулиб тушунтиришларини жон қулоғи билан тинглади. Бозор гапира туриб, «Учар одамлар жуда мулойим, нуқул ҳол-аҳвол сўрайди», деб иккича тақрорлагани сайин, айниқса эмин-эркин, гўё латифа айтаётгандай гапиргани сайин Давлатов эркинроқ нафас ола бошлиди, бетига қон югуриб Бозорбойнинг билагини қўйиб юборди – ўзининг кимлигини тўсатдан эслаб колгандек жиддий тортди, «Ҳай, шайтон!» деб Бозорга ишшайди-да: «Майли, боравур, бор», деб кўчага чиқиб кетди. Бироқ ҳамма унутаётган ҳодисага Давлатов не боисдан кизиқиб қолганини, ҳатто Бозорбойни маҳсус тўхтатиб сўрокқа тутганини, Бозорнинг гапини тинглай туриб неча турфа товланганини, хусусан, хайрлашаётуб аянчдан ишшайганини – ҳа-ҳа, «Ҳай, шайтон!» деган ҳазиломуз сўз оғзидан қандайдир бир азоб-уқубат билан чиқди, ўша уқубат таъсирида Давлатов илжаймади, тиржаймади, балки ишшайди – аянчли ишшайди ва ноиложликдан, бола олдида ночор кўринишни ўзига эп билмаганидангина, «Майли, боравур, бор» дея олди. Ахир Бозор атайин ўйлаб, муҳокама қилиб шундай хulosага келгани йўқ, балки ҳў-ӯ шом қоронғисида, ғарам тепасида пахта зичлаётуб кимдир орқадан – овлоқ томондан «Бозор!.. Бозорқул!» деб овоз берганида – овоз эштилган замони беихтиёр фаҳмлаб етди! Фаҳмлаб улгурмай яна беихтиёр оғзидан «Давлатовми?!» деган хитоб отилиб чиқди, чиқдию, бояги сухбат асносида бош ҳисобчининг башараси бир неча бор докадек оқариб кетгани кўз ўнгидаги суратланди.

Бозор ғарам ёқасига яқинлашиб энкайди, «Шу пайтда Давлатов завудга келармиди, келса орқадан чақиравмиди!» деган ўйда бўйини чўзиб, «Ким?» деб қичкирди. Ҳарчанд уринмасин қоронғида ғарам пойида биқиниб-пусиб турган кўлагани таниёлмади.

– Туш, Бозор!.. Туш! – деди овоз эгаси.

«Давлатов!» деб юборди Бозор ва бирдан шошиб қолди – қўлидаги паншахасини улоқтирганича юқорига пахта чиқараётган лентали кўтарма краннинг тумшуғига тармашиб пастлади. Лапанглаганча югуриб орқага ўтди. Кўлагага яқинлашаётib Давлатовнинг товуши қалтираб-хавотирли эшитилганига эътибор қилди.

– Ҳа, ака? – деди у гўё кўлаганинг ҳаёти хавф остида қолгану, уни халос этмоқ қасдида важоҳат билан югуриб бориб.

Давлатов «ҳеч ким кўрмаяптимикан», деган ҳадикда ён-атрофга алланглаб олди-да, Бозорга қаттиқ тикилди.

– «Учар баркаш» деганинг бор гапми ёки майнавозчиликми?! – сўради у дўқ уриб.

Бозор бош ҳисобчининг бемаврид пўписасини тушунолмай елка қисди. Сўнг Давлатов бошини елкасига қийшайтириб кўзини лўқ қилиб дўлайишини кўриб жавоб берди:

– Бор гап, ака... Нимайди, тинчликми?!

– Дўриллама!..

– Дўриллаётганим йўқ – овозим шундай.

– Нияти нима уларнинг? Ер юзида Пахтақайнардан бўлак жой қуриб кетганми, шетга тушмаса?!

– Билмасам, – деди Бозор зўрма-зўраки кулимсираб.

– Менга қара! – деди Давлатов Бозорни еб юборгудай ўқрайиб. Бозор ҳисобчининг зимистонда чақнаб турган кўзидан, дам-бадам чўғдек йилтираётган тилла тишидан нигоҳини узиб ерга қаради. Давлатов дўқ ураётган эса-да, унинг вужуди қандайдир хавотирдан тўкилай-тўкилай деяётганини пайқади. Хавотирли қалтироқ бош ҳисобчининг овозига ҳам кўчди: – Чиндан билмайсанми?

– Чиндан, – деди Бозор Давлатовнинг афтига тик қараб.

- Чинингми?!
 - Чиним...
 - Шунча ҳангамалашиб, сўрамадингми, уккағардан?!
- Бозор атрофни гулдиратиб қах-қах отиб кулиб юбо-ришдан ўзини базўр тийди. «Давлатов мастмикан?» деган шубҳага бордию, иччиликнинг бадбўй иси келмаёт-ганини сезиб ҳайрат-таажжуб аралаш ўзини босди. Ва бош ҳисобчининг иддао оҳангига тамомила зид мақомда гапирди:
- Қандай ҳангамани айтяпсиз, ака? Улар нукул сўрайди... Сўрагани-сўраган...
- Давлатов жим туриб қолганини кўрган Бозор ўнғай-сизликдан кутулиш учунгина илова қилди:
- Боя ҳам айтдим-ку, шуни...
- Бозор гапини тугатиб улгурмай Давлатовнинг айик-дай гавдаси тулкиникидай бўлиб қолди. Ичидан ҳаво чиқиб кетган пуфакдек бўшашиб ҳам ҳадик, ҳам пўписа аралаш пишиллади:
- Гап – орамизда, бола!.. Учинчи бир итнинг қулоғига етгудай бўлса мана шу ғарамга тириклайнин бостириб юбораман. Тушундингми?!
- Бозор орқага тисланди. У Давлатовни бу қадар увол ва бечора ахволда кўришни хаёлига келтирмаган, хусу-сан шундай абгор ҳолатда уни бир туртиб ағдаришга кўзи етса-да, бош ҳисобчининг хуши ўзида эмаслигига ишонч ҳосил қилиб, эҳтиётини кўрди. Давлатов унинг енгига тармашди ва ўзига томон тортди. Ва фавқулодда товуши мулојимлашди:
- Кеча тунда ташқарилагандим. Ҳовли бурчагига борсам иккита одамбашара махлук! Теракдай-теракдай!.. Афт-башараси кўринмади!.. – Давлатов шундай деб туриб худди ҳаво етишмагандай оғзини катта-катта очиб нафас олди, сўнг ўзига анграйиб турган Бозорга жавдираф тикилганча гапида давом этди: – Эсим оғиб қолай деди, Бозор!.. Ғўлдираб, овозим чиқмаса де!.. Ке-йин, бирдан худо мадад бердими, тўсатдан ботирлан-дим, чўчимай-нетмай тиккасига боравурдим. Бирори гапга тутди!..
 - Йўғ-э! – деб юборди Бозор баралла.

– Ўл, йўғ-э! – сўкинди Давлатов оғзидан тупук сачратиб. – Оёгинг ёқмади, бола! Бу келгиндиларинг бирғалвани бошламасайди, деб қўрқаман.

– Нима, бирон зиён етказдими?! – норозиланиб сўради Бозор.

– Йўқ. Зиён етказмади.

– Хавотирланманг, ака. Учиб келгичлар мутлақо беziён. Важажанинг маъruzасини эшитганман. Улар ерга фақат яхши ниятда келади.

– Важажанг ким?

– Билмайман... бу ерлик эмас, аллақатлик олим...

– Сендан ҳам заводни сўраганмиди?

– Бола-чақани, оиласми ҳам суриштирган.

– Мендан ҳам... нуқул заводдан айлантиравурди...

– Сиз минан мендан завудни сўрайди-да!.. Кўйчи-вондан – сурувни, боғбондан – мева-чевани суриштиради. Сўрагани – сўраган!..

– Падарига кусур-э!.. Кулоғингда бўлсин, ука, гап – ўртамиизда! Бирон ишқал чиқса – тайсалламай етказ менга. Уқдингми?!

Бозор саросимага тушган бош ҳисобчини тинчлантиришга уринди.

– Хотиржам бўлинг, ака, келса икки-уч келади, кейин йўқолиб кетади.

Давлатов нечоғли тинчланди – Бозорга қоронги эди, у зулмат қаърида лапанглаб ғойиб бўлаётган бош ҳисобчининг орқасидан разм солиб турди-да, негадир кўнгли номаълум бир хавотирни туйиб, қаттиқ энтиклиди...

6

Бозорнинг эти жунжиқди. Бу овлоқ ва пастқам жойда кўпдан буён ёлғиз тургану, шуни туйқус сезиб қолган одамдек ўзи сезмаган, ақл-идрокидан йироқ бир ҳадикнингми, ҳадик шарпасинингми таъсирида ён-верига аланглади – худди ўзини таъқиб этувчилар назаридан холи қолмоқчидек бошини елкалари орасига тортиб энкайганича келган изига югурди – то уч қаватли уйдек баландликдаги пахта ғарамининг тепасига чиқиб

олгунича юраги така-пука бўлди – хаёли минг ёққа қочди. У Давлатов ҳакида, унинг айтганлари ҳакида ўйламасликка уринди, ишга чалғимоқчи – жаҳд билан пахтани ғарамга босишга киришмоқчи эди – паншахасини қолдирган жойни чамалаб аланглаётган пайт пахта узатаётган лентали краннинг нимасидир қарсиллаб синди, узатгич-лента «варр-варр»лаб юқорига лахта-лахта пахта сочди-да, айланышдан тўхтади. Бозор ёйиб, зичлаб улгурмаган пахта уюлиб кетгани боис кран тўхтаганига севинди ва ғарам ёқасига бориб, «Нарзиқул амак!» деб шеригини чакирди. Қоронғида Нарзиқул амакининг «Хозир!» дегани эшитилди. Бозор дадилланиш ниятида шекилли, паншахани каптарвознинг матрапидек боши узра айлантириди, икки-уч кур айлантиргач, паншахани пахта уюмига санчди, санчдию, иш билан ўзини чалғита олмаётганига кўзи етгандек оғзига келган кўшикни чалакам-чатти хиргойи қила бошлади. Бошладию... икки терак бўйи тепаликда таниш гувурни эшитди. Бозор шу заҳоти, заррача ўйламай-нетмай оёғини жуфтлаб туриб тепкиланмаган пахта уюмига сакради – бўйчан ва залворли гавдаси ботиб белигача, сўнг ҳикилдоғигача пахтага фарқ бўлди. Димиқиб қолмай деган хавотирда қўл-оёқларини ёйди, бетига сиқимлаб пахта ташлаб ўзини кўмди. Паналаниб улгурганимиди-йўқмиди – шундоқ манглайнинг рўпарасида тумшуғи қайрилма пўлат пойабзал кийган оёқни кўрди. Бозор дамини чиқармади. «Миямни мажаклаб ташламаса бўлгани!» деб кўнглидан кечирди. Шу алфозда пўлат оёқ пахтага – тагин тепиб-зичланмаган пахта уюмига ботиб кетмаётганига ажабланди. Бир замон қўлтиғида нимадир ғимирлади, Бозор эс-хушини йиғиб улгурмай – ўша ғимирлаган нарса уни даст кўтарди – Бозор бесўнақай гавдасининг оғирлигини хис қилмай қолди – фазогирлардай учи-иб ғарам юзасида пайдо бўлди.

– Бунча қаттиқ ишламасанг? – сўради темир ниқобли маҳлук.

– Ишш... мен... – дудуқланди Бозор.

– Димиқиб қолмайсанми, бу аҳволда? – яна сўради келгинди.

Бозор дағ-дағ қалтираётганидан тили калимага келмади. Одамнусха мавжудот буни тўсатдан пайқаб, тепаға – коронғилик томон қараб кулди – кулгиси аллақандай ёқимли мусиқадай эшитилди. Шарпаси элас-элас сезилаётган учар баркаш томонда бир гала күш учиб ўтгандек бўлди – Бозорнинг қалтираши таққа тўхтади, бирдан хотиржам тортиб қўркув ҳиссини унутди, учар маҳлук қолиб унинг ўзи савол ёғдира кетди:

– Бошқаларнига ҳам тушяпсизларми? Қачонгача тушасизлар? Давлатовни хавотирга қўйибсизлар-да? Сизларни асли нималар қизиктиради, ўзи?

Бозорнинг шу топда оғзига кучи етмай ёғдираётган саволлари келгинди жондорлар учун жавоб ўрида ўтаётганига унинг фаҳми етмаётган эди. Агар улар индамаса Бозор яна қанча қовун туширади – ноаён, ҳар қалай у хушкомат келгиндининг мурожаатини дарҳол фаҳмламади:

– Бозорқул Алимқул ўғли! – деб иккинчи бор такрорлади хушкомат келгинди.

Бозор жим бўлди. Қатор-қатор саволларига келгиндилар пинак бузмай тошдек қотиб туриши, бу етмагандай яна гап очаётгани унинг ғашини келтирди, бирок у алжирашдан тўхтаган эди.

– Эслаб кўр-чи, тракторчилик қилаётганингда Оқсоқолнинг топширигини бажарганимисан?

Бозор хушкомат келгиндининг оғзидан Оқсоқолнинг номини эшитиб лол бўлиб қолди. У хипча белли маҳлукнинг ҳиссиз, мазмунсиз мунчоқ кўзларига тик қарашга уринди – улдалай олмади. Дароз маҳлук савонни такрорлади:

– Оқсоқолнинг топширигини бажарганимисан?

Бозор гапини йўқотиб қўйди, сўнг дадиллашди ва:

– Йўқ, – деди қисқа қилиб.

– Яхшилаб ўйлаб кўряпсанми? – деди хипча белли келгинди унга ҳамдардлик билдираётгандек майнин овозда.

Бозор шу пайтгача Оқсоқолнинг юз-кўзини кўрмаган эди, у билан гаплашиш эмас, э-э, Бозорбойдек бўз йигитлар учун Оқсоқолдан лоақал бирон юмуш юзаси-

дан топшириқ олишнинг ўзи арши аълодаги саодат-ку, ахир!... Шундай экан, Бозор нега ўйланади, нимасини хаёл қиласди, «Йўқ» деб кутулмайдими... у эса худди «Оқсоқолдан топшириқ олган бўлишим ҳам мумкин, қани, хотирлаб кўрайчи» деган қабилда ўйга толди. Шу чоғ ғарам қирғогига қўйилган нарвон тепасида Нарзиқул кўринди. У ғарам устига чиқиб икки қадам босдию, эс-хонаси чиқиб кетди!

– Дод! Вой, дод! – деганча чаппарости ағдарилиб ғарам ёқасига бориб қолди. «Ҳозир ийқилиб, ўлади!» – деган ўй Бозорнинг хаёлини чақмоқдек тилиб ўтди. Ўтдию, хушқомат махлуқ шошилмай-нетмай қўл чўзиб амакини осонгина тутиб қолди. «Бир ўлимдан сақлади!» деб кўнглидан ўтказди Бозор. Дароз бўйли махлуқ тепага қараб кулимсиради – шунда Бозор унинг қарийб елкаси-кифти кенглигидаги йўғон бўйни мойсираган ошиқ-мошиқдай сезилар-сезилмас ғичирлаганини аниқ эшитди, қоронғилик қаъридан қушлар галаси учуб ўтгандек бўлди – Нарзиқул тинчланди. Унинг ҳарс-ҳарс нафас олиши эшитиларди, холос.

– Бозор... Бозор... – деди у димиқиб ўлаётган одамдек алаҳсираб.

Лекин Бозор алай-балай деб улгурмай Нарзиқулнинг ўзи сўроққа тутилди.

- Сен кимсан? – сўради дароз келгинди.
- Мен... Нарзиқул...
- Кимнинг ўтлисан?
- Отам... Қодирқул... ёши саксонда... пронтовой...
- Оиланг?
- Бор...
- Болаларинг?
- Бор...
- Нечта?
- Ўн икки...
- Маошинг?
- Икки юз... га учма-уч...
- Ўн беш оғизни шу ҳисобдан боқасанми?
- Яқинда қиз чиқардим! – деб юборди Нарзиқул.
- Тўйни қайси сармоядан килдинг? – сўради дароз махлуқ.

Бозор сўроқ бу қадар чўзилганига ажабланди, «Тўйни айтишга бало борми?» деб ичида жеркинди.

– Бу кишининг жавобини тафтиш қиляпсизми? – меҳрибонлик билан сўради нозик қоматли маҳлук.

Бозорнинг дами ичига, ўзи пахтанинг орасига тушиб кетди. Бу орада Нарзиқул амаки яна қовун туширди:

– Невара тўйиними? – деб, келгиндилар сўрамаган нарсани гуллади.

Бозор бетини пахтага босиб «Алжимай ўл!» деб ичида сўкинди, бошини кўтариб хипча бел маҳлуқнинг тепага қараб кулимсираганини кўрди – у гап нимада эканлигини англаб етмай юқоридан мусиқа оҳангига қўйилди ва Бозор қалт-қалт титрай бошлади – нафаси бўғзига тиқилиб, тушида аждаҳога рўпара келган гўдакдек босинқираб қўл-оёғини кўтариб ташлади. Шайтонлаб қолди. Тутқаноқ тутгандек типирчилаб, кўзи олайиб оғзи кўпирди. Хушқомат маҳлук уни бир зум кузатиб турдида, бетини осмонга қаратиб боягиндай кулимсиради – Бозор шу заҳоти тинчланди. Тутқаноғи тинган бемордек мадорсизланиб юзтубан чўзилди.

– Сармояни қайдан олгансиз?

Нарзиқул Бозорнинг талвасасини бепарво кузатганича савонни тушунмай, анграйди.

– Нарзиқул Қодирқул ўғли! – чақирди дароз маҳлук.

Нарзиқул шамдек қотиб тураверди.

– Нарзиқул Қодирқул ўғли! – яна чақирди маҳлук.

Бу сафарги чақириқдан сўнггина Нарзиқул амаки бирдан жон кирган тентакдек оғзига келганини алжишга тушди:

– Ўлимдан хабарим бор, бундам хабарим йўқ!.. Йўқ!.. Худо урсин, сармоя нимайканини билмайман!.. Жўжабирдай жонман! Жўжабирдай!.. Менга раҳмингиз келсин!.. Яқинда ўғлимни уйлайман... Раҳмингиз кел...

– Яхшилаб ўйлабоқ?.. Яхшилаб ўйлабоқ?.. Яхшилаб...

Бозор жанг майдонида жон берган ясовулдек қимир этмай ётаверди. Нарзиқул амаки хўнграб юборди. Эмаклаб келиб узвос тортганча ўзини Бозорнинг устига ташлади. Шу пайт нарвондан ҳовлиқиб кўтарилган кўлага заводни бошига кўтариб дод солди:

– Мана!.. Ана!.. Ўлдириб кетибди!.. Ўлдирибди!..

Нарзиқул сапчиб бош кўтарди, чўк тушган кўйи тиззасига муштлади:

– Менимас, Бозорни ўлдирди!.. Бозорнинг жонини обкетди-и!..

Нарвондан кетма-кет икки-уч киши кўтарилди.

– Самолётини кўрдим! Ўз қўзимминан кўрдим!.. Ҳов, тепада қотиб турди!.. Думалоқ!.. Чироғи юлдузга ўхшаш!.. Ўллай агар, кўрдим!..

Ҳамон ҳолдан тойиб дод-войга бепарво қулоқ солиб ётган Бозорга жон кирди. У ярим қадам наригача эмаклади, сўнг карахтланиб базўр қад ростладию, чайқалиб кетди. Нарзиқул амаки дўриллаб хўнграб юборди. Унинг дўриллашини туйкус гувиллаб ҳаракатга тушган краннинг шовқини босиб кетди...

7

Пахта заводи бўри оралаган кўтонга айланди. Ит – эгасини, мушук – бекасини танимай қолди. «Милиция», «Тез ёрдам» мошинлари изма-из етиб келди. Раҳматов, унинг муовини, Фаол ҳам пайдо бўлишди – улар ҳарчанд дўй-пўписа қилмасин, одамларга кор қилмади – завод ишдан тўхтади.

«Тез ёрдам» касалхонага етиб бора-боргунича Бозор Нарзиқул амакининг довдир-совдир алаҳлашига дам кулиб, дам жиддий тортиб қараб келди. Амаки нуқул «Тавба қиллим... тавба қиллим» дер, на Бозорни, на ҳамшира жувонни танимай бошини кафтлари орасига олиб қисар, қўз очиб атрофга қарашга юраги бетламас, дам-бадам сапчиб туриб худди ғарқ бўлаётган одамдек Бозорнинг қўлларига, тиззаларига тармашарди.

Уларни шинамгина, кимсасиз тўрт ўринли палата-га ётқизишли. Тўғрироғи, Бозор ўз оёғи билан юриб кирди, у не боисдан «Тез ёрдам»га минганини, не боисдан палатага кириб каравотга чўзилганини мулоҳаза қилиб кўрмади. У мулоҳаза қиладиган аҳволда эмасди. Нарзиқул амакини эса замбилда кўтариб обкелишиди, каравотга ётқизишли, оқ ҳалатлилар югар-югорга тушди...

Шундагина Бозор не кўз билан кўрсингни, палата эшиги ёнида ёшгина мелиса йигит курси қўйиб ўтирибди!..

– Ха, жўра, – деди Бозор ярим таажжуб, ярим хавотир аралаш, – тинчликми?

Мелиса йигит пинагини бузмади. У Бозорга синчков кўз югуртирди-да, унинг афтида касаллик аломатини то-полмай дадилланди шекилли:

– Сизлар тинч ётсангизлар, ўшанда тинчлик бўла-ди, – деди жиддий бир киёфада.

– Мен касал эмасман... бу ерда қололмайман ҳам.

Можарони эшитган кўзойнакли шифокор Бозорга ёнбош келди-да, овозини пасайтириб уни юпандирди:

– Тинчланинг, ука. Асабларингиз чарчаган. Ҳали ёш экансиз...

Бозор бу гапларга эътибор бермади.

– Ахир мен... – деб эътиroz билдира бошладию, хотинини эслади – юраги орқага тортиб кетди. – Ахир хотинимнинг ой-куни яқин, бир нарса бўб қолса...

Кўзойнакли шифокор унинг эътиrozига қулоқ солма-ди, у «жим» ишорасида кўрсаткич бармоғини лабларига кўндаланг кўйди-да:

– Лоақал ҳамроҳингиз учун ёта турасиз... Кўряпсизу, алаҳлаганда ҳам фақат сизни йўклияти, – деди шипшиб. Пировардида Бозорни тинчлантириди: – Хотинингиз ой-куни яқин бўлса, унинг ташвишини биз қиласиз – сиз эмас...

Кўзойнакли шифокор Бозорнинг кўзига қадрдонидек кўриниб кетди – «унинг ташвишини биз қиласиз» дегани кўнглига малҳамдек ёқди – бир оз тинчланди, сўнг ўзини юпандиришга ўтди... «Уч ойдан буён туғилмаётган бола шу бугун қисталанг қип қолмас. Онам қўшниларни чақирав, ахир» деди, шу хаёлда кўзойнакли шифокорга маслаҳат солмаганига афсусланди. «Анча тажрибали кўринади... Ой-кунидан уч ой ўтса ҳам дард тутмаётгани сабабини билса керак?..» Бироқ Бозор ўйини ўйлагунича палата ўртасида сўппайиб ёлғиз ўзи қолди... эшик бер-килди, ташқари жимжит, фақат чалқанча ётган Нарзиқул амакининг хурраги тинчликни бузаётган эди...

Тонгга яқин эшик ортида ғўнғир-ғўнғир эшитилди. Ухлаб ухламаган, бедор бўлиб кўзини очолмаган Бо-

зор қулоғини динг қилди – мелиса билан гаплашаётган Фаолнинг овозини таниди – жим ётаверди. Орадан сал фурсат ўтмай эшик очилиб тиркишдан ҳамширанинг оқ халати, сўнг Раҳматовнинг сергўшт афти қўринди – у дам Бозорга, дам ухлаётган Нарзикул амакига шошиболайиб кўз югуртирди-да, бош чайқаб нари кетди. Бозор иргиб туриб, эшикка югуриб келди.

– Раҳматов ака, бизнинг уйдагилар тинчми?.. Келинингиз...

Эшик Бозорнинг бетига ёпилди. Йўлакдан Раҳматовнингми, Фаолнингми – «Тинч, Бозор, ҳаммаси тинч», дегани эшитилди.

Тонг бўзара бошлаганда эшик оғаси бўлмиш мелиса йигит ширин уйқу элитган Бозорни аста туртиб уйғотди. Ташқарига имлади. Бозор унинг изидан йўлакка чиқди.

– Еттинчи палатага киринг, – деди мелиса уйқусиз кўзларини ишқаб жойига ўтираётib.

– Нега? – сўради Бозор.

– Киринг, деганда, киринг-да, – деди товушини бир парда кўтариб мелиса.

Бозор икки эшикни босиб ўтиб «7» раками битилган палата эшигини оҳиста очди. Очдию, Опанинг хузурида учрашиб, сухбатлашган мелисани кўриб ҳайрон бўлди. Бу сафар кишилик кийимида, энгайини кафтига тираб хўмрайиб ўтиради. Мелиса тиши оғриётган одамдек кафтини оғзига босиб «ўтиринг» деб рўпарасидаги курсига имо килди. Бозор мелиса бўлса-да, ҳарқалай таниш кишини кўрганидан пича енгил тортди, дадил бориб курсига ўтириди.

– Терговчиман. Марказдан келдим. Нима гап? – савол қотди у томдан тараша ташлагандек.

– Шу... эски гап, – қуруққина жавоб қайтарди Бозор.

– Қайси эски гап?

– Ўша – Опанинг қабулида айтгандим-ку, шу-да...

– Мен Опани танимайман... Бир бошдан айтинг! – Терговчи ўтирган жойида оғир кўзғалди. – Нима қилиб ваҳима кўтариб юрибсизлар?

Бозор ҳанг-манг бўлиб қолди. «Тушимми-ўнгимми» дегандек кўзини юмиб очиб, рўпарасидаги одамга разм

солди. – «Ўша – Опанинг хузурида гаплашган мелиса –
худди ўзи...»

– Ваҳималик жойи йўқ, – деб эътиrozдан бошлади
у пешонасини тириштириб. Бозор эътиroz билдирию,
одамсимон махлукларнинг ҳеч қайси ташрифи чоғида
кечагидек ёввойи даҳшатга тушмаганини, сал бўлмаса
аклдан озиб қолаёзганини, бу даҳшат касалхонага етиб
келишгач, ёввойи ваҳимага айланганини ошкор этишни
эп кўрмади. Шу боис ортиқ ҳаяжонга берилмай воқеани
жўнгина баён қилди. Сўрок бериб ўтирганда оч кўк
бўёқ суркалган кўча дарвозасининг тангадек тешигидан
кимдир мўралади. Уни терговчи пайқамади, «Аминвой
акам!» – деган ўй ялт этиб ўтди Бозорнинг хаёлидан.
«Ўша!» Шу хаёлда Бозорнинг терговчининг совуқдан-
совуқ муомаласидан озорланган кўнгли пича илиди,
илиди-ю, ширин хаёлга ғарқ бўлиш мавриди эмасди –
сўрок давом этди.

– Тушунолмай қолдим, – деди пайт пойлаб Бозор. –
Мени жабрланувчи сифатида сўроқ қиляпсизми ёки?..

– Шу кунгача ҳеч ким эмасдингиз... беҳуда шов-шув
кўтариб халқни теримдан чалғитаверсангиз, жиноятчига
айланишингиз ҳеч гапмас...

Бозор қулоғига ишонмай таажжубда, «Ахир мен...»
деб терговчининг даъвосини рад этмоқчи эди. У ўрнидан
туриб ташқарига йўналди-да, бамайлихотир оҳангда:

– Мақсад – сизларни анавилар қўзидан асраш, – деди
терговчи шаҳодат бармоғини тепага нукиб.

Бу жавобдан Бозорнинг кўнгли бир қадар ёришган
бўлса-да, у мавҳум ва мажхул аҳволдан қутуломай узун
йўлакка чиқишигач ҳам беихтиёр терговчининг изидан
эшиккача эргашиб борди.

– Терговчи ака, – деди соҳт-сумбатига ярашмаган
ёлборувчан оҳангда. – Мен уйга кетавурай... Хотиним
оғироёқ, ой-куни етиб-ўтган...

Терговчи эшикка етган жойида орқага ўгирилди. Бозорга
бошдан-оёқ разм солди.

– Хотинингни ой-куни етиб-ўтган бўлса менга нима?..
Сени мен тутиб турибманми? Дўхтир рухсат берса, кета-
вур.

Бозор терговчининг жавоби қўрслигини ҳам, самимилигини ҳам фарқламади, бетига қон югуриб унга мўлтиради ва негадир, «Сиздан рухсат-а, шундайми?» деб юборди. Сўраб улгурмай эшик очилиб ёпилдио, «ширқ» этиб кулфланди. Бозорнинг гапи бўғзида қолди, шу пайт даҳлиздан терговчининг пўнғиллагани эшитилди:

– Бу ерда шовқин қилманглар!.. Вахимага ўрин йўқ!.. Иккови ётибди, оёгини осмондан қилиб!.. Боринглар, ишдан колманглар!..

Бир гала эркак-аёл чувир-чувир кўтарди, Бозор қулоғини динг килди – кўзига дўмбайган корнини қўллари билан паналашга беҳуда уринаётган, кўзлари йигидан қизарган хотини кўринди... даҳлиз жим бўлиб қолди... Бозорнинг кўнгли ўзи ёлғиз қолган узундан-узоқ йўлақдек ҳувиллаганидан орзишиб кетди. Ичидан бир ҳайкириқ келди – ўзини тийди... Палата эшиги ёнидаги курсида буқчайиб ўтирган мелиса йигит унга қайрилиб қарамади. «Ухлаб қолди, шекилли», деб ўйлади Бозор. Сўнг эшикларни бир бошдан назардан ўтказиб йўлақдан келаверди. У шифокорлардан бирортасини учратмоқчи – уйига кетиш учун рухсат сўрамоқчи эди. Бироқ нечта эшикни тортмасин – ҳаммаси тақа-тақ берклигина кўриб Бозорнинг ҳайронлиги чандон ортди... Мелиса йигит мудроқ кўзларини хиёл очиб Бозорга қарди – ҳеч сўз демай уйқусизлик укубатига дош беролмаган қовоқлари қайта юмилди. Бозор йўлак адогигача борди – бошқа палата эшиклари ҳам михлангандек ёпик эди.

– Биздан бўлак бемор йўқми? – сўради у мелисадан.

– Терим пайти-ку... касалхона ёпилган, – жавоб берди у истар-истамас.

– Касаллар-чи? – сўради Бозор ҳайронлиги ортиб.

Саволига жавоб бўлавермагач, елкасини қисганча палатага кирди. Бир-бир юриб Нарзиқул амакининг тепасига келди. Унинг лаб-тумшуғини учук босиб кетган, соқолини яқин ўн кун миёнасида киртишламаганидан башараси тентаксифат қиёфага кирганди.

«Амак бунчалик қўрқди-я?» деб ўйлади Бозор. Кейин ўзи учрашув чоғида қўрқув туйғуси йўқолишини,

кечагисида эса дам чўчимай-нетмай, дам даҳшатли кўркувдан эси тескари бўлиб кетаёзганини эслади. Ба «уларнинг ўзлари одамни кўркмайдиган килиб қўяр экан» деган хulosага келди. Давлатов ҳам кўрқмаган, айтди-ку, «бирдан ботирландим» деди-ку. Қизик, юзмайоз келганда ботирланибида-да, кейин, эртасига юрагини ховучлаб юрибди. Кимсан – Давлатов-а!..

Бозор худди ташкарини кўрмоқчи бўлгандек ойнала-ри қуюқ бўёқ суркалган деразага тикилиб турди-турди-да, каравотга омонат чўзилди, кафтларини бошига ёстиқ килиб шифтга термилди.

– Агар Нарзиқул амак ғарам тепасига чиқмаганида шунча тўс-тўполнон йўқ эди-я!.. Қаттанам чақирди, уни?!.. Ёки ўша маҳлуклар заводга тушмаса ҳам бўлардию!.. Нарзиқул амакнинг тўйигача суриштиридими-ей!.. Бекор айтди-да, тўйини... Эҳ, одамнинг соддаси!..

Бозор дик этиб бош кўтариб ўтириб олди. Эслади: амакини овоз чиқармай ичиди жеркиганида хушкомат келгинди қандоқ сезди?! «Бу кишининг жавобини тафтиш қиляпсизми?» деб сўради. Ўша заҳоти сезди. Сўнг... шайтонлатиб қўйди Бозорни!..

Бозор лунжи асабий учайдиганини сезиб қўлини юзи-га босди. Лоп этиб одамсимон маҳлук ўзидан Оқсоқол ҳақида сўрагани ёдига тушди. Тушдию, палатада у ёқдан-бу ёққа юра кетди. Ўтири, турди, юрди... «Оқсоқолнинг топширигини бажарганимисан», деб сўради. Оқсоқолни ўшалар ҳам танир экан-да... Бозор «йўқ» деди. Бор гапни айтди. «Яхшилаб ўйлаб кўрдингми?» деб сўради улар яна. Нимасини ўйлайди Бозор! Ўйлайдиган жойи йўқ!.. Бозор кулиб юборди. «Оқсоқол қаттаю, Бозор қатта!» Эл-юртнинг оғзидан Оқсоқолнинг номи тушмагани билан Бозор у кишининг афт-башарасини кўрган бўлмаса!.. Оқсоқол билан таниш бўлганида куни Аминвой, Раҳматов, Давлатовга қолармиди!.. Уч ойдан бўён кўзи ёrimаётган – тўлғоқ тутмаётган, юрак ўйноғи касалига мубтало бўлган шўрлик Шабнамгинасини энг катта дўхтириларга оббориб кўрсатмас эдими?!.

Сиқилганидан хуноб бўлган Бозор «хур-хур»лаб ухлаётган амакини силтаб, турткилаб уйғотмоқчи, «Хушиңгизни йиғинг, кетамиз, уйимизга борамиз!» демоқчи

эди, шу чоғ эшик сассиз-несиз қия очилиб ҳамшира жувон мўралади. Бозор, «Дўхтири қаерда?» деб сўрамоқка лаб жуфтлаганида ҳамшира уни имлаб чақирди. Бозор оёқ учидаги илдам юриб эшик ёнига борди. Ҳамшира пичирлади:

- Еттинчи палатага киринг, кутишяпти...
- Ким? – сўради Бозор ҳам баттар шивирлаб.
- Акангиз... – дея мўмай улушкини олган қўшмачидай мамнун илжайди ҳамшира.

8

Бозор таниш палата ўртасида ғўдайиб турган бирдан-бир ишонган тоғи – Аминвойни кўриб хўрлиги келди. Гуппи унга пешвоз юрди. Кўл олишиб қуюқ сўрашди. Омонлашиш асносида Бозорни саросар кузатди. Гуппининг атайин имиллаб сўрашаётганини Бозор сезди, у айб иш қилган боладек бошини эгди. Ниҳоят, Аминвой «ўтири» деб Бозорга бояги курсини кўрсатди, ўзи терговчининг ўрнини эгаллади.

Орага оғир сукунат чўқди. Аминвой атайин Бозорни синаш учун шундай қилаётган эди, буни пайқаган Бозор сир бой бермади. Бирмунча фурсат жим ўтиришгач, алҳол, гуппининг сабри чидамай жимликни бузди:

- Нега индамайсан, Бозор? Кўрқдингми?..
- Бозор бир нафас ўйга толди-да, сўнг жавоб қилди:
- Нимадан қўрқаман?
- Сен эркак кишисан, Бозор...

Аминвой шундай деб бошини бир ёнга қийшайтирганича Бозорнинг кўзига узоқ тикилди. Тикилиб туриб гапининг давомини айтди:

- Бўлар-бўлмасга вайсайвермайсан... Шундайми?..

Бозор Аминвойнинг бу қадар сирли, тагдор гап бошлиганидан ўнғайсизланяётган, ажабланяётган эса-да, ўзи очилмади – гапнинг даромадини кутди. Гуппи чайнала-верди. Аминвой ёқимсиз семиз эмас, қилтирик эмас, баланд гавдасини тик тутиб юрар, чиройли қоматига яраша кийимлари ҳам ёпишиб тушган, доим бўйинбоғда – серсавлат арбоблардек доим жиддий, камгап, босик юриши Бозорнинг ҳавасини келтирас эди. Шундай одамнинг чайналаётганига Бозорнинг ҳайронлиги ортгандан орта-

ётган... у бехосдан Давлатовни эслади. «Уйига учар баркашдагилар тушганини бунга айтганмикан?» Кўнглидан кечган шу савол билан Аминвойнинг кўзига қаради – саволига жавоб ололмади. «Балки Давлатов мен билан гаплашганини айтгандир?» – Бозор ҳамон Аминвойдан ниғохини узмаган эди, шундагина у Аминвойнинг бунчалик қув кўзлигини, бу қадар мазмунсиз бокишини пайқади... Эҳтимол, Давлатов айтгандир?.. Гап – орамизда, деганди... Бундай деса, гуппи бунчайин ғайир қарашиб қилияпти?.. Ёхуд Давлатов ҳақида билганларимни тўкиб солишимни кутяптимикан?..

Бозор тизгинсиз хаёлларга толиб овозини беихтиёр бир парда кўтарди:

- Нима демоқчисиз, Аминвой ака? Айтаверинг.
- Шу... Нарзиқул ёмон кўрқибди-да...

Бозор бундай жавобни кутмаган эди. У гуппининг асл муддаосига тушунолмай афтида ним табассум қотиб қолган кўйи унга қаттикроқ тикилди – шу йўсин Аминвойнинг ниятини фаҳмлаб олмоқчи эди. Бироқ шу алфоз кўз уриштириб турилса барча бадниятлари фош бўладигандек гуппи аввал ишшайди («Давлатовга ўхшаб ишшайди!» – хаёлидан ўтказди Бозор), сўнг кулди – секин, ҳатто эшик ва деворлар ҳам эшитмайдиган қилиб кулди. Бозорнинг таранг тортилган асаблари бирдан бўшашибди, ҳатто акахони билан ҳасратлашиб ўтирганидан яйраб кетди:

– Қойил-е, Аминвой ака, – деди у суҳбатдошининг кулгисига жўр бўлиб. – Учар келгиндилар билан жавобмуомала қилган бизу, юрагини олдирган – силар экан-да! Ха-ха-ха!..

Аминвойнинг башараси тундлашибди. Бозор тап тортмай қалтис ҳазил қилиб юборганини, бу қилифи Аминвой билан Давлатовни бир гўр килганини сездию, айтилган сўз – отилган ўқ қабилида бўлар иш бўлди деб гуппи қандай ройиш беришини кутмай, мутойиба оҳанганини бузмади:

– Бечора, Нарзи амак... ёмон кўрқди!.. Нукул ўн икки боласини пеш қиласи-ей!.. А, анави одамнусха маҳлук бўлса!.. Ўн икки боланинг фарқига, қадрига ет-

сайкан! Хих!.. Фақат, шунча болангни қандок боқасан, деб сўради, холос!.. Амак шўрликка учук тошиб кетди, денг!..

– «Болаларингни қандок боқасан?» дедими? – сўради Аминвой.

– Сўради. Ўн иккита дегандан кейин сўрайди-да... Мендан ҳам сўраган... – У бехосдан «Давлатовдан ҳам сўраган», деб юбормоқчи эди – тилини тийди. Сўнг бирдан ҳангома маромини ўзгартириб тобора кўзлари катталаша бораётган гуппини тинчлантиришга ўтди: – Сўраса сўрабди-да, ака. Уларнинг нияти ёмон эмас. Назаримда, шу... ерликларни ўрганяпти.

– Нима, ер юзида Пахтақайнардан бўлак жой куриб кетганми – шетга тушмаса?!

Бозорнинг шуурида чирок ёнгандай бўлди. Боягина у суҳбатдошининг авзои-кўзига қанча тикилмасин сирнинг тагига етолмаганди, мана, гуппининг ўзи чув тушди – айтди. Бозорнинг эсида, аниқ эсида – Давлатов худди шундай деганди. Гуппи ҳам худди ўша тарзда, ўша макомда такрорлади. Бўласи-да!.. Айтмай-чи!.. Эсхонаси чиқиб менга келиб ёрилган одам ишонган жиянига айтмайдими?! Ҳойнахой, менга айтиб кўнгли хотиржам тортмаган бўлса, кейин жиянига дардини тўккан чиқар... Аввал айтмаган бўлсаям, кечаги тўполондан сўнг айтган...

Бозор дилидагини бетига юқтирмай жавоб қилди:

– Газитда ёзяптию, ака – учиб келгичлар тушмаган жой қомаяпти.

– Э, ҳа-а, – деб юборди бирдан енгил тортиб гуппи. – Айтмоқчи, телевизордаям кўрсатганмиш-ку... Ўша, бошқа жойларга ҳам шу бизга келаётганлар тушаётганмикан, Бозор?

– Бунисини билмадим...

– Бошқа жойларда нима тўғрида гаплашаркан? – яна сўради болаларча соддадиллик билан Аминвой.

– Ким билсин? – хаёлчан жавоб қилди Бозор. – Қизифи, ака, улар гаплашмайди – сўрайди, холос. Тўрт ёшли болага ўхшайди-е! Сўрайверади, сўрайверади...

– Аши учун айтяпман-да, Бозор, сен гўл эмассан, оғзингга кеганини валдирайвермайсан!.. Сўраяпти деб қаёқдаги келгиндиларга авра-астарингни ағдариб ташлайвермайсан. Шундай эмасми?

Бозор бошини сарак-сарак тебратди.

– Ҳа? – деди гуппи тўсатдан гапдан тўхтаб.

– Ну, Нарзиқул амак ўлгудай гўл экан-да... нуқул, «тўй қиллим», «мошин оллим», «ўн икки болам бор, сармояни билмайман» деб ётибди-ей!.. Сўрамаганидан ҳасрат қиляпти-да!..

Аминвой ўрнидан туриб кетди. Хонада асабий юриниб туриб, таққа тўхтади, сўради:

– Яна нималар деди?!

– Шу, «Раҳм қилинглар»дан нарига ўтмади. «Тўй қиладиганман», дейдими-ей!

– Улар-чи?! – Аминвой Бозорнинг тепасидан келиб унинг кўзларига ўқрайди.

– Улар, шунча оғизни қандоқ тўйдирасан деб ачинди, холос... Кейин «сармояни қайдан олишингни ўйлаб кўргин», деди-да, ғойиб бўлди...

– Нарзиқулнинг топиш-тутишиминан уларнинг нима иши боракан?!

– Улар нуқул сўрагани сўраган деяпману, ака. Ҳар балони сўрайверади. Қизиқмаган нарсаси йўқ. Амак улар сўрамаган нарсани айтаверганидан аччиғим чиқди. Шу...

– Сўрамаганини айтиб нима қилади, бу хотинталоқ?! – деди дарғазаб бўлиб гуппи. – Оғзингни юм, сўтак, демадингми?

Бозор ўрнидан турди. Аминвойнинг афтига меровланиб тикилди. Юзини юзига яқинлаштириди. Гуппи тисланди – Бозор унга томон бир-бир қадам босиб яна яқинлашди.

– Гапир! – ўдағайлари гуппи овози ўзгариб.

– Ака... – деди Бозор ниҳоят ўта сирли оҳангда шивирлаб. – Улар деганимнимас, кўнглимдагини эшитади... сезади... Алжигани учун амакни сўқдим... ичимда сўқиндим – эшитди, сезди – жонимни кўзимга кўрсатиб кўйди!..

– Қандоқ эшитди? Қандоқ сезди, Бозор? – сўради Аминвой унинг билагидан чангаллаб.

Бозор саволни эшитмагандек бояги-бояги оҳангда давом этди:

– Кейин-чи, ака, – деди у худди гуппини чўчитиб юбормаслик ниятида гапни чўзаётгандек. – Кейин-чи... амакда ҳам айб йўк...

– Нега?

– Негаки, келгиндилар сўроққа тутганда ҳеч нарсани яширолмай қоларкан одам...

– Нима-а?..

– Ҳеч нарсани... Мен бўлар-бўлмасга алжийдиган ах-моқ эмасман, лекин оғзингиз ўзидан-ўзи очилиб кетавуради... Сўраса-сўрамаса айтавурасиз... Айтмасангиз, кўнгилдан кечса, бас, улар эшитаверар экан... Аминвой гуппининг кўзлари осма соат капгиридек катталашди – узун бўйни бошини тутолмади чоғи, калласи чайқалиб кетди, Бозорни еб юборгудай олайди.

– Унда, – деди у даҳанини чўзиб, тишини ғичирлатди. – Унда, сенам гўл экансан! Сўтак экансан!..

Аминвойнинг лаблари орасидан тупук сачради. Бозор худди бирор орқасидан келиб бошига гурзи билан туширгандек туйкус қалқиб кетди, каловланди. Гарангсиб, кўзининг пахтаси чиқиб рўпарасидаги одамга анграйди – лабининг бурчидан қон сизилиб оққандек бўлди. Шу пайт йўлакдан кимдир заиф ва йиғлоқи товушда «Бозор!.. Бо-зор!..» деб чақирмаганида, Бозор ғайришуур ий алфозда югуриб эшикни очмаганида Аминвой акаси яна нима дерди-кўярди – билмади. У йўлакка чиқдию, палатаси эшигига ҳолсиз суюниб турган Нарзиқул амакини кўрди.

– Тўхта! – деди гуппи пишқириб. – Мен келганимни айтма!.. Кулоғига қўй, у ҳайвоннинг – тилига пухта бўлсин! Ўзинг ҳам тушундингми?!

Бозор дам ўзидан нажот кутаётган Нарзиқул амаки томонга, дам оғзига келган ҳақоратли сўзлар билан сийлаётган Аминвойга аланг-жаланглайверди.

– Боравур! – деди ниҳоят гуппи. Бозор лаб-лунжини енгига арта-арта йўлакка чиқиб, Нарзиқул амаки томон

икки-уч кадам ташлади, Аминвойнинг қаттиқ сўкиниши қулогига сихдек қадалди...

9

«Холис» сайёраси келгиндилаriga йўлиқкан икки юкчи зудлик билан касалхонага ётқизилгани, улар ёнига ҳеч зоғ йўлатилмаганига қарамай ойни этак билан ёпиб бўлмади. «Келгиндилар Раҳматовди завудини босибди!» қабилидаги узук-юлуқ гаплар етти иқлимга тарқаб улгурди.

Орадан икки кун ўтиб эрталаб, нонуштага ўтирган Бозор билан Нарзиқулнинг устига Фаол бостириб кирдида, ҳе йўқ-бе йўқ, «Кетдик, кетдик, заводга борамиз»лаб қолди. Йўлакка чиқаётib Бозор курсида бошқа мелиса ўтирганини кўрди. Буниси ҳам ширин уйқуда – туш кўряпти шекилли – майнин кулимсираб пинакка кетган эди. Кеча Нарзиқул «Бозор! Бозор!»лаб чақирганида, Бозор Аминвой билан сухбатни узиб, югуриб келганида ҳам курсида ўтирган мелиса йигит уйғонмаган эди...

Улар мингандан шунингдай завод идорасига тақаб тўхтади. Фаол шоширди. Бозор индамади, Нарзиқул эса яна одамнусха жондорларга рўпара келадигандек саросимада лаблари пир-пир учса бошлади, нажот истаб Бозорнинг кўлидан тутди.

Директорнинг хонасида Раҳматов, Муовин, Давлатов, яна икки-уч киши – ҳамма ўзича оғир ўйга толиб ўтирарди. Йиғилганларнинг авзоидан бири олиб бири қўйиб икковининг пўстагини қоқадигандек эди. Йўқ, Бозорнинг тахмини тасдиқланмади. Аксинча, уларни кўриб Раҳматов зўраки кулимсираб бўлса-да, ўрнидан кўзғалди.

– Дурустмисизлар? – деди у «бемор»ларга яқин келмай.

– Дурустмисизлар? – директорнинг гапини такрорлади бош ҳисобчи.

Бозор ҳол-аҳвол сўрашга жавобан жимгина бош ирғади, у касаба раисига, қаторга бориб ўтирган Фаолнинг ёш болаларнидекчуваккина афтига разм солди, нигоҳи Давлатовнинг нигоҳига тўқнашганда бош

ҳисобчи ерга қараб олди. Шунда унинг бетидаги нималаридир директорнига ўхшаб кетишини бехос пайқади. Дарҳақиқат, Раҳматов билан Давлатовнинг бурними, гўштдор лунжларими, кўз қараашларими – бир қориндан талашиб тушган оға-иниларнидек ўхшаш эди. «Узоқ йиллар аҳил-иноқ яшаган эр-хотинлар бир-бировига ўхшаб қолади», деган гапни эсладию, Бозор шу топда хаёлига келган қиёсдан кулгиси қистади, «Ҳатто гапириши ҳам ўхшайди», деб кўнглидан ўтказди у.

Бозор бундай мулоҳазага берилган пайтда бирдан Нарзиқул амаки пиқиллаб йиғлаб юборди.

– Раҳматуб!.. Мен қандоқ қиласай?.. Мен нима қиламан, энди, Раҳматуб!.. Ўн икки болам...

Шундагина уч кунни гоҳ талмовсираб, гоҳ хуноб бўлиб ўз ёғига ўзи қоврилиб ўтказган Бозорнинг биринчи бор тоқати тоқ бўлди:

– Бўлди-е! Қанака одамсиз, ўзи!.. Ўн икки бола фақат сизда борми?! Шунчаям йиғлоқи бўладими, эркак одам!..

Бозорнинг шу зардаси унинг уч кундан буён амакининг кўнглига қараб ётганини бир пул қилди. Жеркиш оғир ботдими ёки Нарзиқул ўнақай фурсат кутаётган эканми, бирдан йиғини бас қилди.

– Сенинг касофатинг урди, шум қадам!.. Сен деб шу кунларга қоллим, сени деб!..

Нарзиқул ўдагайлаганига қаноат қилмай, икки қўллаб Бозорнинг бўғзига чанг солди. Энди калла урай деганда яқинроқда ўтирган юқчилар бошлиғи амакини ушлаб қолди. Бозор чап беришга улгурди. У Нарзиқулдан бундай ножӯя қилиқни кутмаган эса-да, унга жавоб қайтаришни хаёлига келтирмади. Шунга қарамай, ўзи билан амаки ўргасида Фаол пайдо бўлганини кўриб, вазият чиндан кескинлашганини сезди.

– Ха-а, амак, – Раҳматовнинг босик овози эшитилди. – Бу нима қилиқ?

– Бола-чақа нимайканини биладими, бу зумраша, Раҳматуб!.. Шунинг қораси кўриндию, завудга касофати урди!.. Бизди сотади бу!..

– Ярашмаган қилиқ, – деб ғўлдиради Давлатов.

Нарзикул бурнини торта-торта оғзига келганини вай-сайверди. Бозорнинг кўз ўнги коронғилашди – кун са-йин ҳомиласи оғирлаша бораётган, қаппайган қорнини кўтариб юриши уқубатга айланадиган Шабнамгинаси кўз ўнгидаги гавдаланди – ичини тиғ тилгандай бўлди. У амакининг тухматларига қулоқ солмади, хиёл ҳушини йиғандагина боядан бери Давлатовга тикилиб турганини пайқади. Давлатов ҳамон бошини кўтармай ўтиради. «Оёғинг ёқмади, бола!» – деганди, мана, одам қури-гандай ўша таънани амакидан эшишиб турибди.

Бозор Раҳматовга қаради, афтидан амакининг ҳақо-ратига унинг муносабатини фаҳмлолмади.

– Бачканаликни бас қилинглар, – деди Раҳматов боя-гиндан хиёл товушини кўтариб. – Нарзиқулвой, нима, си-ларни муштлаштириб томоша қилгани йиғилганмизми, биз?

– Томоша кўрадиган пайт эмас, – директорнинг гапини маъқуллади Давлатов.

Орага сукунат чўқди.

– Ўқийми? – секингина сўради жимлиқдан фойда-ланган Фаол.

Раҳматов қовоғини уюб бош ирғади, шу чоққача тик турган Бозор билан Нарзиқулга «ўтиринглар» деди-да, бирдан овозини мулойимлаштириб, ҳаммага қаратса га-пирди:

– Бизга хат йўлланган... Ҳар иккала қулогинглар билан эшитинглар. – Хат – маҳфий, эшитганларинг шетта қолсин. Тушунарлим, Нарзиқулвой?

Давлатов салобат тўкиб бош ирғади.

– Ҳм... – деди Нарзиқул хўрсиниш аралаш, Раҳматов худди хатни ўзи ўқишига чоғлангандек томоқ қирди. Фа-олга қаради. Фаол сўрғичланган оқ қоғоз хат халтани кавлаштираётни, «Асли шуни ҳамма ишчиларга ошкора ўқиб эшиттириш керак эди-да», деди ғўлдираб. Раҳматов тутакиб кетди.

– Э, қанақа одамсиз, Абдулфаол, – деди у жиркан-гандек афтини бужмайтириб. – Хатнинг манглайига «Мутлақо маҳфий», деб муҳр уриб қўйибдию, тағин ошкора ўқисак дейсиз-а!.. Ҳамон йиғилдикми, ўқинг-да, гапничувалатмай!..

Фаол танбех эшитавериб эти қотиб кетган шекилли, директорнинг жеркишини ўзига оғир олмади, аксинча, хеч гап бўлмагандек ўрнидан турди-да, қироат билан хатни ўкишга тутинди.

– «Пахтақайнар қишлоқ шўросига! Пахтақайнар пахта заводига!

Ўз номи билан пахта кони бўлмиш Пахтақайнар қишлоғида яшовчи азизлар! Кунни тунга улаб оқ олтин етиштираётган, пахта планини бажаришдан кўра муқаддасроқ орзу-ниятни билмайдиган пахтақайнарлик азаматлар! Маълумингизким, юртимизнинг ялпи хирмонида сизларнинг улкан улушингиз ҳаммавакт бўлган, бу йил ҳам бўлажак! Айни кунларда ҳар бир пахтақайнарлик кексаю ёш мавжуд куч-кувватни етиштирилган ҳосилни йифиб-териб олишга қаратганидан беҳад миннатдорман. Щунга аминманки, далада бир сиким ҳам пахта қолмагунича, даладаги сўнгги мисқол пахта Пахтақайнар заводига келтирилиб, ғарамларга бо силмагунича сизлар ҳаловат не эканини унутасизлар. Пахтақайнарликлар ҳаловатни пахта теримидан топадилар!

Фақат шуни афсус билан қайд этмоқчиманки, сўнгги кунларда, мана, уч ойдирки, Пахтақайнар пахтакорлари тамомила ўзига номуносиб ҳодиса туфайли юргонзига тушди. Эмишки, Пахтақайнарга ўзга сайёрапликлар тушган эмиш!.. Одамлар билан гаплашган эмиш!.. Келгиндиilar, «Сизларга ёрдам қиласиз» деган эмиш!.. Ҳаммаёқ миш-миш!

Бу қандоқ гап? Тағин пахта терими айни авж палласига кўтарилиган, ҳадемай ёғинли кунлар бошланадиган кезларда кимларга керак бўлди бундай шов-шув? Аник маълумотларга қараганда, қишлоқ теримчилари учар баркашдан чўчиб, куёш ботмай уй-уйига тарқаётган эмиш, пахта заводида эса бир кундан ортиқ иш тўхтабди.

Қарийб икки кун! Иш тўхтабди?! Тарихда кўз кўриб-кулоқ эшитмаган воқеа бу!.. Тонг қоронғисидан шом зулматигача пахтазорни тарқ этмасликни ўзига шарафшон деб билган пахтақайнарликларни қандай жин урди? Пахтақайнарда иш тўхташи инсоният тарихида юз бермаган ҳодиса-ку!.. Мен тарих китобларидан аник била-

манки, Пахтақайнарда ибтидоий, қулдорлик даврларидан бўён бирон соат ҳам иш тўхтатилмаган, ишни тўхтатиш мумкинлигини ҳеч бир фуқаро хаёлига келтирмаган!

Хуллас, азиз пахтақайнарлик туғишиганлар! Пахтақайнар пахта тайёрлаш заводининг раҳбарлари, фаоллари! Сизлардан умидимиз катта. Дарҳол шов-шувга чек қўйилсин! Маънисиз овозалар бас қилинсин! Чалғиманглар! Бутун куч-куват ҳамишагидек пахта теримига сафарбар этилсин!

Катта ишонч билдириб...»

Фаол шу жойга келганда бир зум нафас ростлади, ўтирганларнинг дикқатини ўзига жалб қилиб олди-да, хат жўнатувчининг исмини ўқиди:

– Оқсоқол!..

Бозор «ялт» этиб Фаолга қаради, Нарзикул бошини бўйни орасига тортиб Раҳматовга мўлтиради, Давлатов чурқ этмай, қовоғини уйганча бошини кўтармай ўтиради, директор эса «кўрдингларми, хат кимдан келган?» деган мазмунда барчани назаридан ўтказаётган эди. Биринчи бўлиб сукунатни узуди:

– Хулоса аён, ўртоқлар, – деди у овозини ўқтамлаштириб, худди мактубнинг давомини ўқиётгандек оҳангда. – Шу дақиқадан эътиборан миш-мишлар бас қилинсин!.. Ким оғиз очса, кимда-ким гап чувалатса – аввал огоҳлантирилсин. Такрорласа – чорасини кўрамиз! Бўлак илож йўқ! Тушунарлимис?!?

Йифилганлар сукут аломати ризо мақомида ўтирадилар.

– Нарзикулбой, Бозорбой, – деди директор овозини дўриллатиб. – Сизлар бугун дам олинглар-да, эртадан ишга чиқинглар. Ҳеч нима бўлмагандай юраверинглар. Бирор келгиндилардан ҳангама бошласа, оғизга уринглар, «Ҳеч қандай келгинди йўқ – ҳаммаси уйдирма» денглар – вассалом! Тушунарлимис?.. Айтамиз – радио, газитдаги гапларни бас қилишади...

Бозор мажлисчанинг якунидан ҳайрон бўлди. Шундай эса-да, ҳамма «маъкул» деб бош эгиб турганида бир нарса деса маҳмаданаликка йўймасликлари учун тилини тийди. Тилини тийса... одамларга жавоб бермаса-

бермас, уларнинг оғзига уриш чораси топилса топилар, аммо-лекин... шу пайт кўнглида кечайдиганини сўзма-сўз ўқиётгандек Давлатов тилга кирди:

– «Ҳаммаси уйдирма» деб одамлардан кутулса бўлар... тағин анави келгиндиларга рўпара келса, нима қилсин, булар?.. Улардан қутулишнинг иложи топилар-микан?..

10

Бозор уйига кела-келгунича шуни ўйлади, дарвона-за кўринганда негадир юрагининг безовта уриши янайам тезлашди – худди уйида нохушлик юз бераётгандек қадамини жадаллаштириди... Ҳовлига кирдию, этақдаги уй остонасидан тушиб келаётган хотинини кўриб ичидা «Ҳартугул!» деб юборди. Бироқ ўзига пешвоз келаётган Шабнамнинг корнини кўриб юраги орқасига тортиб кетди, унинг юзлари, қовоқлари, айниқса лаблари янаям пўрсиллаб шишгандек туюлди, «Худойим-ей, енгиллаша қолса-чи!» – деб унсиз нола чекиб юбордию, сассиз-садосиз кўзларидан дувиллаб дур тўка бошлаган Шабнамгинасини бағрига босди. Назарида хотини анчагача бошини унинг кўксидан узмайдигандек эди, йўқ, Шабнам дарров ўзини қўлга олди – яноғи, лабларидаги ёш изларини кафти билан сидирди-да, эрининг кўзларига хавотирли назар ташлади. Бозорнинг беҳаловатлиги афтидан сезилиб турса-да, у ўзини одатдагидек хотир-жам тутишга уринаётганини пайқаб улгурди шекилли орқасига ўгирилмай, «Эна, келдилар!» деб овоз берди.

Чучук момо остонаядан ўтаётиб мункиб кетаёзи, ка-вушини оёғига илишга сабри чидамай, ҳовлига сарпой-чан югуриб чиқди, жавдираган кўзларини ўғлидан узмай, «Онагинанг ўлсин, болам!» дея фарёд чекиб юборди. Бозор югуриб келиб онасининг елкаларидан тутди, Шабнам кафтлари билан юз-кўзини тўсиб, пикиллаб йиғлаб юборди.

– Секин, она! – деди Бозор гуноҳкорона овозда шипшиб. – Шабнам!.. Кўшнилар эшитади... Тинчлик-ку, ҳаммаёқ!..

– Тинчлик бўмай ўлсин-эй, Бозор! Ажалимдан беш кун бурун ўладиганга ўхшайман!..

– Бас қилинг, она. Ахир...

Бозорнинг зардаси бўғзида қолди, кўча томондан «Бозорбой!» деган овоз эшитилди – қайнона-келиннинг йигиси, Бозорнинг зардаси тинди – дарвоза тавақаси очилиб Шабнамнинг онаси, укаси, сўнгроқ отаси кириб келишди. Шабнам отасини кутмаган чоғи, «Вой, отам!» деб қаерга қочишини билмай шошиб қолди ва бирдан эсига тушгандек илдам юриб қайнонасининг кавушини келтириб Чучук момонинг ёғи остига қўйди. Куда-кудағайларнинг одатдаги қуюқ салом-алиги бошлианди. Чучук момо югуриб-юргилаб келиннинг уйига кўрпача тўшади, меҳмонлари билан рўмолининг учини ташлаб олиб қайтатдан саломлашди, сўнг ғайрати жўшиб, ўрнидан иргиб қўзғалаётганида Шабнамнинг онаси чолига имо қилди. Жумақул бобо фурсатни бой бермай, «Бозорбой, улим...», деди босиклик билан. – Унинг товуши беўхшов чиқдими ёки бирон муддаони кўзлаб айтиётгани оҳангидан сезилдими – Чучук момо тўхтади. Қайнонаси билан изма-из туратган Шабнам ҳам кайтиб жойига ўтиради.

– Ўтганлар руҳини ёдга олиб қўяйлик... – деди бобо чўк тушиб ўтираётуб.

Чучук момо рўмоли билан юзини, оғзини беркитди... Жумақул бобонинг аввалига дағал эшитилаётган товуши тобора маромига тушиб бир мусиқий оҳангта айлана бошлади. Ҳийла узун оят поёнига етди, бобо дуони ҳам обдан ўқиди ва пировардида «Раббано отино...» ни айтиб, юзига фотиха тортди.

Дастурхон теварагидагилар сел бўлиб сукутга кетиб ўтиришарди. Қуръони мажид оятининг сехрли мусиқаси куда-кудағайларнинг, Шабнаму Бозорнинг елкасидан эзиз турган каттол юкни кўтариб кетгандек бўлди...

– Кунда тиловат қиласман, куда... – Чучук момо шундай деб кенг енгининг учларини кўзига босди.

Бозор қайнотасининг тиловати марҳумлар ёдидан кўра кўпроқ ўзига – унинг тинчини ўғирлаган келгинди маҳлукларга қаратилганини сезиб ичиди кулимсиради. Шу замони кулимсирагани учун кўнглининг бир чеккасида ғашлик туғилди.

Кечга яқин келди-кетди кўпайди. Келувчилар Бозордан ҳол-аҳвол суриштирас, битта-яримтаси учар мавжудотлардан гап очмаса, кўпчилик бу хусусда ломмим демас, бир чеккаси Бозор бундан таажжуланар, таажжулангани сари марказдан келган терговчининг, «Одамларни пахта теримидан чалғитсангиз жиноятчига айланишингиз ҳеч гап эмас» деганини эслар, бу асоссиз таҳдиддан унчалик чўчимаса-да, ўзининг таажжубига сабаб бўлаётган – одамларнинг учар баркашга қизиқиши ғалати бир йўсинда сўниб бораётганига ўзи ҳам лоқайд-бепарво кўл силтаб кўяётган эди...

Айрим келувчилар Нарзикул амакининг аҳволини суриштиреди. Бозор, «У киши тузук, уйида» деб жавобни қисқа қилди, кимдир, «Бечорани уч кун ухлатиб кетибди-я, қизиталоқлар!» деб ваҳима кўтарди. Бозор унга ҳам ортиқ эътибор қилмади – «Нарзи амаки хўп чарчаган экан – ўзи бош кўтармай ухлади», деди-кўйди.

Нихоят, алла-паллада сўнгги меҳмон – тоғасини кузатиб дарвозани тамбалаб қайтган Бозорга ҳовли ўртасида турган қайнотаси оталарча меҳрибонлик қилди:

– Чарчадингиз, улим...

Бозор беихтиёр қайнотасининг ўsic қошлари остида милтираб турган митти кўзларига, сийрақ, чўқки соқолига термилди. Бобойнинг кимсасиз тоғу тошда ёлғиз, бегам-беташвиш қўйчивонлик қилишини эслаб қайнотасига ҳаваси келди, шунинг баробарида мўйсафид одамни ҳавотирга қўйганидан хижолат чекди.

– Ҳамма қизиқади-да, ота, – деди у ўнгайсизланганидан бўлак сўз тополмай. – Нуқул сўрайдилар...

Қайнотаси хаёлга толдими, куёванинг гапини эътиборсиз қолдирди. Фақат онаси, қайнонаси ва Шабнам тунаш учун этакдаги уйга кетганларида, ўз уйи-ўлан тўшагига кириб ором топаётган Бозор қўшни хонада ўғли билан ёнма-ён ётган қайнотасининг:

– Сўрайвергани ёмон... сўрайверса, сўрайверса одамнинг тинкаси қуриб кетади... Ў, баччағар! – деганини эшитди. Шундагина Бозор қайнотасининг боя ҳовлида куёванинг гапидан мутаассир бўлганини фаҳмлади. Пайқадию... ўрин-кўрпада, боши остидаги момик бо-

лишда Шабнамгинасининг таниш, тотли исини туйди – бу қадрдан ҳидни уч кунда у шу қадар соғинганидан назарида ўрнида неча кунлар, наинки кунлар, балки ойлардан буён ётмагандек бўлди... тиникиб, роҳатланиб ухлагиси келди, оқшом ҳол-аҳвол сўрагани кирган чоллардан бири хайрлашатуриб, «Учар маҳлуқларнинг юзини тескари килсан», деб фотиха ўқиганини эслади – Бозорнинг кулгиси қистади, шифтга тикилган кўйи кулимсирадио, тағин шайтонга ҳай берди. Қизик, ҳазил-ҳазил билан учиб келган маҳлуқлар бутун қишлоқни ваҳима уясига айлантирди, одамлар улардан асранини дуога кўшиб худодан сўрайдиган бўлдилар... Эл-юртнинг ваҳимаси, кундуз заводда ўкиб эшигтирилган хат дабдабаси Бозорнинг кўнглидаги нотайин ваҳм кўлагасини қуюқлаштираётган эди... У шу топда хотини томонидан меҳмонлар борлигига, кун бўйи ҳовлисидан одам аrimаганига севинди.

Эртага меҳмонлар жўнайди, Бозор одатдагидек тунда ишга қатнайди... Тунда уйга ёлғиз қайтишини тасаввур қилганидан Бозорнинг юраги «шув» этиб кетди – «Рахматовдан сўрайман – уйга мошин ё трактор оббориб кўйисин» дейман деб дилига тугди. У ишдан қайтгунича Шабнам онасининг ёнида ётади, Бозор келгач хотини уйига кўчади... Онасининг ҳам юрагида юрак қолмади, ўзи!.. Айтишга айтади: «Она, юринг бизнинг уйда тунанг», дейди Бозор. Лекин илло-билло онаси кўнмайди – зинҳор кўнмайди, бу ёғи... ия, ҳали онаси келинини ёнидан жилдирмас?.. Кейинги кунларда, йўқ, анча бўлди, онаси кечаю кундуз келинини ёнидан узоқлашгани кўймаяпти... «Ҳақ» деб тўлғоқ тутишини худодан сўраб кутяпти. Шабнам эса ҳарс-ҳарс пишиллаб нафас олгани-олган, худди ой-куни етган ҳомиланинг, мана, неча ойдирки, ёруғ дунёга чиққиси келмаётгани жуда табиийдек бинойидек юрибди... Келинининг ташвиши етмагандай, Чучук момога ўғлининг ғалвалари ошиб тушди!... Шабнам енгиллашса... тугар ахир бир кун!.. Онаси ҳўп елиб-югуриб қоларди-я!.. Шабнам – она, Бозор – ота, онаси – буви бўлади!.. Ўғил туғади хотини... ҳовлининг тузайдиган жойлари кўп – кўча деворини қайта бошдан тиклайди, уй-жойлар бўёғини янгилайди, ҳовли

саҳнини текислайди, гул экади – ҳовлисини гулзорга айлантиради-ей!.. Ток сўрисини тузатади, бу ёғи... онасини, хотинини рўпарасига ўтқазиб, «Шу-шгу, топган тутганим бор, ўғилчанинг қўлини ҳалоллаймиз», дейди... Онаси йўқ дермиди, онаси-я!.. Нақ боши осмонга етар!.. Шабнам қишлоғига – отасиникига учади – «Күёвингиз невара тўйларингни бошламоқчилар», деб суюнчи олади... Ҳа-а, ўғил кўрадию – ўзиям азamat ўғил бўлади-ёв!.. Пахтақайнарнинг довруғига, ўзининг оғиздан оғизга қўчган довруғига татийдиган бир гижбадабанг тўй қилиб беришга ярамайдими?! Тўйга бутун эл-юргни хабарлайди, Раисни, Опани, Раҳматову Давлатовларни иззатини қилиб, тўрга ўтқазади. Аминвой акани-ку! – у киши тўйбоши бўлади!.. Бозорнинг бир оғиз ўтинчини ерда қолдирмади – уни заводга ишга жойлаштириди... заводда ишламаса қарзларидан узилармиди, тўйга атаб тўрт-беш танга жамғара олармиди!.. Қаёқда!.. Тракторни триллатгани билан бири икки бўлмади шу чоққача!.. Биринчи бўлиб Аминвой аканинг елкасига тўн ташлайди – гуппидан тўн айлансин – Бозор тўн кийдиришдан қочадиган йигит эмас!.. Ҳаммасини ўрнига қўяди у!.. Аминвой акасининг бўласи Давлатовга ҳам тўн атайди, унга атаганда, Раҳматовдан бир зар чопонни аярмиди!.. Директор билан Давлатов соҳт-сумбати ҳам, юриш туриши, димоғдорлиги, гап-сўзи, ҳатто... қўрқоқлиги ҳам бир хил, уларнинг икковига бир хил тўн кийдиригани маъқул. Ахир кунига шулар ярайди!.. Ҳар кимсанинг кунига ярайдиган кимиdir бўлиши керак-ку, ўшаларнинг хурматини жойига қўймаслик... Йўғ-э, Бозор юрт орасида юрган йигитлардан, ахир!.. Битта тўн нима деган гап – Нарзиқул амакини ўргага таклиф килади-да, бутун пахтақайнарликлар кўз ўнгиди, Жийдабулокдан келган Шабнамнинг қариндош-уруғлари, уруғ-аймоқлари орасида унга микрофонни тутқазади – «Гапиринг, амак, ўша пахта ғарами устидаги ҳангамадан гапиринг», дейди. Нарзиқул гапиради. Ўзи ҳуркович қўйдек юраксиз-ювош бўлсаям ҳангамани боплади... учар жондорларга йўликишганини, уларга бола-чақасини пеш қилиб ялиниб-ёлборганини, тумшуғиу оғиз-бурнига учук тошиб кетганигача айтади – меҳмонларнинг

ичаги узилгудай кулаверганидан кўзларидан тирқираб ёш чиқиб кеттунича айтаверади, ана шу ерига келганда Бозор унинг елкасига тўн ташлайди, сўнг, «Нарзиқул амак, энди мени бўғиб башарамга калла урганингизни айтинг» дейди. Нарзиқул амак айтмайди, «Кўй-е, униси-ни айтмайман» деб оёқ тираб туриб олади. «Айтинг, мен рози» деб Бозор қисталанг қиласди. Ҳовлини тўлдириб ўтирган меҳмонлар бақириб-хуштак чалиб Бозорнинг ёнини олишади. Юқорида савлат тўкиб ўтирган Раҳматов қорнини силкита-силкита кулади, Давлатов сўқим ҳам директорга ўхшаб кулади. Ниҳоят, амаки кўнади, айтади, бир бошдан айтади, ҳатто Бозорни «Бола-чақа ни-майканини биладими, бу зумраша!» деб койиганигача оқизмай-томизмай ҳикоя қиласди. Ким билсин, ўша кунларга етказса, қўли калталик қилмаса, Нарзиқул амакининг елкасига битта эмас, бир жуфт тўн ташлайди. Эриб-эшилиб кетган амаки нақ «Сенгаям худо ўн икки ўғил-қиз ато этсин!» деб юборарми!..

Бозор ўринга сингиб, адоксиз ва тизгинсиз тотли ўйлардан эриб сув бўлаётган эди, бирдан олислардан майин шивирми-гувирии садоси келди... Йўқ, олислардан эмас, балки шундоққина қулоғининг остида шивирлади кимдир... Ё, дераза ортидамикан?! Бозор «дик» этиб бошини ёстиқдан уздию, ўтирган кўйи қулоғини динг қилди. Юраги кўксидан чиқиб кетгудай дукурлай бошлади. Бозор кўкрагини чанглаб юрак уришини тинчлантирмоқчи бўлди, вужуди кулокқа айланиб хийла фурсат кутди. Худди хид олса биладигандек бурун тортиб исканди – ғужанак бўлиб олди – у шу топда жуда-жуда кичкина, ҳатто жимит одамга айланиб қолишга-да рози эди... «Ҳозир сўрок бошланади!» деган хаёлга бордию, белига қилич дами урилгандай инграб юборди – азбаройи қовуғи, бўксаси ёрилиб кетгандек бўлди, хоҳиш-ихтиёrsиз, «Меҳмонлар сезмасин-да!» деб илтижо қилди... иложисизликдан мадори қуриб, «Яна келдимикан?!» деган мажхул бир авзода кўча томонга қулоқ тутди.

– Ўз паноҳингда... ёш жонига раҳминг келсин... Ёмон кўздан ўзинг асрар...

Бозорнинг шуури бирдан тиниқлашди, шивирлаш кўшни хонадан келаётганини – қайнотаси шўрлик шу пайтгача ухламай дуолар ёғдириб ётганини сезди-да, баданини босган совуқ тердан эти жунжикиб кўрпани бошига тортмоқчи бўлди, бироқ бармоқларида жон қолмаганди...

11

– Жийдабулоққа боринглар, Бозорбой, – деди Жумакул бобо одатича гаплашаётган одамига қарамай. – Дам олиб қайтасизлар.

Бозор қайнотасининг таклифига қулоқ солиб қайноасининг нигоҳидаги хавотирдан кўзини узмади. «Эҳтиёт бўл, қизим», деб Шабнамни қайта-қайта бағрига босди қайноаси, сўнг, «Қизимни силарга, силарни худога топширдик, қуда», деб жавдираб-жавдираб Бозора умидвор қаради.

Чучук момо қудасини юпантирган бўлди – овози титраб чиқди. Хайрлашдилар. Шабнам қўчага қадам босмай дарвозага суюнган жойида пишиллаганича онаси билан яна ўпишди, отасининг бетига қарамай хўшлашди, укасини чакириб қайта-қайта ўпди – унинг овозида маъсум, ўқтам, кўнгилда қандайдир эзгинлик уйғотувчи оҳанг пайдо бўлганди... Бозор ночор-ноиложликдан эзилганини сездирмасликка уриниб, ер остидан хотинининг тўнкарилган тогорадек бесўнақай қорнига на-зар солди... У кейинги кунларда юз берган ҳодисаларни, келди-кетдиларни, гап-сўзларни бир бошдан эслагиси келди. Оғир дардга чалингану, кечаги ширин хаёлларга берилиши ўша дардларни ювиб кеттандек туюлди, шундай енгил тортдики!.. Уйи, ҳовлиси гавжум бўлди, қайнота-қайноаси тунаб қолишиди... Заводдаги мажлис... Оқсоқолнинг мактуби... Раҳматовнинг кўрсатмаси... Бозор буларнинг ҳеч бирини эслагиси келмади. Одамлар билан учар баркашлар тўғрисида гаплашмаса-гаплашмас, Раҳматов ёки Оқсоқол буюрганидек «Ҳеч қандай учар келгиндилар йўқ», дея қутилса-қутилар, фақат у ичидаги тошдек чўкиб қолган бир ташвишга кўнгли алағда – у тошни ўзи суриб-жилдириб ташлолмас, ўйлаб кўрса, бунга фақат Аминвой қодир эди!..

Қайнонаси қизини Чучук момога, Бозорга ишонади, тилига чиқармаса-да, қайнотаси ҳам шу. Бозор уйланди-ю, Шабнамни жонидан ортиқ суюб қолди. Шабнам-гинасини еру кўкка ишонмай юрганди. Битта тойчоқдек ўғил туғиб берса хотинини бошларига кўтариш ўйида юрганди... афсус, ой-куни етган ҳомила оёқ тираб турибди – «Ўлгудай қайсар бўлса керагов!» – хаёлидан кечди Бозорнинг. Чучук момо Шабнамни обормаган жойи-кўрсатмаган дўхтири қолмади, бироқ уларнинг бирорта-сидан жўяли маслаҳат ололмади, жуда жон койитгани, «Туғмай ҳомиласини ютиб юборармиди, туғади-да, бир куни», деди-қўйди. «Ҳай, кўз-қулоқ бўп турайлик» деб бирон дўхтир зоти уйига қадам босмади. Чучук момо ўзи ёлғиз бола билан ўтгани аламига «Келиним бир ҳовли бола туғиб берсин, ўзим ювиб-тарайман», деб қўймайди. Онаси билан хотинининг яккаю ёлғиз ишонгани – Бозор. Бозорбой бундан қайтмайди, волидаси билан бир йил мобайнода жонининг ярмидек бўлиб қолган хотинини кафтида кўтариб юришга тайёр. Тайёрликка тайёр-а, лекин бошига шум кунлар тушса, ўзи кимга ишонади?.. Кимга суюнади у?..

Бозор шу чокқа довур суюнчиққа муҳтожлик сезмади, ишлади, амал-тақал қилиб уйланди... Ҳамма бало уйланганидан сўнг бошланди... Ўзи Аминвойга маслаҳат солди, «Ёрдамингизни аяманг, ака» деди... Бозор заводга ўтдию, суюнчиқнинг қудратини ҳис эта бошлади. Заводга ким орқали келганидан хабар топган ён-веридагилар Бозорга йўл-йўриқ кўрсатди, кимдир, «Аминвойди этагини қўйиб юборма, астойдил сўрасанг тарозибонликка ўтасан», деди.

Бозор бундай маслаҳатларга ортиқ эътибор қилмади, у заводда умрбод ишлаш нияти ҳам йўқ, Аминвой айтганидек икки-уч йил ишласа, қаддини тиклаб олса бас. Бозорнинг назарида заводда ишласа, кифоя, ўз-ўзидан қадди тикланаверадигандек эди... У Аминвойни қора тортиб юрса-да, гуппи билан дуруст-куруқ ош-катиқ бўлмас, Аминвой ҳам уни унутиб юборгандек, ҳатто танимагандек юрарди. Бозор учар баркашларга илк дафъя рўпара келган кунининг эртасига Раиснинг хонасидан чиқиб гуппини кўрдию, Аминвой уни унутмаганига

икрор бўлди. Аминвой қучоқ очиб уни бағрига босди, омонлашди, ҳатто манглайидан ўпди ҳам, шундан сўнгтина Раис билан қўл олишиди. Ўша топда Аминвой-нинг ўзи келиб Бозорни мошинга миндириб кетганига нақ Раис ҳам ҳавас қилди-ёв!..

Учар баркашдагиларга рўпара келгани боис Бозорнинг номи кимларнинг оғзига тушмади!... Лекин учар баркашлар келар-кетар, уларнинг шов-шуви унутилар ҳам... бу ёқда Аминвой гуппидай ака орттиргани қолар!.. Касалхонада ётганида эшиқдан бош суқиб уни чақирган ҳамшира, «Еттинчи палатага киринг – кутишяпти!» деди. «Ким?» – деб сўради Бозор. «Акангиз!» деди ҳамшира... Бориб қараса, акаси – Аминбой!.. Демак, гуппининг ўзи «акасиман», деган!.. Марказдан келган терговчи уни сўроққа туваётганида дераза туйнугидан мўралаган ҳам Аминвой... Бозор шуни сўрашни унутибди. Ҳарқалай, тахмини тўғрими-нотўғрими – Аминвой акаси хабар олгани келди... Ўша пайтгача, сўнг улар касалхонадан чиққунига қадар уларнинг ҳузурига ҳеч зоғ кира олмади-ку, ҳатто Раҳматов билан Фаол ҳам эшиқдан қайтишиди, уларни мелиса йигит палатага йўлатмади... Аминвой акаси эса кирди – алоҳида, бетма-бет ўтириб гаплашибди... ҳаммасини суриштириди ва Бозорни жеркиб ташлади... Нарзиқулни лапашангдан олиб лапашангга солган Аминвой пировардида Бозорни сўқди. Очик сўқди. «Сенам гўл экансан! Сўтак экансан!..» деди. Тишларини ғижирлатиб, тишлари орасидан тупук сачратиб айтди...

Бозор адойи тамом бўлди ўшанда. Нимага адойи тамом бўлганига акли етмаганди, ҳақоратнинг ўзи оғир ботмади, балки... «Биронта одаминг бўлмаса заводда ишломмайсан» дейишарди... шу гап лоп этиб ёдига тушдию, Бозорни гангитиб қўйди. Башарти Аминвой унинг ишонган акахони бўлсаю, шу гапдан сўнг оралари бузилса – Бозор қанағанги кўнгилсиз ҳодиса юз бериши мумкинлигини тасаввурига сифдиролмади. Нима бўлади?.. Юқчиликка ярамай қоладими Бозор?.. Ғарам тепасига чиқиб пахта тепкилашни эплолмайдими? Ёки тирикчилиги ўтмайдими?.. Бундай деса Аминвой унинг киссасига тўрт танга солиб қўяётган жойи йўқ. Заводга ўтиб Бозорнинг топиш-тутиши ҳам ошиб-тошиб кетма-

ди. Бир сафар ҳангамалашиб ўтириб Нарзиқул амаки, «Шетта ишлаб кам бўлмадик, ука, сабр қип тур – ишларинг жўнашиб кетади», деди. Бозор сабр қиляпти... Ҳаҳ, ўшанда Нарзиқул амаки сухбатнинг белига тепди-да!.. Қоқ белига тепди!.. Пича кейинроқ чақирганида ҳам гуппи сўкинганининг боисини айтар эди. Бозор эса амакидан хавотирланиб ёрдамга югурди... Аминвойнинг ўзи, «Боравур!» деди... пўписа қилиб айтди, «Янаги келганда таъзирингни бераман», дегандек айтди... Аминвой бир очилувди-я, Бозор фурсатни бой берди.... Эҳ, Нарзиқул амак!.. Эртаси улар касалхонадан чиқмаса, Аминвой мукаррар тағин келар эди, нимадан хавотирга тушганини, хуноб бўлгани боисини айтар эди... Лоақал кечаги мажлисда кўринмади... Ҳарқалай, Бозорни қўллаб юборарди... Бозорга човут солган амакининг ҳушини кўзига кўрсатиб кўярди!.. Нарзиқул амакини заводга Раҳматов обкелган, амаки, «Сенинг касофатинг урди!» деди, Раҳматовга ёқадиган гапни топиб айтди... Давлатов чурк этмади... У ҳам амакининг гапини айтган – «Оёғинг ёқмади, бола!» деган... Бошқа кимга суюниши мумкин эди Бозор ўша топда? Кимга? Фаолгами?.. Фаол турган-битгани Раҳматовнинг югурдаги, сояси юқа – бирорвга суюнчиқ бўладиган сиёқи йўқ, юкчилар бошлиғи – у ҳам хали Бозор билан очилиб-сирлашган эмас... Бундан чиқди, бирдан-бир ишонгани – Аминвой эди!.. Аминвой эса, суриштириб келганда, заводга бегона, у Раҳматов ё Давлатовга нечоғли қадрдон бўлмасин, маҳфий мактублар ўқиб эшиттириладиган мажлисчаларга таклиф этилмаслиги табиий...

Шундай бўлса-да, Бозор Аминвойни топиши, унга учрашиб бош эгиб турмоғи – эшитадиганини эшитмоғи лозимлигини фаҳмлади, фаҳмлагани ҳамоно «Учрашайчи», деган қарорга келди ва қароридан севиниб, уйидан чиқди...

12

Бозор ўзини юлдузни бенарвон урадиганлар тоифасидан санамаса-да, жудаям гўл, валакисаланг деб ҳам билмас эди. У Аминвой билан сухбатни ўйлагани сайдин ҳақорат кўнглига айил ботаётганини сезди. «Бун-

дан чиқди, онам – сўтакнинг онаси, Шабнам сўтакнинг хотини экан-да!» Бозор нафсонияти топталганини каттикроқ ҳис қила бошлади... «Бундан чиқди, эрта-индин туғиладиган ўғлим ҳам сўтакнинг ўғли бўларкан-да!.. Эҳтимол, ўғли сўтак отанинг бетига қаролмаслик важидан туғилгиси келмаётгандир?..»

У Аминвойни учратиши ниҳоятда зарурлигини ҳис қилди. Гуппи марҳамат қилиб ҳақоратига жавоб берсин... жавоб берса – хўп-хўп, акс ҳолда Бозорнинг бир дунё гаплари бор!.. Шундаям айтсинки!..

Бозор кўп юрди, изғиди, сарсон бўлди – Аминвойни на ердан, на кўқдан топди. Толиққани сайин ҳовурдан туша бошлади. Завод биқинидаги чойхонага кириб қуруқ нон билан чой ичди. Ҳозир дарвазадан кирган замони Раҳматов ёки Давлатовга дуч келишини ўйлади, гаплашишга кўзи учмаётган бўлса-да, негадир уларни кўргиси келди...

Бир тўда юкчилар курсовида ўтирган Нарзикул амакини кўриб «Адо бўйтию!» деб қўйди ичида, амакининг афтодаҳол башарасига зимдан кўз ташлаб. Лекин сир бой бермади. Гўё ҳеч қандай кўнгилсиз ходиса юз бермагандай ҳамкаслари билан сўзсиз кўл олишиб кўришди. Нарзикулга юзма-юз келганда «Дурустмисиз?» деб омонлашди. Орага ўнғайсиз жимлик чўқди. Бозор ҳайрон бўлди – одамлар нафақат учар келгиндилар ҳакидаги, балки ўзларининг кундалик ҳангамаларини ҳам йиғиштириб ташлагандек кўринди. «Бунақада одамлар гапиришни унутиб юборади» – ўзича кулимсиради у.

Шундай хаёлга боришга бордию, ўзи ҳам бир нима деб оғиз очишга журъат қилмади, буни толиққанлигига йўйиб энди икки қулоч чамаси кўтарилган пахта ғарами устига чиқди.

– Нарзикулди ола чикиб кет, Бозор, – деди кимдир орқадан.

Бозор тарқала бошлаган ишчилар томонга ўгирилиб кулди, изидан келаётган амакининг афт-башарасига разм солиб:

– Кулғингиз тинчидими? – деб сўради.

Амаки нарвондан кўтарилигунича мадори куриб, ҳарсиллади. Бозорнинг «Гапга солишяптими?» деган сўроғига жавоб бермай нафас ростлади-да, обдан ён-атрофга аланглаб кўнгли хотиржамлашгач, заиф овозда минғирлади:

– Гап кўп, Бозор...

Бозор шундай жавобни кутмаганди.

– Ўтири, – деди Нарзиқул қўли билан ишора қилиб, сўнг ўзи чордана куриб ҳали пишиқлаб тепкиланмаган пахтага чўқди. Сўради: – Эшитмадингми?

– Нимани? – Сўради Бозор ҳам амакининг хуфиёна гапиришидан яна бир балонинг бошланишини кўнгли сезиб.

– Кўшни қишлоқларга тушаётган эмиш!..

– Йўғ-э?! Қайсинга тушибди?!

– Секин! – шивирлади Нарзиқул овозини янайм пасайтириб. – Кўқдалага... Бедапояга ҳам...

Бозор бошини тиззаларига солинтирганича ўйга толди. Шу ўтиришида у «Нима қилмок керак? Қандоқ қилиб келгиндилар йўлини қирқиши мумкин?» деган жумбокка чора излаётгандек эди. Унга тикилиб ўтирган Нарзиқул худди Бозорнинг авзоидан айнан шу сўзларни уққандек сапчиб эмаклаб қолди, сўнг шу қадар тўрт оёқладики! – Бозор амакининг сичқондек сассиз-несиз ғизиллаб эмаклаб ғарам ёқасига бориб олганига ҳайрон бўлиб қараб қолди. Ҳайрат аралаш ичидан кулги келдию, чўчири.

– Нега қочаяпсиз?

– Кўй, Бозор, мени аралаштирма, ука, мени тинч кўй.

– Бери келинг-э, Нарзвой ака, – Нарзиқул пахта ғаррамининг ичига кириб кетгудек ғужанак бўлиб олган, овози ингичка, заиф ҳаста овозда «кўй-кўй» деганда эса ҳатто чийиллаётганга ўхшаб кетаверди.

Бозор амакининг таъсирига тушмаслик учун ҳам ўзини қўлга олди, атайин ўдағайлади у, бироқ ясама зардаси кўпга етмай шу заҳоти юмшади: – Ўшалардан бўлак ташвишимиз йўқми? Келинг, ишимизни қилайлик.

Бу гапни эшитган Нарзиқул бошини кўтарди, бўйинни чўзиб атрофга аланглади – қулогини динг қилганча яrim-ёрти қад ростлади-да, икки қўллаб паншахани чан-

галлади, сўнг Бозорга орқа ўгириб паншахани пахтага санчганча тек туриб қолди.

Кўрқанга қўша кўринмайдими – Бозорниң тасаввуринда дунёдаги энг кўркоқ жондор – сичқоннинг сураги гавдаланаверди. Ғарам усти чала ёруғ-чала қоронги, чеккада қаддини дол қилиб тескари ўгирилиб турган амакининг кўлагаси орқа оёкларида тик турган улкан сичқонга, кериб турган оёклари орасида қорайиб кўринаётган паншаханинг ёғоч дастаси эса одам бўйи баравар сичқоннинг узун думига ўхшаб кетди.

Бозор кўзини юмди – тасаввуридаги сичқон каталаша бошлади – кўзини очди: сичқон ҳамон тош қотиб тураверди, қайтиб кўзини юмишга юраги бетламай беҳол-бемажол қад ростлади, паншахани судраб ғарамнинг нариги чеккасига борди-да, ўйга ботиб туриб қолди... чала ёруғ-чала қоронги ғарам тепасида икки кўлага узун думини чўзганча икки улкан сичқон янглиғ қаққайиб туришар эди... Орадан хийла фурсат ўтди, қоронғи куюқлашди, завод ҳовлисидағи чироқлар ёқилди. Ғарам тепасидаги икки киши худди аразлашган-дек бир-бирларига яқинлашмас, узокдан-да гаплашмаётган эдилар. Иттифоқо Бозор амакига қамти келдию, гўё оддий нарсани суриштираётгандай, «Кўшни қишлоққа ҳам ўшалар тушибдими?» – деб савол қотди. «Билмасам» деди Нарзиқул елка қисиб. Бозор учиб келгичлардан кўрқяптими ёки одамлардаги ялпи кўркувдан юрак олдириб кўйдими – шунга ақли етмаётган эди. У шеригини хуркитиб юбормаслик муддаосида атайнин кишибилмас сўради: «Улардан нималарни суриштираётган экан?» Нарзиқул амаки паншахани оёқ остига суқиб дастасига биқини билан суянди. Ва бўшашиб: «Ҳаммаёқда бир томоша, Бозор – савол устига савол...» деди. Бозор хайронланиб елка қисди.

– Куласан-а, Бозор... – деди Нарзиқул ёвқараш қилиб. Бозор амакининг яноғи асабий пириллаб учайтганини кўрди.

– Тушунолмаяпман, амак, ақлим етмаётганидан кул-япман... Хўп, сўрайяпти – нима кипти?.. Оддий, жўн саволлар-ку бари!.. Кўчада бирорминан суҳбатлашганда

шунчаки сўраладиган гаплар-ку!.. Сўраса жавоб бераверамиз, вассалом!.. А, сўрамаган нарсасини айтмасангиз бас-да!..

Нарзиқул қўпол гавдасига ярашмаган бир ҳадик билан атрофга ўтринча алланглади ва пахта ёяётган бўлиб турди-да, бирдан «ўтири» деб имо қилди. Бозор чўк тушди.

– Ўлай агар, Бозор, атай айтмадим, – деди Нарзиқул қасам ичаётгандек кекирдагини чўзиб.

– Нимани? – тушунмай сўради Бозор.

– Ўшанда-да! – ҳамон бўйинни чўзиб гапирди Нарзиқул. – Сўрамаяптию, мен айтяпман... Валдираяпману, оғзимдан тўкилаётган сўзни тутолмаяпман, де!..

– Кўрқдингиз-да, амак.

– Дам кўрқдим, ёмон кўрқдим, ука – жоним оғзимдан чиқиб кетаёзди, укажон!.. Кейин, дам-бадам кўрқмай қолдим... Шунисига ҳайронман...

– Ўзи, улар келган замони одамми кўрқмайдиган кип қўяди, – бамайлихотир тушунтиришга киришди Бозор.

– Ёпирай-а!.. – ёқасини чангллади Нарзиқул. – Қандоқ қиласиди буни?

– «Биз сизларга ёрдам учун келяпмиз», дегани сеҳрлаб қўяяпти чоғимда, – елка қисди Бозор. – Ёки бошқа ҳунари борми... Кўшни қишлоқларда одамлар кўрқмадими? Безиёнми, ишқилиб?

– Безиёнмиш... Найкейин... Кўқдаланинг кунчиқари-даги дарё ўзанига қўналға қурганмиш!.. Самолётини ўшатга кўндираётганмиш!.. Одамлар кўрибди!..

– Тўпалонсойга денг!..

– Тўпалонсойга...

Бозор бу миш-мишга мутлақо ишонмаса-да, иккиланиб туриб мийифида кулди. Амакини синовчан кузатди.

– Жа, одамлар тўқиб ташлайди-да... Шов-шув кўтарилимаганига ҳайронман.

– Шов-шув кўтаргани қўядими, Бозор? Оқсоқолнинг ёзганини эшийтдинг-ку, ўзинг. Одамлар нафасини ичига ютиб юрибди. Ичига ютолмаганлар пана-панада билганидан қомаяпти. Одамлар оғзини тикиб қўярмиди, Бозор, Оқсоқол...

– Анавилар ўзини суриштираётганини эшитса нима қиласкин? – деб юборди бехосдан Бозор.

– Кимни?

– Оқсоқолни.

– Оқсоқолни?!

Нарзикул Бозорнинг афтига анграйди, башараси қийшайиб ғўлдиради:

– Нима дединг? Кимни сўраган дединг?

– Оқсоқолни сўради, деяпман, амак! Намунча...

– Қачон?!

– Ўша куни.

– Қай маҳал сўради, Бозор?

– Сиз тепага чиқмасдан бурун.

– Тавба-а! – Нарзикул бошини чангллаганича мункиб кетди. Ва бошини кўтармай инграгандай сўради: – Оқсоқолни қаттан танийдикан улар?

– Қайдам...

– Ўз панохингда асрагин, худойим!.. Нима деди?!

Нима деб сўради? Тушунтириб айтсангчи, палакат! Б... еб таранг қиляпсанми, латта?!

Бозор ўрнидан туриб кетди. Унинг кўзлари олайиб қалт-қалт титраётган қўлларига чанглаб олган паншахани амакига ўқталди.

– Нима дединг?! Қорнингни ёриб ташлайман, мол!

Нарзикулнинг ўтакаси ёрилди. Тили калимага келмай дудукланди.

– Идорада индамадимда?! Касофат бўлдимми, ҳали?!. Палакат бўлдимми, ҳали?!. Раҳматовингга қўшиб абжағингни чиқараман, молфаҳм! Кўрсатиб қўяман, ким латталигини!..

Нарзикул дод солмоқчи эди, овози чиқмади, Бозорнинг важоҳатини кўриб тиззалири букилди, дағ-дағ қалтираб ийғламсираб ёлборишига ўтди:

– Боланг кўпайсин, Бозор... Илойим, келин эсон-омон кутулсин, Бозор!.. Мен... Ўзим...

Бозор қандай «пов» этиб аланга олган бўлса шундай тезликда сўнди, бўشاшиб, паншаха қўлидан тушиб кетди, бехоллашиб чўк тушса-да, бояги ғазаби мақомига яраша сўради:

– Оқсоқолнинг топшириғини бажарганимисиз?

Нарзиқулнинг нафаси ичига тушиб кетди. Ўлдираб савол қотмоқчи эди, оғзидан чикқан сўзга ўзи ҳам тушунмади.

– Оқсоқолнинг топшириғини бажарганимисан, деб сўраяпти улар... Сиздан ҳам, ҳаммадан сўрайди...

Амаки турган жойида пахта ғарами орасига чўка бошлади, сўнг қўл-оёғи тимирскиланди. Бозор яна бир оз кузатиб турса Нарзиқулни пахта ғарами ютиб юборадигандек эди.

– Ҳа, – деди Бозор унга жон бағишлиш умидида.

– Аминвой... Аминвойга айтиш керак, Бозор... Тез!..

У ҳаракат қиласпти...

– Қандай ҳаракат?

– Юқоридаги акаларди ишга соламиз, дебди...

– Қачон дебди?

– Бугун.

– Бугун? Қаерда?!

– Боя уйдан чақиртириб олди... Анча гаплашди...

– Сизними?.. Сизминан гаплашдими?!

Нарзиқул жим турди-да, сўнг бош ирғаб қўйиб:

– Бозор, бу ёғи нима бўлади, бошим қотти, ука...

Бозор бир қўзғалиб жойлашиб ўтириди-да, амакини қистовга олди:

– Аминвой ака нима деди? Сиз минан нималарни гаплашди? Айтинг, амак? – саволларни қаторлаштириди ҳовлиқиб. Чамаси у учар келгиндишлардан чўчиганда ҳам бу қадар шошқалоқламаган эди.

Нарзиқул Бозорнинг ҳовлиқишини лоқайд кузатиб туриб, беҳоллана бошлади.

– Ҳа? – деди Бозор амакининг кўлини силтаб. – Жоннингиз чиқиб кетдими? Гапирсангиз-чи!

Нарзиқул йиғлаб юборишдан ўзини базур тийиб турган боладек лабини қимтиб жим бўлиб қолди. У бир нимани эслашга урингандай рўпарасидаги кенжা ўғли тенги йигитга умидвор тикилди. Бирмунча муддат шу аҳволда тургач, кутилмаганда савол қотди:

– Овозинг мулојимлашиб қолибдими?

Бозор амакининг бу лукмасига эътибор қилмади. Шу

топда унинг фикр-хаёли Аминвой акага кетган, у киши хақидаги янгиликни эшитишга муҳтож эди.

– Гапиринг, дедим, амаки, – деди у хуноби ортиб. – Гапни чалғитиб нима қиласиз, гапирмайсизми?!

Нарзиқул амаки гапирмади, балки қуруққина саволга ўтди:

– Оқсоқолни сўраган бўлса... сен нима дединг?

Бозор кулиб юборди. У Оқсоқолга ҳаётда рўпара келмаганини, уни танимаслигини, заводга яқинда ишга жойлашганини, шу боис на Оқсоқолдан, на келгинди махлуқлардан қўркадиган жойи йўқлигини айтмоқчи – тўкиб солмоқчи эди ҳаммасини, оғзини жуфтлаган ҳам эдики, ғарамнинг ёнгинасида кимдир қаттиқ ҳуштак чалди. Бозор билан Нарзиқул тарракдек қотиб қолишиди. Амаки қўрқанидан Бозорнинг билагига ёпишди, Бозорнинг мушаклари ўйнаб турадиган билаклари эса одатдагига хилоф равишда жонсиздек қалтиради.

Яна ҳуштак чалинди. Нарзиқул амаки йиртқич күшнинг тажовузидан яширинаётган ўрдак мисоли мук тушиб калласини ғарам орасига суқди.

– Бозор! – овоз келди ҳуштак чалинган томондан.

Бозор ўша томонга қараб эмаклади, сўнг базўр ярим-ёрти қад ростлаб букчайганча йўргалаб ғарам ёқасига келди.

– Аминвой акам чақиробди, юр...

Бозор разм солиб қаради, лекин кўлаганинг кимлигини танимади...

13

Ойсиз, юлдузсиз, рутубатли тун эди. Этни жунжиктирадиган совуқ шамолда кунчиқар томон оқиб бораётган адоксиз қора булат уюрлари разм солиб қарагандагина кўзга элас-элас чалинади.

Бозор пахтали камзулига ўраниб завод дарвозасидан чиқдию, трактор ва хайбатли юк машиналар ўтавериб ўйдим-чукур қилиб ташлаган тош йўлда этигини дўқирлатиб судраб катта кўча томон юрди. У Аминвой акасининг исмими эшитганда қувониб кетди, кун бўйи ўзи излаган чоғидаги шашти-шиддати қонини яна қайта

гутириди, қони гутирию, ҳозироқ бориб Аминвой билан очикчасига гаплашиб олишни дилига тугди... бироқ катта йўлга яқинлашгани сайн – қадам-бақадам шаштидан тушаверди...

Аминвой Нарзикулни чақиритириб у билан гаплашибдими, демак, унинг ўзи ҳаракатга тушган. Айтиби-ю, юқоридагиларга етказаман, бирлашиб чорасини топамиз дебди. Бундан чиқди, гуппи амакка, «Оғзингга маҳкам бўл» деган, Бозорга тайинлаган гапни унинг ўзи бажарган, демак, Аминвойнинг пайтавасига курт тушган!.. Энди Бозорни тун коронғисида овлоқда чақиритирибди, демак, заводга киришга кўрққан. Демак... яна нима деркин?.. Нарзиулга айтганини такрорлади, шу. «Анавиларга яна рўпара келсанг алжима», «Сўрамаганини вайсама» дейди, холос. Лекин «Кўнглингдан кечганини улар эшитаверар экан», деган гапга нима чора топади, Аминвой?.. Бу ёғи Бозорга қоронғи, ҳа, шу топдаги тун зулматидан-да қоронғироқ эди...

Бозор йўл ёқасида саф тортган тут дарахтлари бикинига тумшук суқиб тўхтаган «Жигули»ни танимай «Аминвой ака бирортасининг мосинида келгандир» деб хаёлланди. У «Жигули» ёнига яқинлашганда ҳайдовчи ойнани икки энлик тушириб «Орқага ўтири» деб имо қилди. Нотаниш башара ва сирли имо Бозорнинг ҳайронлигини баттар оширди. Шунга қарамай «Аминвой ака орқа ўриндиқда» деган ўйда орқа эшикни шарт очиб ўзини ичкари урди. Урди-ю, қоронғида ўриндиқ бўшлигини фахмлаб улгурмай, «Жигули» «ғирр» этиб жойидан кўзғалди. Бозор индамади, шофёр пешонасидаги ойнадан кўз кирини ташлаганида у овозини кўтармай «Қаёққа?» деб сўради. Шофёрдан садо чиқмади, бунинг устига «Жигули»нинг чироклари ёқилмаган – тим қоронғи йўлда тўпдан отилган тошдек гувиллаб бораётган эди. «Демак!..» Бозор ичида шундай дедиу, ўйлолмай қолди, фикрини жамлагунича мосин Кўқдала томон кетаётганини пайқади. Туйкус Нарзикул амакининг айтганини эслади: «Кўқдала кунботаридаги дарё ўзанида... Тўполонсойда... «Демак!..» Бозор ҳозиргина «Қаёққа?» деганда товуши одатдагидан хийла ингич-

ка эшитилгандек туюлди. Ҳайрон бўлди. «Амаки ҳам овозинг мулойимлашиб қолибдими?» деди. Демак... «Шамоллаганим йўқ шекилли?..» Бозор овоз чиқармок ниятида атайнин шофёрга гап қотди: «Кўқдалага боряпмизми?» Сўрашга сўрадиу, овози ўзгарганми-йўқми фаҳмлолмади. Шофёр жавоб қайтармаганига аламини ичига ютиб турганди ҳамки, «Жигули» кескин бурилиб Бедапоя томон ғизиллади. «Бедапояда нима қиласиз?» – қўнглидан кечди унинг ва муддао не эканини билолмай ичидан титроқ турди, шу заҳоти оғзига келган гапни ўзи эшитадиган қилиб шивирлади – «Нимадан кўрқаман!.. Онамнинг, хотинимнинг олдига соғ қайтсан бўлди-да!.. Кўрқадиган жойим йўқ! Йўқ!..» У ўзини вазмин тутишга уринди. «Булар ҳам одам-ку!.. Келгинди маҳлуқлар эмас-ку, ахир!» деб ўзига тасалли берди.

Рўпарадан пахта ортилган трактор йўлни тўзитиб ўтди, унинг чанг-тўзони тарқамай «Жигули» тут да-рахтлари панасига ёнбошини сукиб, такка тўхтади.

– Чик. Аnavи ердалар, – деди шофёр тилга кириб. Бозор мошиндан тушди. Кўярга кўз қуввати ожизлик қиладиган оёқ остига тикила-тикила муштдек-хандалақдек кесакларни босиб-нетиб ўн қадамлар юрганида Аминвой гуппининг қораси кўринди. Кўриндию, гуппидек одамни пахтали камзул кийган, бошини елкалари орасига тортиб пусиб турган қиёфада сира тасаввурига сифдиролмаганидан кўзларига ишонмай қадами сустлашди. Беихтиёр салом бериб, бўшашиб, кўришмоққа кўл чўзди.

– Салом-аликнинг вакти эмас, – тўнғиллади Аминвой.

Аминвой тўнини чаппа кийганини Бозор пайқади. Ылбоис гуппидан гап кутиб, ўзи «чурк» этмади.

– Эшитдингми? – сўради Аминвой совуқ ва палағда овозда.

– Нимани? – саволга савол билан жавоб берди Бозор.

– Нимани бўларди, ану келгиндиларинг ҳаммаёкни босиб кетди!.. Тўполонсойга уй-жой қуриб олибди. Одамларди бир бошдан сўроқ қилаётганмиш!

Бозорнинг кундузги чапақайлиги тутди.

– Бўлмағур миш-мишлар ҳаммаси! – деди у зарда аралаш. – Келгиндилар қуриб олган уй-жойни бирор кўрибдими? Ким бориб кепти уларнинг уйига?

– Хўп, сойликка имораг солмаса солмагандир, – деди бирдан шаштидан тушиб Аминвой. – Унда юртди бир бошдан сўроққа тутаётганига нима дейсан?!

Бозор ўйлануб қолди. «Эл-юртни бир бошдан чакиравурса, тутиб олиб сўроқ қиласурса... ваҳима қўпадику, одамлар орасида!..» Бозор осмонга анграйиб бошини қашиди, қоронгида Аминвой ўқрайиб қараётганини сезди.

– Буниси... бўлса бордир... – деди у бўшашиб.

– Обкетиб қолаётгани-чи?! – худди ҳамма ваҳиманинг гуноҳкорини тутиб олгандек дўқ урди гуппи.

– Демак... Кимди олиб кетибди?

– Обкетиб икки соат-уч соат тутиб туриб, сўнг қўйиб юбораётганиши!..

– Безиёнми? Шикаст етказмабдими, ишқилиб?

– Қанака одамсан-ей, Бозор?! А, бу, Кўқдалада иккитаси тентак бўп қопти... Бедапояга тушганини кўрган бир жувон қўркқанидан бола ташлабди! Уйланадиган йигитлар сийғоқ бўлиб қолаётганиши! Тағин безиёнми, дейсан! Тинмай сўраб-суринтириб одамларнинг ичидагисини, сир-асрорини билиб олаётгани қайси шикастдан кам? Миянгни ишлат, Бозор!.. Ё, қатиғингни ачитиб кетдими, ўшалар!.. – Аминвой Бозорнинг бошига муштини теккизиб ўдағайлaverди: – Ўзинг айтдинг-ку, дилингдаги гапни эшита оларкан, «айтмайман» деган гапингни айтмай туролмайдиган қип қўяркан – ҳаммани алжираидиган... ҳаммани ўзининг қўйругини ўзи очадиган қип қўйса – оқибатини ўйла, танангга, Бозор!..

Бозорнинг кўзи, кулоғи Аминвойда эса-да, хаёли Шабнамга кетди, «Кўркқанидан бола ташласа-я!» дедию, хуши бошидан учайди... «Бедапоялик жувон барвакт туғиб қўйган бўлса, Шабнамнинг ой-куни етганига уч ойдан ошяпти... на дард тутади, на...»

– Кўқдалани босибди!.. – Аминвой паст, лекин бўғилиб, жони ўрганиб галирганидан нафаси етмади,

худди шу онда тепаларидан баркаш учиб келадигандек хавотирда булутли осмонга аланглаб олди-да, пича хотиржамлашиб, гапида давом этди: – Бедапояни ёппасига сўроққа тутяпти!.. Раисси шофирини уйида тўй килаётган жойидан обкетиби!.. Буғалтириди онасининг жанозасига кўймай обкетган-ча, қайтмади дейишяпти!.. Хўш, эртага Пахтақайнарга ўтса нима қиласиз?.. Оқсоқолдан ҳам садо чиқадиганга ўхшамай қолли, тушуняпсанми, Бозор?! Бедапояликларга ўхшаб сичқоннинг инини ижара-га оламизми ё, биз ҳам?!

– Унда... пахта терими нима бўляяпти? – Ҳайрон бўлиб сўради Бозор.

– Пахтанинг тагида қоп кетсаям теравуради булар!.. Илло, ёшу қарининг юраги така-пука... Кўчада, далада зоф йўқ... Бугун бориб келдим. Бирорни тўхтатиб саломлашай десанг, афtingга қарамай қочяпти...

– Нуқул қуёнюракларнинг орасида қоп кетган эканмиз-да, ака?.. Намунча қўрқмаса, халқ?.. Нима, ҳамманинг тили бирдек қисиқми? Аллақандай келгинди маҳлуқларга жавоб-муомала қилолмаса, а, бу ёғи нима бўлади?.. – Аминвой ўзига тикилиб турганини кўрган Бозор дарҳол мавзуни ўзгартириди: – Оқсоқол хат ёзмабдими у ёқларга? Кеча у киши юборган хатни бизга ўқиб беришди.

Бозор шу гапни айтиб ўзининг Аминвойга сирдош эканлигини пеш қилиб қўймоқчидек эди, афтидан бу хабар Аминвой учун янгилик бўлмади, у бир нафас жим турди-да, энтикиб деди:

– Ўша хат деб манавинаقا биқиниб юрибмиз-да, жиян...

Аминвой гуппининг ниҳоят бўшашганини сезган ва фурсатдан фойдаланиб қолмоқни кўзлаган Бозор бир кур томоғини қириб олди-да, салмоқланиб гап бошлади:

– Аминвой ака!.. Бир маслаҳат-да... – У шундай деб атайнин кувлик билан жим бўлди. Қоронғи бўлса-да, хийласи зое кетмаганини сезди. – Бир гап: биз Оқсоқолдан кўрқишимиз керакми ё учар маҳлуқларданми? Қай бири хавфлироқ биз учун, ака?!

Чини билан айтганда саволни эшитиб Аминвой ҳайрону лол бўлди, хаёлига келган фикрни ошкор айт-

май, «Ха, гапиравер» деган мазмунда афтини Бозорнинг башарасига теккудек яқинлаштириди.

– Айтинг... – деди Бозор бамайлихотир.

Аминвой айтмади. Кўзини лўқ қилиб тураверди. Бозорнинг ўзи гапирди:

– Осмондан келгичлар қўнаётган бўлса... мишишларда жон бўлса, демак, мана, устма-уст тушаяпти деяпсиз... Ўзимиз кўрдик, гаплашдик... Оқсоқолнинг хатида, «Учар баркаш йўқ нарса, ким шов-шув кўтарса – чора кўрилсин» деб ёзилибди. Суриштириб келганда, мен Оқсоқолни танимасам-бilmасам... Келгинди маҳлукларни эса кўрдим-ку... Сўрайвериб хит қиворишини демаса, шахсан ўзим зиён-захмат кўрганим йўқ улардан... Сиз акалик қип турсангиз, заводда ишлаб турсам... Эрта-индин келинингиз кўзи ёрийди... Пича қаддимни тиклаб олай, кетаман...

Бозор гапини тугатмай, чамаси у, «Сиз акалик қип турсангиз» деган пайтда Аминвой ийиб кетган, шунинг таъсирида Бозорнинг елкасига қоқа туриб ёш ўғлига мактаб сабоғини тушунтираётган отадек энгашиб астойдил гапирди:

– Оқсоқол топилмас одам, Бозор, ука!.. Бунақаси ҳали онасидан түғилмаган!.. Хат ёзган бўлса – унақа хатни ҳар йили жўнатади... Кур-руқ паҳтани ўйладиган одам у. Паҳта бўлса, бас... одамлар чалғимасин деган – плонни дўндирсак, бу ёғиминан иши бўмайди. Бу ёғи ошиғимиз олчи, ука!.. Илло, терим қолиб, одамлар мишишга чалғиса Оқсоқолнинг фигони фалакка етади, Бозорбой! У одам ўлса-ўладики, ётиб қолса-қоладики, паҳтани тердирмай қўймайди!

– Фигони фалакка етганидан келгиндилар у кишини танир экан-да... – деди қарийб минфирилаб Бозор.

Аминвой қотиб қолди, «хап» этиб оғзини юмди. Кўзи олайиб, афти қийшайиб:

– Нима дединг? – дея сўради шошиб.

– Келгинди одамсимонлар Оқсоқолни таниганига ҳайрон қоллим, – пинагини бузмай деди Бозор.

– Нима, сўрадими?.. Қачон, нима деб сўради?!

– Шу... охирги сафар... завудга тушганда сўради.

- Кимдан?!
- Мендан.
- Айт-е, нима деб сўради? – ҳовлиққанидан оғзи кўпириб кетди Аминвойнинг. – «Оқсоқол» деб айтдими? Сен-чи?!

Гуппининг савол ёғдириши келгинди маҳлукларни кига ўхшаб кетганидан Бозорнинг кулгиси қистади. Лекин сир бой бермади.

- Шунчаки сўради. «Оқсоқолнинг топшириғини бажарганмисан?» деди...

Аминвой камзули киссаларига кўлларини мушт қилиб ботириб, худди ғужанак бўлиб ағдарилаётган одамдек қорнини чангаллаб қолди. Тиззаси букилди. Афти бужмайди.

- Қайтар! – деди у Бозорга қарамай.
- Нимани?
- Уларнинг саволини, қандок сўраганини?.. Сўзмасўз айт!
- «Оқсоқолнинг топшириғини бажарганмисан?» деди.
- Сен-чи?
- «Йўқ» дедим.
- У-чи?
- У... «Ўйлаб жавоб беряпсанми?» – деди.
- Сен-чи?
- Мен жавоб бергунча Нарзиқул чиқиб қолди ғарам устига. Кейин...

Аминвой бирор човига омбур солгандек бирдан буқчайди, сўнг икки қўллаб путини чангаллаганча беҳол инграб, чўккалади... Бозор «Нима гап?» деб сўрамоққа оғиз жуфтлаганида гуппидан садо чиқди:

- Тагимизга сув кетибди, бола...

Бозор тушунмади, нима қиласини билмай турганида гуппи қаддини ростлаб-ростламай тутнинг пастак шохлари орасига йўргалади.

– Безиён, дейсан, бола!.. – деганди, тишлари такиллаб кетди. – Шунчаки сўрайди, дейсан... Шунчаки сўраб туриб чунонам кўттариб урадики!.. Отимни бошқа кўяман, бола! Мени айтди, дерсан... Кўрасан, ҳали... Бор, Бозор,

жўна! Уйингга йўқол, бола!.. Қайтиб қорангни кўрсатма менга!.. Уқдингми!.. Мен сени танимайман, сен – мени!.. Уқдингми!.. Бор, уйингга, қури!..

Бозорнинг оёғи остидаги ер чайқалгандек бўлди. Аминвой безгак хуружига учрагандек тишлари шақиллаб гапираётганидан, унинг нима деяётганини англааб улгурмади. Кимсасиз зимистон оғушида ёлғиз қолгандек бўлди... «Жигули»нинг гуриллаб ўт олгани эштилди... Бозор турган жойида тарракдек қотди, оёғини силжи-толмай, оғзига келган калимани ғудранди. «Жигули» тўхтади. Эшик шараклаб очилиб, ундан гуппи отилиб чиқди. Қорнидан ўқ еган одамдек букчайганича югуриб келаётib йиқилай деди.

– Қулогингда бўлсин, бола! Тилингни тийиб юр!.. Қирқиб ташла, падар лаънати, ундақа тилди!.. Нарзикул хеббимга айтдим!.. Бутун Паҳтақайнар Оқсоқолнинг измида-ку, сўтак!.. «Ёрдам қиласиз» деб аллаган итдан туққанларга отангни сотасанлар. Қишлоғингни сотасанлар, мишиқилар!..

Аминвой шундай деб изига қайтди. Қайтдию, икки қадам ташламай орқасига ўгирилди.

– Келса, – деди қўлини осмонга чўзиб. – Уйдан чиқма, ёт, ўликдай ёт, кимирлама! Ернинг остига бўлсаям йўқол!.. Йўқол, мениям, уларният кўзига кўринма!.. Э, ҳаммангни онангни кўшиб!..

Бозор тилини ютиб юборганди – чурқ этмади. Аминвой гуппи мошинга ўтирди. «Жигули» кўздан ғойиб бўлди...

14

Одамзоднинг лойи қаноатсизлик тупроғидан қорилган. Аллоҳ субҳанаҳу ва таоло зуваламизни маромига етказиб пишитиб улгурмай тоқатсизлик қилганимиз – уни шоширғанмиз, андак сабр-қаноатга чакирган яратгувчилизнинг кудратига лоақал шукронга айтишни унутиб, «Қолганини ўзим эплайман!», деганимуз Парвардигорнинг муборак устахонасини ҳовлиқиб тарқ этганимиз. Бу ёруғ дунёнинг жамики заҳматларини ўз кудратимиз, ақлу фаросатимиз ила бартараф этадигандек... Бизнинг имконият хорижимиизда заррача малоллигу мало-

мат қолмагандек... Оқилу донишлиқда ҳеч бир күмакка мұхтожлигимиз йўқдек...

Сув ва тупроғимиз комилу мукаммал муруват мұйжизаси ила яралғанлигидан, аъзои баданимиз муборак күз нурига чўмилғанлигидан танимиз соғ, кўзимиз очиқ экан, биз уддасидан чиколмайдиган бирор мушкулот дунёда йўқдек туюлади. Ана шунда... омаднинг равон кўчасида елиб бораётган оёғимизга нўхатдек тош ботса... енгимиз тирноқча михга илинса... ногаҳон зулмат оғушида ёлғизлансанак ожиз қалбимиз бирор мададкор истаб қолади...

Қиз оила кўрганида бир чеккаси англабми-англамай умрлик ҳамроҳ, суюнчиқ топганига шукроналар ўқийди, унинг умр йўлдоши – йигит бўлмиш кимнингдир мадаррагбатида оила қурари... Ҳадемай у нафақат хотинининг, насиб этса жажжи фарзандининг суюнчиғига айланади... Турмушнинг машаққатли дамларида эрни кимдир кўллайди, зеро, у ҳам кимгадир ишонади – Шабнам Бозорга, Бозор Аминвойга, Аминвой Давлатовга, Давлатов Раҳматовга, Раҳматов аллакимга, аллаким яна аллақаёқдаги аллакимларга ишонгандек ишонади... Бу ишонч меҳр-оқибат кўринишида давом этаверади... «Одам одам билан тирик», «Одамнинг тафтини одам олади» деганларидек... «Бирорта суюнчиғинг бўлмаса бу дунёда кун кўролмайсан» дея арzon-гаров ҳикматлар тўқилади, сўнг...

Сенинг кифтингга тушадиган турмуш ташвишларию, тақдир мушкулотларига елка тутишадиганларинг бисёрлигига ошиғинг олчи – дўппинг яримта... кўлинг чўзган жойингга етадигандек эрка-тантиқ бўлиб юрасан. Яқин-йироқдаги суюнчиқларинг боис дунёни сув босишидан ҳам чўчимайсан гўё!.. Ажойиб кунлар адоксиздек туюлган кезлар иттифоқо осмондаги ойни тусайди кўнгил – шундай орзуинг ижобатига яна суюнчиғинг – ўзи, ўзи бўлмаса унинг суюнчиғи, суюнчиғининг суюнчиғи – ҳамма суюнчиқлар бир бўлиб Оймоманинг этагидан ип солиб, оёғинг остига тортиб туширадигандек туюлади гўё!.. Ва новзан биллоҳим, ана шундай яйдоқ хаёллар қанотида оёқ ер искамай юрганда ногаҳон бир арзимас бу нимадир юз беради... Айтишга-да, ёзишга-да арзимас бу

ходиса, масалан, ўзга сайёралик бир тоифа жондор Ерга кўниш ҳавосини олиб, сенга рўпара келади – саволларга тутади... Гўдакларга хос сўнгсиз ва бир хил, жўн ва арзимас туюлган саволлар кунбўйи бош кўтармай ароқхўрлик қилгандай ҳолатга солади сени... кунинг шундай саволларга қоладики, уларга ҳеч қандай кудратли суюнчикинг жавоб беролмайди, балки саволларга факат ва факат ўзинг, танҳо ўзинг жавоб беришингга тўғри келади ва ё, тавбалар бўлсинким, ё, алҳазар!.. энг оддий саволларга жавобинг йўклигини ёхуд энг оддий саволлар олдида гангид қолаётганингни англайсан... кўнглинг беҳузур бўлади, кўз олдингга хира парда тортилади... Ер гўё чоққина курсию, баногоҳ бирор уни остингдан тортиб олгандай чайқалиб кетасан – еру осмон, тош йўлу йўл ёқасида қорайиб саф тортган тут дарахтлари чаппости бўлиб, чирпирак бўлиб айланади... қопқонга тушган сичқондек умуртқанг аралаш қовурғаларинг қарсилаб синади, оғзингдан қуюқ қон аралаш жонинг чиқиб кетади... жон таслим қилганингни англааб тақдирга тан бериб улгурмасингдан оёғингда эмас, бошингда турганингни пайқагандек бўласан – миянгга паҳта майдонининг муштдек-муштдек кесаклари ботади, калланг зирқирайди, суюкларинг симиллайди – оёққа турмоққа, ўнгланиб олмоққа чандон уринасан – чангакка айланниб тут танасига чирмашган панжаларингни бўшатишдан кўрқасан, ажал вахимаси исканжасида қоласан... ичинг ағдарилиб бўғзингга тиқилади, тиқилаверади. Калланг «поқ» этиб икки паллага ажрай дейди, мажолсизликдан, иложисизликдан хаста тармашган жонингни тақдир ихтиёрига топширасан, ана шунда зувалангда комиллигу мукаммаллик томизғиси борлиги аскотади – сени оёққа кўйиш учун бутун борлиқ чир айланади, «Хайрият!» дея дилинг равшан тортади, қаддингни ғоз тутишга чиранасан, мувозанат сақлашингда аскотган дарахтни кўйиб юборгинг келади... бандай ғофилсан-да! – Еру Осмон азбаройи бу шаккоклийка тоқат қиломайди – боягиндан кўра қаттикроқ чириллаб айланади – оёғинг каерда, бошинг қаерда – фарқига етмай қоласан... яккаю ёлғиз ишонганинг – суюнган суюнчиғинг тут дарахтига файришуурый бир ёввойи шиддат-ла ёпишасан – тирно-

финг, бармоғинг, кафтиңг, кўлу билагинг ачишиб зирки-райди... Ишонган сұянчикларингнинг бари-барчаси иккى чақалик нафи қолмайди, уларни унутасан, одамга – бандага эмас, энди жонинг кўзингга кўринган чоғда дарахт эмас, хасу хазонга-да, бир бўлак кесакка-да тар-машасан... тавалло қиласан, тавбалар қиласан... Оёғинг остидаги Еру Заминни курсидек юлқиб олган кўринмас куч-кудрат пойида топинишга ошиқасан, шошқин жа-воблар топишга уринасан, надоматлар бўлсинким, шошгандা жавоблар эмас, бир оғиз лаббай топилмайди... Одам Атонинг қодиру кабир яратгучимиз устахонасидаги тоқатсизлиги эвазига ҳар бандаи зот ўз азоб-уқубатлари билан шу қабилда товон тўлайди... бу чирпирак олам-нинг тиним билмас чархи итқитиб ташламаслиги учун тавбангта таянасан... ғойибдан саволлар ёғилади: ким-сан?.. раббинг ким?.. имонинг?.. инсофинг?.. карамингу кароматинг?.. Саволлар манглайнингга бамисоли гур-зидек зарб билан, устма-уст тушади, ҳар сафар ихрай-сан, инграйсан, саволларга муносиб жавоблар топишга уринасан, «Одам умр бўйи саволларга жавоб тайёрла-моги керак»... «Ҳар ким ўзига берилган саволга ёлғиз ўзи жавоб қилгусидир»... «Умринг мобайнидаги ама-линг – жавобингдир...» Хотирингда жонланган бу ҳик-матларга амал излайсан... дарахт – сен жон нисор қилиб турган тут дарахти қаттиқ силкинади... шира боғлаб чирт юмилган қабоқларингни йиртиб очмоқчи, да-рахтни тутиб турган, қоп-қора қонга беланган кўлла-рингга, дарахтнинг сендан-да мўйсафидроқ, сендан-да донишроқ бужур танасига карамоқчи бўласан – қараб улгурмайсан – дарахт тупроғу заминдан кўпорилиб чиқа бошлайди!.. Дарахтни шохларидан тутиб-кўтариб кетаётган қудрат эгасини аланглаб кўрмок истайсан... уринишларингни элас-элас англаб идрок эта бошлаган замонинг чалажон жисмингни дарахтга ташлайсан... дарахтга канадек ёпишасан... дарахт эса сендан қоча-ди – кўлларингдан сирғалиб чиқиб кета бошлайди!.. Билагинг, тирсакларинг қонга беланади, жон талваса-сида тишлаб олгансан чоғи, лабингдан тиркираб қон отилади – сен қонга парво қилмайсан – жаҳаннамга кулаётган одам оёғи шикастланишидан чўчимайди! –

дам безабон шилимшиқ қуртдек, дам қўрқокликдан яралган сичқондек дарахтга тармашасан, дарахт эса чангалингдан, кучоғингдан сирғалиб чиқиб, ҳавога кўтарилади, сўнгги умид-илинжда унинг илдизига тармашмоқчи бўласан, шунда... шунда... ақл бовар қилмас ҳолатта дуч келасан – сен ишонган, танҳо ишончинг-суюнчиғинг – тут илдизсиз эди!.. Шу чоққа до-вур илдизсиз дарахтга суюнганингни, илдизсиз тана-га ихлос қўйганингни англаб етасан... нафсониятинг, иззат-нафсинг ўртанади... Эмган сутинг хом эканидан, йўқ, ҳеч бир инсон боласи онасининг сутини пиши-риб ичмаган! – хом сут эмганингни унутганингдан, Ер юзида ўзингни мутлақ комил ва қодир жондор санаб юрганингдан, қўлларинг истаган юлдузга етгудек кибр-ланганингдан, вақти етиб арзимас бир кемтиклик олди-да ҳушингни йўқотишинг ҳеч гап эмаслигини – ожиз, нотавон банда эканингни лоақал ўйлаб кўрмаганингдан ададсиз афсус-надоматлар чекасан... Сим-сим қоронғида ёлғиз ташлаб кетишганига фахм-фаросатинг етмай катта тош йўл қолиб ўзингни ўйдим-чуқур, паст-баланд пах-тазорга урганингдан лолу ҳайрон бораверасан... оёғинг ости қора булатлар қоплаган осмон янглиғ зулматга бурканган – «йилт» этган шуъла кўринмайди, лоақал манглайнингни «тақ» этиб урага арзирли девор топол-майсан... баҳоли қудрат умргузаронлик қилган болалик, ўсмирлик сўқмоқларини кўмсайсан, мушфиқ волиданг, умр йўлдошинг бирлан кўлни кўлга бериб боради-ган – ҳам уқубатли, ҳам ҳузурбахш факирона сўқмоққа қайтишни кўмсайсан... Йўқ ердаги таҳликалар гирдо-бига ғарқ бўлаётганинг – ўзингни шу йўлга гирифтор қилганинг аламидан бошингга муштлайсан... шу пайт зулмат чулғаган зимиston осмон қаъридан учар бар-кашнинг ажабтовур, лекин жонга ғулув солувчи гувири эшитилиб қолишидан чўчиб бирон паноҳ истаб жуфтак-ни ростлаш пайига тушасан... Бошпана топиб улгурма-сингдан – Аминвой айтаверади: «Ернинг остига кириб бўлсаям кўздан йўқол!» – дейиш осон!.. рўпарангда ҳушқомат ёхуд дароз келгинди пайдо бўлиши ҳеч гап эмаслигини тасаввур қилиб юрагинг орқангга тортади,

ажал таъқибидан халос бўлмоқчилик иланг-биланг йўл соласан... уйингга етиб олишни, дарвозадан кирибоқ уни гумогурс тамбалашни, сўнг кўрпа-тўшакни қўлтиқлаб хотининг билан этақдаги онангнинг уйига кириб олишни – у ердаги эшик-деразаларни тақа-тақ зичлаб, қалин пардаларни тушириб... жон саклаш, анавилар келиб чакиргудай бўлса миқ этмай ётаверишни дилингга тугасан – шу мўлжалда югарасан-юргилайсан, қоқиласан-суқиласан... эмаклайсан-судраласан... чақалоқнинг бошидек-бошидек кесаклар орасидан паноҳ истайсан, думи узилган калтакесак янглиғ ўзингни урага туйнук тополмай ўрмалайсан... кесаклар ва ғўза қаторлари орасидан эмаклаб чиқаётib бетларинг, кафting, тирсаклaring, тиззаларинг шилинади... Инсон таъқибидан жон сакламоқ таҳликасида орқа-олдига қарамай қочаётган йиртқичдек кўзларинг қонталаш, тилинг осилган – ҳарс-ҳарс нафас оласан... қаддингни ростламокқа уринасан – белингга оғриқ туриб инграб юборасан – оёқларинг жонсиздек – узилиб қолаётгандек ортингдан базур судралади... сўнгги дақиқада худо сенга раво кўрган тинч, осуда йўлга қайтиш илинжида узр сўраётгандек, тазарру қилаётгандек инграйсан-ингранасан – тавбалар бўлсинким, инграпшларинг қопқонга тушган сичқоннинг сўнгги бор чийиллашига ўхшаб кетади – ўзинг буни сезмайсан, негаки, вужудинг, вужудингни эмас, бутун ёруғ дунё кўркувга лиммо-лим тўлган, бинобарин қулоғинг, шууринг зимистон оғушидаги сарҳадсиз далани тутган юрак дупури остида том битган бўлади, Бозор!..

15

Хайрият, Бозор уйига эсон-омон етиб келди. У шунчалик тез юрдики, оёғидаги этикнинг оғирлигини ҳам, устидаги паҳтали камзулнинг бесўнақайлигини ҳам, йўлнинг зим-зиё қоронғилигини ҳам пайқамади. Фақат деворнинг нураган жойидан «клип» этиб ошиб ҳовлига тушди-да, бориб дарвозанинг танбасини ушлаб кўздан кечираётганида қўллари қалт-қалт титраётганини, аъзои бадани жиққа терга ботганини, бирдан музлаб совқотаётганини сезди. Фақат буни ўйлаб ўтирадиган

фурсати эмаслигини яхши билганидан этигини дўпирлатмасликка уриниб, айвон ёқасига борди – ҳа, Аминвой гуппи қолдириб кетган жойдан уйига кела-келгучида этигини дўпирлатмаслик учун панжаларини чангак қилиб йўл босган – шундан пайтаваси йиғилиб кетган шекилли, иккала оёғининг юзи жазиллаб ачишаётганди – айвон чироғини шошиб ўчирди – «Ахир, ёп-ёруғ уй тўппа-тўғри нишон-ку, уларга... кўради, адашмайнетмай топиб келавуради» деб кўнглидан ўтказди у – уйга кирди, этигини ичкарига ечиб чироқни ёқмай қоронғида пайпасланиб тахмондан кўрпа олаётганида ташқаридан оёқ шарпаси келди. Бозор иккала қўлини билагигача кўрпа орасига суккан кўйи шамдек қотди – бошини даст буриб ортига қаради, «Эшикни қулфламабман!» – деди аламдан лабини тишлаб. Шу пайт ҳовли томондан «Бозор ака!» деб чақирди хавотирли овозда Шабнам. Чақирдию, айвоннинг чироғини ёқди. Ухлаб ётгану, бирдан кўзи қамашиб кетгандек:

– Ёқма, ўчир! – деб жон ҳолатда ичкаридан ўшқирди Бозор.

– Вой, нега-а? – Шабнам шундай деб уйга шошиб кирдию, қоронғида оёқ остидаги этиккачувалашиб ётган пайтавага қоқилиб юз тубан йиқилаёзди.

Бозор бунга эътибор қилмади. Аксинча, шивирлаб дўқ урди:

– Уйқусирайпсанми?! Ўчир, дедим!

– Қаттасиз? – деди Шабнам йиғламсираб чироқ тугмаси томон бораётиб. – Энам ўчирманлар деганлар-ку... Ёруғ бўўп туриши керак...

Энаси шундай деган, тўғри, ҳатто Бозор билан Шабнамнинг ёдидан кўтарилганида атайлаб неча марта айвоннинг чироғини ёқиб кетган, қишлоқда чироқ ўчгудай бўлса зудлик билан лампа шишаларнинг барини ёқиб кўйган.

Коронғига кўзи кўниккан Шабнам эрининг тахмона қапишиб турганини кўрдию, кулиб юборай деди. Ваҳимага тушиб тез-тез юриб келиб эрига ёпишди.

– Нима киляпсиз? Нима бор этта? – деб сўради. Сўрадиую, жавобини кутмай ҳайқириб юборди: – Ву-

уй!... Нима, чўмилдингизми?! Вой, ўлай-й!.. Қатта мунча терладийиз?!

Шабнам талвасага тушгудай шошқалоқлашиб эрининг дам сочини, дам елкалари, кўксини, юз-кўзларини пайпаслаб чиқди. Бу орада хавотири хийла ариган Бозор ўзининг аҳволи нақадар аянчи-кулгили эканини фаҳмлаб хушини жамлашга уринса-да, кўнглидаги асл муддаони яширолмади.

– Кўрпа олаётгандим... – деди у қуруқкина қилиб. – Оббориб онамнинг уйида ётмоқчиман...

– Вой!.. Сизга нима бўлли, Бозор ака? Ўйлаб гапиряпсизми?

Шабнам эрининг мақсади жиддийлигини ҳам, унинг ҳазиллашаётган-ҳазиллашмаётганини ҳам фарқлай олмади.

Бозор тахмондан нари кетди. Хотинининг: «Ювиниб олмайсизми?» деган сўроғига, «Бугун кўп ишламадик», деб жавобни қисқа қилди-да, Шабнамга, «Айвоннинг чироғини ўчир, ҳозир тонг отади», деди ғудраниб.

Шабнам айвоннинг чироғини ўчириб қайтди. Қайтиб уйга кирдию, ўқчиб юборди – инқиллаб-синқиллаб ёнбошига энкайганича пайтавани этикка тиқиб айвонга чиқарди. Ётоқ бўлмасига кириб олган Бозор ичкаридан, «Чироқни ёқма, эшикни ёп», деб кўрсатма берди. Шабнам эрининг амрига сўзсиз бўйсунди. Одатда Бозор бу тахлит кеч қайтганида ортиқча гапирмас, хотинининг пўрсиллаб шишган бетлари, лабларидан ўтич олиб, дўмпайган қорнини силаб, «ўғилча»сини эркалар, сўнг чарчаб ўзини ўринга ташлардию, донг қотарди. Шабнам эрини сира бугунгидай ахволда кўрмаганди – унинг шундайига ҳам күш уйкуси ўчган, эри ишдан қайтганига – қайнонасининг ёнидан туриб жойига келиб бемалол ётганига енгил тортиш ўрнига хавотири орта бораётганига тушунолмаётган, негадир чироқни ёккиси, эрининг ранг-рўйига разм солиб қарагиси, гап нимада эканини билгиси келаверди.

– Эшикни зичладингми? – сўради Бозор ётоқ бўлмасига кирган заҳоти. – Деразапардан торт!..

Шабнам ётса, турса, юрса хаёли бир нарса билан банд – омон-эсон енгиллашиш, хаёлига шундан бўлак

хеч нарса сифмас, ҳатто ой-куни яқинлашгани сайин яхши ниятлар билан жажжи-жажжи кўйлакчалар, ширин-ширин қалпоқчалар тикаётган бўлса, энди юрагига ўшалар ҳам сифмаётган, ўзинигина эмас, ота-онаси, қайнонаси, эрини қийнаб юборган гумонасининг туғила қолмаётганига дарди дунёси зим-зиё тундек коронги эди. Мана, энди, шу топда эрининг пўписа аралаш зардасига эътибор килдию, «Эrim тағин келгиндиларнинг қўлига тушган!» деган гап хаёлидан яшиндек ловуллаб ўтиб, қаттиқ қўркиб кетди.

– Овозингиз ғалати чиқяпти-я! – деди у хавотирланаб. Бозор жавоб бермади. Шабнам шошилиб каравот қирғогига ўтирди-да эрининг елкасини, қўлларини пайпаслади, силаб-сийпади – Бозор безгак хуружи тутган хастадек ғужанак бўлиб ётар – қўли, елкаси ҳамон илимаган эди. «Совуқ котдингизми?» – Шабнамнинг товуши қалтираб эшитилди, «Бунча кеч қолдийиз?» сўради у ялинчоқ овозда, сўнг, кўрпани эрининг елкасига довур тортди. Шунда...

– Вой, ўлмасам! – деб ҳайқириб юборди Шабнам ва аввал бир, кейинидан икки қўллаб эрининг бошини, чаккаларини пайпаслай кетди. Қўркишни ҳам, таажжубланишни ҳам билмай гапирди: – Бошингизга нима қилди?! Вой, тавба!.. Бошингиз-чи, Бозор ака, кичкина боланикидай бўлиб қолибди!.. Ўзингиз сезмадингизми?!

Бозор қалтирайверди. Хотинининг гапидан ортиқ ажабланмади ҳам.

– Майли, – деди у титроғини босишга чираниб. – Овозим ингичкалашса ҳам, бошим кичрайса ҳам майли, ўзим... ўзимиз жон сақлайлик, Шабнам... ух, белим!.. Белим узилиб кетай деди-ей, Шабнам!.. Нимадир қисиб қолганга ўхшаяпти. Қарагин...

Шабнам эрининг елкасини, белини силаб-сийпашга тушди, «Секин, астароқ!» деб фингшиди Бозор.

– Қаттайдийз, Бозор ака? Пуф-э!.. Сичқоннинг инида бикиниб ётганмидингиз, нима бало!.. Ё, бирор кувдими, а? – Шабнам эрининг оҳ-воҳини охиригача эшиitmай сўрашга тушди. «А, айтинг, айтинг»лаб турди-турди-да, ўпкаси тўлиб пиқиллаб йиғлаб юборди.

– Йиғлама! – жеркиб шивирлади Бозор. – Жим! Секи-ин!..

Шабнам лабини қонатгудай тишлади.

– Нима бўлди, ўзи? Нега айтмаяпсиз? – йиғи аралаш ўпкаси тўлиб сўрайверди у. – Аҳволингизни кўриб кўркиб кетяпман. Яширманг, айтинг, Бозор ака...

– Ёт, ётгин... Секироқ гапир... – деди Бозор ўрнидан туриб ўтириб. Сўнг, Шабнам чироқни ёқмоқчи бўлиб шайланганини кўрди-да, сирни очишга қарор қилди:

– Ҳеч нарса бўлгани йўқ, – деди у ўзини босиқ тутишга уриниб. Сўнг хотинининг дикқатини жалб қилмоқчидек бир зум сукут сақлади-да, давом этди: – Кўп жойга тушаётганмиш-ку, анавилар... – қоп-қоронги жимжит уйда овоз чиқариб юбормаслик учун оғзини бармоқлари билан беркитиб ўтирган Шабнамнинг пишиллаб нафас олиши эшитилиб турарди. Бозор гапирди: – Кўқдалага тушибди, Бедапояга тушибди... Келгиндилар дарё ўзанига уя курибди, деган гапга ўзи ишонмагани учун буни хотинига айтмади.

– Тушиб нима қилаётганмиш? – савол қотди Шабнам.

Бозор ҳеч бир мазмун англатмайдиган тарзда «хм» деди-кўйди.

– Сизга бошқа йўлиқмадими?

Бозор бош чайқади.

– Нега унда... Унда нега бошингиз, товушингиз ўзгариб қоляпти? Белингиз...

– Жимм! – шипшиди Бозор. – Сўраб енгяпти улар. Сўрагани сўраган!.. Сўрокқа тутганинг ўзида бир ёқлик бўляпти одамлар. – Шундай дедию, бирдан тутакиб кетди. – Сўраса, нима? Сўраса сўрайверсин! Сўроққа тутаверсин! Сен жавобингни беравер! Сендан нима кетди!.. Нима, жавоб беришдан кўрқасанми? Жавобинг йўқми?! Жавобни қалаштириб ташла! Уюб ташла! Шундай жавоб бергинки, савол тополмай ўлсин, кетсин, йўқолсин, келган жойига!..

Шабнам инграб биқинини чангалиди, оғриқ каттиқ чангак солди шекилли, ўрнидан иргиб турди, нафас учун ҳаво етмагандек дераза яқинига бориб пардага кўл

чўздию, изига қайтди – эшик томон юрди. Уйнинг ўртасига келиб тўхтади. Нафас ростлаб турди-турди-да:

– Қайгадир кўниб, ўрнашиб олганмиш-ку, – деди инграомоқдан нари бўлиб.

Бозор зийрак тортди, авзои бежолашди.

– Қаттан эшитдинг? – сўради у хотинининг афтига қарамай. – Сенга рўпара келдими, улар?!?

Шабнам қоронғи уйнинг ўртасида турган жойидан ўзини каравотга – эрининг ёнига ташлади. Ташладию, ўпкасини босолмай йиғлаб юборди. Бозор ўзининг таҳликада ўтирганини унутиб хотинини юпатишга тушди.

– Нима дедингиз, Бозор ака! Менга нега рўпара келади уларингиз?! Мен нима ёмонлик қиллим уларга?! Мени сўроққа тутса ўлиб қоламан, Бозор ака...

Бозор ўйга толса учар келгиндиларга қарши чора топадигандек, ўзигина эмас, бутун оиласи, у ёқда заводдагиларнинг тинчини ўғирлаган, бутун-бутун қишлоқларни таҳликаю саросимага солаётган қўрқувнинг давосини топадигандек жим бўлиб қолди. Унинг мияси ишламаётган – нимани ўйлашни ҳам билмаётган эди. Но тайин хаёллар измида қанча ўтириди – эслолмади, ниҳоят, Шабнамининг «Ҳамма гапиряпти... Одамларни обкетиб колаётганмиш» деганини эшитди. Энди яширишнинг ҳожати йўқ эди. Кўнглига туккан-тутмаган гапларини пешма-пеш тўка кетди:

– Опкетса, зиён-заҳмат етказмай қайтариб жойига кўйиб кетяпти, – деди Шабнамга тасалли бериш учун латифа айттаётгандай хиринглаб. – Обкетиб бошига урадими... Кўрқувдан юраги ёрилаётганларни даволаб юбораётганмиш...

Бозор ўйламай айтган гапидан севиниб кетди. «Шундай бўлса-чи? Шабнамга ёрдам берар!» деган ўйда қоронғи уйнинг шифти йилт этиб ёришганини кўрди – кўнгли ёришиб, кулгиси қистади, хотинининг дардига даво топгандек севинди, севинчининг боисини хотинига ошкор қилмоққа лаб жуфтлади, «Суюнчини чўз, хотин, мушкулинг осон кўчадиган бўлди. Ўшалардан маслаҳат сўрайман!» деб гап бошламоққа оғиз жуфтладиу, ичи-

да ҳали босилиб улгурмаган бояги жазава кайта бош кўтарди:

– Биз нега қўрқамиз?.. Бирор «Отинг нима?» деб сўраса ўтакаси ёриладиганлар қўрқсин улардан!.. Қо-чарга жой тополмайдиганлар... Талвасага тушиб телба бўлиб қоладиганлар... Ўзини осиб қўядиганлар... Биз ни-мадан қўрқамиз?.. Қўрқадиган гуноҳимиз йўқ, Шабнам йўқ!..» Бизни обкетиб қомайди, биз... мени бошқа бе-зовта қимайди, жоним!.. Бизни... Биз оддий бир камба-ғал одамлармиз, Шабнам!.. Соғ бўлсак... эсон-омон кутулиб олсанг, бас, бошқа нарса керакмас, Шабнам!.. Сўрокдан қўрқадиганлар бошқалар, жоним. Биз...

Шабнам эрини базўр гапдан тўхтатди:

– Бозор ака! Бозор ака! – деди у устма-уст нафаси бўғзига тиқилиб. – Ўзингиз айтдингиз-ку, Бозор...

– Нимани?!

– Улар фақат тунда келади, дегандингиз.

– Одамлар қаттиқроқ талвасага тушсин, деб атай тунда келади... Хўп, нима демоқчисан? Айт, айтадига-нингни! Айтган бўлсам, нима?! Қўрқяпти деб ўйлаяп-санми?! Қўрқяпманми?!

– Тонг отай деб қолли, тонг отяпти, Бозор ака, – деб эрини ҷалғитишга уринди Шабнам ва дераза пардаси-нинг бир чеккасини кўтарди. – Ана, қаранг, энди кемай-ди улар.

Бозор кўз кирини ташлаб ҳали тонг бўзармаганини кўрди. Кўрса-да, хотини оғироёқ бошига ўзига далда бўлаётганини пайқади, пайқадию эс-хушини йиғиши-тириб олмоғи зарурлигини фаҳмлади. Сўнг гўё эсон-омон тонг отса қайтиб қоронғи тушмайдигандек, ана-вилар қайтиб келмайдигандек ич-ичидан қувонди. Қувончининг зўридан ўрнидан туриб хотинини қучди, эркалади, уни юпантира кетди. Шу чоғ!.. Нимадир қат-тиқ шарақлади, гуриллади, йўқ, гувиллади чоғи!.. Бозор дабдурустдан англаб улгурмай шовқин яқинлашаверди, шиддат билан яқинлашди!.. Бозор бир кафти хотини-нинг соchlарida, унга бўзрайган кўйи шамдек қотди-қолди... Шовқин кучайди – «Шу сафар обкетади!» деган ўй миясини тилиб ўтди Бозорнинг. Бу шум ўйдан у

товорнига найза кирган одамдек ирғиб тушди. «Нима?.. Ким?..» деб шивирлаб сўради Шабнам. Бозор хотининг шивирини эшитмади – унинг қўллари асабий титрай бошлади, зум ўтмай титроқ тўхтади... Бозор мајолсизланиб, кичрайиб, жони оғзидан чиқиб кетаётган хаста одамдек шилқ этиб ўринга ўтириб қолди. Шабнам тик турган кўйи эрининг боши-елкаси аралаш қучди. Бозор кўзларини чирт юмганча пешонасини хотининг қорнига босиб тин олди. Шабнамнинг юраги тез, безовта ураётгани эшитилди, туйкус хотинининг қорнида нимадир ағдар-тўнтар бўлгандек гулдиради, нимадир асабий типирчилади – Бозор чўчиб пешонасини хотинининг қорнидан узди – бошини тиззалари орасига солинтирганича ҳамон кўзини очмай Шабнамнинг қўлларини чангллади. Шу пайт чамаси қўшни хонадон рўпарасида мошин тўхтагани эшитилди. «Хайрият! – Енгил нафас олди Бозор. – Кўшниникига кепти...» Кўнглидан ўтган бу гапни сўнг овоз чиқариб тақорлади, «Кўшниникига... юк мошин...» деди Шабнам ҳам ўзини, ҳам эрини тинчлантириш мақсадида. Эр-хотин хотиржам тортиб улгурмаган ҳам эдиларки, мошин тўхтаган томондан кимдир оғир кирза этигини дўпирлатиб югуриб кела бошлади, яқинлашдию, Бозорнинг деразасини шошилинч чертди – тақиллатмади, чақирмади ҳам – чертдию, тўхтамай этигини дўпирлатганича ҳаллослаб югуриб ўтди...

16

Бозор бир қарорга келолмай боши қотди: югуриб ташқарига чиқсами ёки чақиришларини кутиб ётсами?.. Деразани чертди-ку, шу чақиргани-да!.. У ҳолда чақиравчи нега югуриб узоклашди?.. Қаёкка кетди?.. Ким ўзи?..

Бозор бўйини чўзиб қулоғини динг қилди, кўрпа остига кириб кетди, манглайи тиззасига теккудай ғужанак бўлиб олди – шундай ўраниб-чирмалиб ётса ташқаридаги чақирикни эшитмайдигандай эди. Шунда бехосдан билаги дўмбок нарсага тегиб турганини сездию, бирдан хушини йиғди. У ғайришуурый бир ҳаракатлар билан Шабнамнинг қорнини силамоққа ури-

наётган – бу билан гўё хотинини, тугилажак ўғлини тинчлантираётгандек эди!..

Аслида эса Бозор куч-кувватга тўлган гавдасини хис қилмаётган, гўё ёш боладек, онасининг бағрида ором олаётган митти гўдакчалардек хотинининг пинжига суқилиб ётган эди. У шу ахволда бошини кўтармай ғужанак бўлиб ётаверишга рози эса-да, тўсатдан очиқдан-очиқ юраксизлик қилаётганига фаҳми етди, ўша замони «Сен ётавур, тинч ёт, мен чикай» деди оғзи куришганидан калта-култа, узук-юлуқ гапириб. Шабнам васвасага тушган эрининг қўлларини қўйиб юбормай, «Ёта туринг, чақирмади-ку» деб шивирлади хавотирда.

– Бутун қишлоқ телба бўп қолли, ўзи! – Бозор хотинининг сўзига қулоқ солмай ўрнидан дик этиб турди-да, кийинишига тушди. У Шабнамни тинчлантириш учун атайин овозига зўр берди: – Осмондан тушгич баркашдагиларнинг саволидан адои тамом бўлли!.. Юраксизлар!..

Хозиргина ўзининг қай ахволда ётганини унутган Бозор шундай дедиу, гўё хотинининг назарида довюрак эркакка айланди. Шу пайт аллақайси қўшнининг ити сахар сукунатини бузиб безовта вовуллади, унга бошқа итлар жўр бўлди. Дарвозани кимдир итарди. Бозор, «Сен ётавур, Шабнам, кўп юрмай ётгин, мен ҳозир билайчи» деб токчага терилган чойнаклар орасидан дандон сопли пичноқни қини билан олди-да, эшикка йўналганида дераза ортидан келувчининг шипшигани эшитилди:

– Бозор... Бо... зор... – деди кўлага жон таслим қилаётган одамдек заиф овозда.

Бозор овоз эгасини танимади, танимаса-да, ҳам норози, ҳам хавотир, ҳам хавотирнинг зўридан каравотда ўтирганича бир қўлини бикинига тираб ёнбошига суюниб қолган Шабнамни тинчлантирмоқчи бўлган оҳангда:

– Ҳозир, чиқяпман!.. – деди баралла.

У дарвозани очиб чиқкан заҳоти кўчадан ғўнғир-ғўнғир овозлар эшитилди, Шабнам қулоқ солиб улгурмай овозлар тинди. Шабнам деразанинг олдидан узоклашиб алпанг-талпанглаб эшикка йўналди, йўналдию, эрининг изидан чиқиш-чиқмаслигини билолмай турганида «чик» этиб айвон ёришиб кетди.

– Шабнам!.. Бозор!..

Шабнам қайноасининг овозини таниб айвонга чикди. Чиқсан замони Бозор кўчадан қайтиб кирди.

– Ҳа!.. Тинчликми?! Ким?! – Чучук момонинг кўзлари олайиб кетганди. Шабнам ҳам қайноасининг хавотирига «хисса» кўшиб эрига жавдиради.

– Нарзикул амакнинг ўғли, – деди Бозор овозига атайнин вазмин тус бериб. – Вахима кўтарманглар... Тинчгина ётинглар... Мен бориб қайтай...

– Х-худойим-эй-й!..

– Эҳтиёт бўлинг!..

Бозор аёлларнинг бири олиб-бири кўйиб зорланишига қулоқ солиб-солмай йўл-йўлакай пахтали камзуленини кийиб кўчага чиққанида мошин томонда Нарзикул амакининг ўғли кўринмади. У ён-верига аланглади, энди «Ҳай!» деб овоз бермоқчи эди, пахтазорга туташ дўнглик томондан:

– Бозор... бери кел, – деган садо чалинди қулоғига.

Бозор овоз келган томонга борди.

– Ўтири! – деди амакининг ўғли худди овозини бирор эшитиб қоладигандек шипшиб. – Чўк туш!..

Бозор унинг айтганини қилди.

– Учар маҳлуклар изимга тушди, – деди у овози қалтираб, – кетимда пойлаб юрибди...

Шундагина Бозор боя чиққанида чақирувчининг, «Учар баркашчилар отамди тутиб олиб қийнабди. Тез юринг, отам сизди сўраб кўймаяпти» деганини фаҳмлаб етди. Боя эшитгану, дуруст уқмаган – «ҳозир» деганча ичкаридагиларни тинчлантириш учун шошиб уйига кириб кетган эди.

– Исмингиз ким, ака? – савол қотди тўсатдан Бозор қад ростлаб.

– Ўтири, тез! – деди қўрқанидан овозини пича кўтариб амакининг ўғли ҳамон дўнглик биқинига қапишган жойидан жилмай.

– Исмингизни айтинг, ака? – сўради Бозор пинагини бузмай,

– Р.. рраҳимқул...

– Раҳимбой ака, юринг, мошинга ўтиринг, гап бор.

Рахимкул қулоғига ишонмай қўрқа-писа қад ростлади, индамай кетиб бораётган Бозорга эргашди.

– Қанақа одамсизлар-ей! – гапнинг дангалига кўчиб жеркиди Бозор мөшинга минишгач. – Отангиз кекса, ҳарқалай, содда одам. Сиз мунча қўрқмасангиз?

– Кўркмаган одам қоллими, Бозор?.. Пахта хонавайрон қилли, ҳаммани!

– Пахтада гуноҳ йўқ! Гуноҳ – ўзларингда!.. – Бозор тутақиб шундай дедио, Раҳимқулнинг кўзи олайиб, пахтаси ўйнаб кетаёзганини кўриб тилини юмшатди: – Гуноҳ – одамларнинг ўзида... ҳаммамиизда...

– Менинг гуноҳим нима, Бозор? Мен кимга ёмонлик қиллим?!

– Сиз ёмонлик қилдингиз деёпманми мен?

– Унда нега ҳаммамиз деёпсан?.. Мен ҳам шу ҳамманинг бириманми?!

– Ёмонлик қилмаган бўлсангиз мунча қўрқасиз, Раҳимбой ака?! Ўғри эмассиз, бузуки эмассиз, муттаҳам эмассиз – тўғрими?! Диёнатли одамсиз? – Шундайми?.. – Раҳимқул Бозорнинг ўзига тикилиб турган кўзларига тик боколмай тарракдек қотди. Бозор шафқатсиз савол ёғдирди: – Айтинг, Раҳимқул ака, қайси гапим тўғрироқ: диёнатли инсонмисиз ёки аввалги айтганларим... Гапиринг, нега индамайсиз?!

Раҳимқул гапирмоқчи бўлиб оғиз жуфтладио, ғўлдираб нафаси ичига тушди. Гуноҳкор боладек кўзлари жавдир-жавдир қилиб тикилиб тураверди. Нихоят, бирдан:

– Ўйламаганман, ўлай агар, ўйламаганман! – деб юборди. – Ахир... ахир орқамдан келли, Бозор! Измайиз... Теппамдан пойлади!.. Ўллай-а, Бозор!..

Раҳимқул йиғламсиради, Бозор унинг йиғламсираган овозини эшитиб «отасиникига ўхшар экан» деб кўнглидан ўтказди, унинг аҳволини кўриб қаҳри бир оз юмшади.

– Хўп, келса-чи, келса, нимадан қўрқасиз, Раҳимбой ака?.. Жонингизни олмаса...

– Тутиб олса-чи?..

Бозор фикрини уқтира олмаслигига кўзи етиб ҳафсаласи пир бўлди.

– Ҳайданг мошинни, Раҳимбой ака! Кетдик! – деди унга далда беріб.

Раҳимқул калитни уясига суколмай анча уринди, шабкүр одамдай энгашиб тимирскиланди. Унинг қўли қалтираётганди... Буни сезган Бозор калитни унинг қўлидан олиб жойига сукди. Шундан сўнг Раҳимқул икки-уч қайта уринди ҳамки, мошин «ҚФФ-ҚФФ»ладиу ўт олмади. Ўт олмагани сайин Раҳимқул аланг-жалаңг қилар, дамо-дам бежоланиб рўпарасидаги, ёнидаги ойнадан осмонга кўз ташлаб кўяр ва худди Бозор бирон ёққа қочиб кетадигандек шошиб ёнига қаар, Бозорнинг хотиржамлигини кўриб тинчланар эди. Нихоят, у мўлтайиб Бозорга ёлборди:

– Ке, ўзинг ҳайда, Бозор, қўлим қалтираб кетяпти.

Бозор гап-сўзсиз тушди-да, мошинни айланиб ўтди. Ўтгач:

– Сурилинг, – деди Раҳимбойга ва унга сездирмай тонгти юлдузлар чараклаб турган осмонни бир кур кўздан кечирди, ён чўнтагидаги пичоқни ушлаб кўйди. Сўнг, рулга ўтириб мошинни ўт олдиришга ҷоғланди. Бир-икки уриндиямки, мошин, бояги-бояги «ҚФФ-ҚФФ»дан нарига ўтмади. Шундан сўнггина Бозор ҳамроҳидан беркитмай-нетмай осмоннинг тўрт буржига обдан аланглади. Уйида – хотинининг ёнида ётган жойида талвасага тушганининг боисини тушунмай ҳайрон бўлди, килган киликларидан энди ажаблана бошлади.

– Ҳа, Бозор? – сўради нафасини ютиб, ғужанак бўлиб ўтирган Раҳимбой.

– Бехавотир, Раҳимбой ака, – деди Бозор моторни ўт олдиришга уриниб. – Ўзи... Аслида!.. Ҳа!.. Ҳа!.. Кетди-и!..

Юк мошин силтаниб кўзғалдию, бир маромда юриб кетди. Бозор билан Раҳимқул енгил тортиб «Хайрият» дегандек бир-бирларига қараб қўйдилар.

– Ҳайда, Бозор, тезроқ ҳайда! – қисталанг қила бошлади бир оздан кейин Раҳимқул.

Катта йўлга чиқишигач, тезликни оширган Бозор боя бошлаган гапини давом эттириди:

– Ўзи, аслида, – деди Раҳимқулга бирров кўз кирини ташлаб. – Улар истаса мошинни ўт олмайдиган қип

кўяди... Кейин-чи, ака!.. Улар сиз минан қувламачоқ ўйнаб ўтирумайди: истаган заҳоти тўхтатади-да, сўроққа тутади.

– Нимани сўрайди?

Бозор кулимсиради, хиринглади, кулди, телбаларча совуқдан-совуқ ҳахолади ва Раҳимқулнинг саволини эшитмагандай:

– Сиз эса дўнглик панасига биқиниб олибсиз!.. Хоҳласа-чи, ака... хоҳласа ерга кирсангиз – қулоғингиздан, осмонга чиқсангиз – оёғингиздан тортиб олади улар!..

– Уларнинг ўзи осмонда-ку!

– Э, ўлманг! – деди Бозор Раҳимқулнинг кифтига шапатилаб. – Бизнинг мақол уларга тўғри келмас экан. Булардан-чи, ака, факат ерга кириб қутулиш мумкин. Ўшандаям, омонатни топшириб лаҳадга кирасиз, кутуласиз. Унгача... лаҳадга тушгунга қадар жавобингиз тайёр бўлсин, ха, ака, жавоб чогида бийронлик кутқаради!..

– Тўғри айтасан, Бозор, – деди Раҳимқул унинг bemavrid ҳазилига эътибор қилмай. – Отамди уйдек ғарамнинг остидан тортиб чиқарибди!

– Сичқоннинг ини минг тилло бўлибди-да, – Бозор кулмоқчи эдию, бирдан жиддий тортди у – бели симиллаб оғриди, овози ёқимсиз чийиллади: – Қаерда, қандай ғарам?!

– Фермада! Фермада ўтиб келаётганида!..

– Қандоқ қийнабди?

– Ёмон қийнаган, Бозор... нуқул алаҳлаётти!..

– Қийнаганидан эмас, – Бозор Раҳимқулнинг гапини чўрт кесди. – Отангиз кўрқкан!..

– Кўрқанидан шунчалик азоб чекмасди, Бозор.

– Кўрқишдан оғирроқ азоб йўқ, ака! Каллангни сапчадек узуб ташласа кутиласан-кетасан, лекин «каллангни оламан» деб судраб-чўзиб юргани ёмон!..

– «Ўлганим яхши» деёптилар, отам, – деди иғламсираб Ракимқул.

Бозорнинг қўллари мажолсизланиб руль чамбарагини базур тутиб қолди. Беихтиёр ҳурпайди, бошини елкалари орасига тортди.

– Вахима... – деди у пичирлаб. – Вахима...

– Нима? – сўради Раҳимқул.

Бозор жавоб бермади. Мошин Нарзиқул амакининг дарвозасига яқин келиб тўхтади, сухбат узилди. Бозор ўтни ўчиргач ҳам мошиндан ташқарига чиқмади – бошини елкалари паноҳидан чиқариб ойна томон оғдириб қулоғини динг килди. Шу алфоз бир муддат тек ўтиргач, «карс» этиб эшикни очдию, пастига эниб ғизиллаганича ўзини йўлакка урди. У Раҳимқул етовида ҳовлидан ўтаётганида тонг бўзара бошлаган эди...

17

Бозор даҳлизга етмай ичкаридан, «Ана, келли, келишди» деган овозларни эшилди. Уйга кириши билан сим каравотда бошини кўрпага буркаб ётган Нарзиқул амаки ўрнидан туриб ўтирди ва:

– Бозор, ини-им-м! – дедиyo, ҳиқиллаб йиғлаб юборди.

Бозор амакининг кўлларини силади, кифтига қоқиб юпантиришга уринди, нимадир дейиш мажбуриятини сезса-да, сўз тополмади ва хонани тутган сичқон исидан бурнини жийириб хаёлига келганини айтиб юборди:

– Сув беринглар...

– Сув бердик... Сиз юпантириинг, бобойни!

Бозор тепасида дўриллаган товуш эгасининг авзойи чатоқлигини пайқаб бошини кўтарди. «Амакининг тўнғичи бўлса керак, – хаёлидан кечди унинг. – Менга нега тўнғиллаётти? Нима, мен...» Нарзиқул амаки ингради – Бозор амакини юпантирадиган сўз тополмай уйга толди. «Амаки нимадан бунчалик кўрқади?.. Борйўғи юкчи бўлса... Раҳматовдек суюнчиғи қараб турмас... Келгиндиларга биринчи рўпара бўлгандаёқ бўлари бўлди амакининг!.. Кейин Бозор айтди, «Директорга айтиб кундузги ишга ўтиб олмайсизми?» деди. Амаки кулди – Бозор энди фаҳмласа ўша топда амаки одамсизмон маҳлукларнинг ташрифини ҳам унутиб, сўнг, «Сен нимани билардинг, бола» деган оҳангда қандайдир ўзига ярашмаган димоғдорлик билан мийигида кулган эди. «Ҳа?» – сўради Бозор ҳайрон бўлиб. «Э, бўлак юмушлар кўп, ука» деди амаки тагдор термилиб. Бозор ортиқ

суриштиrmади, суриштиrmаса-да, орадан пича фурсат ўтказиб амакининг ўзи гап бошлади:

– Бола-чақа деб юрибмиз-да шетларда туни минан, ука... Бари жонга тегди, аслида...

Нима жонга тегди, амакининг кўнглида қандай ташвишлар тугун бўлиб ётибди – Бозор учун қоронғилигича қолди...

– Ферма ёнидан кетаётувдим...

Бозор дабдурустдан амакининг хаста товушда бошлаган гапини англамади.

– Лаббай? – сўради у бўйини чўзиб.

– Гапираверманг, ўша фермани! – ўшқирди тўнгич ўғил.

– Гапираверсинлар... гапираверинг, амак... – жуда вазмин, босик оҳангда деди Бозор бояги зардаси учун тўнгич ўғилдан аламини олмоқчидек. – Оғзингизга келганини айтаверинг, ичингизда қолмасин... Енгил тортализ, амак, гапираверинг...

Нарзиқул амаки ётган жойида кўзгалди.

– Кўзғалманг, ётган кўйи айтинг... Кулиб-кулиб айтинг-да, амак!..

– Одам ўлай деёптию, кулинг дейди-я! – тўсатдан ўшқира кетди тўнгич ўғил Бозорга: – Мазах қилмоқчимисан бизларни?!

Бозор кўркүв ўғилни васвасага солиб кўйганини сезди. У отасининг шу ахволга тушганидан эмас, балки ўзининг ташвишида қаттиқ кўрқаётганини Бозор сезди. Ўзини босиб, «Ҳа, гапир, зардаларинг бўлса тўқавер» деган маънода тўнгич ўғилнинг башарасига бамайлихотир назар ташлади.

– Ўша келгиндилаингга кўшиб уруғингни қуритаман!!!

– Ўчирр!!. Оғзингни юм!

Бозор тўнгич ўғилнинг жон талvasасида гапираётганини пайқади, унга жавоб қайтариш нияти йўқ эдию, амакининг баттар таҳликага тушиб сапчиб туриб кетганидан шошиб қолиб ўшқира кетди:

– Кўрқаётган экансиз, чиқинг уйдан! Боринг!

– Мен кўрқяпманми?!

– Кўрқяпсиз!..

- Нимадан кўрқаман?! Кўрқадиган жойим борми?!
 - Чик, уйдан чи-ик... – ингранди Нарзиқул амаки. Раҳимқул акасининг тирсагидан олиб уни ташқарига тортди.
 - Билсанг, айт! – ҳамон Бозорга ҳамла қилишдан тўхтамади тўнғич ўғил.
- Бозор ўрнидан туриб кетди, каравотдан оёгини осилтириб ҳолсиз ўтирган амакининг елкасига кафтини босганича укасининг етовида эшикдан чиқаётган тўнғич ўғилдан кўзини узмади. Ака-ука остонаядан ўтиб эшик ёпилаётганида тилининг учига қадалиб қолган гапини айтди:
- Кўрқадиган жойингизнинг ҳисоб-китобини ўзингиз қилинг!.. Мен қаёқдан билай, сиз нимадан қўркишингизни?!
 - Бунинг ваҳимаси ортиқча! Жондорга рўпара келган ман-у, юраги адо бўлган – у.
 - Мен янаги ҳафта бўладиган тўйининг ташвишидаман!.. – тўнғиллади ташқаридан тўнғич ўғил.
- Бозор дағдағага қулоқ солмади, амакини, қолаверса, ўзини тинчлантириш ниятида гапни учар келгиндиларга бурди:
- Кўйинг, бу ташвишларни амак, анавиларни учратганингиздан эшитайлик.
- Нарзиқул амак боя бошлаган ҳикоясини эътиrozсиз давом эттирди:
- Сен қайтавермагач, пахта ҳам сийраклашди... Пахта адо бўлди, бу ёғи қиши... Сўнг, кетдим... Ҳаво булат, осмоннинг дами қисяпти деб ўйладим – чиқиб уйга қайтавурдим... Ферма ёнидан ўтаётувдим... Қаттан пайдо бўлли – аклим ҳайрон десанг!.. «Ғир-ғир» қилдию, беш қадам рўпарамда!.. Ўзимни ғарамди остига урдим!.. Белимга довур кириб кетдим!.. Нафас олмай ётавурдим!.. Ўша – пахта ғарамига тушган дароз бўйлиси – худди ўзи! «Пайқамасин-да, ишқилиб!» деб юрагим отилиб кетай деб ётибман. Ферманинг итларини ер ютганми, биронтасининг дами чикмайди! Вовуллаб келса қочармиди, баркашига миниб! Бозор ука-а, шундай деб ўйлаб ётибману, мунда-ай қарасам, устимдаги хас-хашакка қўшиб

биров суғуриб оляпти!.. Иккала биқинимда қандайdir кўл! Қарасам, икки оёғимда тик турибман, рўпарамда – дароз жондоринг!..

– Нимани сўради? – луқма ташлади Бозор, амакининг ҳикоя қилишидан тоқатсизланиб.

– «Яхшилаб ўйладингми?» деди.

– Нимани? – Бозор шундай сўради, ғарам тепасига ташриф чоғида келгиндишлар баркашига томон кўтарилаётib «Яхшилаб ўйлаб боқ» деганини эслади.

– Кейин, «Маошни қаердан олдинг?» деди. Сўрайвурди.

– Нима жавоб қиллингиз?

– Айтдим, Бозор... Йўқ, дарров айтмадим. «Раҳматовдан сўранглар» дедим, «Директор у-ку» дедим!.. Тўғримасми, иним, ўзинг айт, завудди ишини мен қайдан билай?.. Қора юкчи бўлсан... Ана, Раҳматовдан сўрасин, Давлатовди сўрок қиссин!.. Гуппининг дўқи ортиқча!.. Раҳматов акаям ўшанинг чизигидан чиқмайди!.. Оқсоқолди мен қайдан билай!.. Уни кўрмаган-нетмаган...

– Оқсоқолни сўрадими?

– Сўради. «Оқсоқол завудга неча марта кеган?» деди. «Кўрмаганман» дедим. «Ёрдамчилариминан кеганми?» деди. «Билмайман» дедим. Сўрайверди – билмайман деб тек туравурдим. Жўнаб қолай десам оёғим йўқдек! Шол бўп қоллимми деб қўрқдим, Бозор! Чини, иним, сўроқ килаётганда оёкни мадорсизлантириб қўяркан!.. Бир чоқ қўрқитишга тушди –тишим шақиллаб, кўл-оёғимдан мадор кетиб, турган жойимда йиқиллим.

– Урдими?! – чўчиб сўради Бозор.

– Урмади, Бозор, ургандан баттар қилли: «Оқсоқолга бўйсунасанми?» деди. «Бўйсунаман» дедим. Ким бўйсунмайди у кишига, Бозор! Раҳматовдек директорнинг капалаги учиб кетади, у кишининг номини эшишиб, бизга йўл бўлсин, Бозор!..

Бозор Опанинг телефонда Оқсоқол билан эмас, унинг ёрдамчиси билан неча қизариб-нечабўзариб, дудукланиб гаплашганини эслади. Амаки дам тоғдан, дам боғдан келиб вайсайверди. Бозор «қисқа қилинг» демоққа лаб жуфтлади, айтмади, «Ҳар қалай, гапиргани сайин енгил тортяпти» деб мулоҳазаланди. Амаки гапираверди:

– «Оқсоқолни кўрганмисан?» деб сўради. «Йўқ, дедим». «Маошни ким беради?» деб сўради. «Давлатов беради – кассадан оламиз» дедим. «Фақат кассадан оласизларми?» деб айлантирди. Жавоб бермасимдан яна сўради – «Давлатов Аминвойга ким бўлади?» деди.

«Бўласи» дедим. Сўнг тағин Оқсоқолга бурди сўроқди: «Оқсоқол заводга келганми?» деди. Сўрайверди, сўрайверди. Жонимда жон қомади, Бозор!.. Ўлган болаларимни, момоларимни кўрсатди, кўзимга, ука!.. Кейин... Сўнг... «Кўрганман, Оқсоқол кеган, кўп кеган, заувдуга» дедим...

– Кўрмагансиз-ку, Оқсоқол кеганини? – биринчи бор унинг раъини қайриб савол қотди Бозор.

– Ўша топда жонимни оларди, Бозор!.. Кўрмаганман, десам, болаларим етим қоларди, иним!.. Ажалим ўшаларнинг қўлида бўп қолли, ука!..

Бозорнинг боши қотди. Келгинди маҳлуклар ўзидан ҳам Оқсоқолнинг сўраганини эслади. Тағин дуч келса, сўрайверса, сўроқقا тутаверса – Бозор нима дейди? Оқсоқолни кўрган-нетган бўлмаса! Қандоқ қилиб «кўрганман» дейди?.. Оқсоқолнинг, лоақал суратпуратини кўрмаган... Нарзиқул амаки ҳар қалай Раҳматовни, Давлатову Аминвойни яхши билади, Бозорбой эса Аминвой билан салом-алиги демаса... бир ҳадди сиғиб «чиқмаган жондан умид» қабилида ёрдам сўраган, омад кулиб, гуппи ёрдамини дариг тутмаган, холос!..

– Сўнг, мени кўтариб олли, Бозор! Нарвонига тармашиб юқорига олиб чиқди. Бояги... хотинларга ўхшаш хипча беллиги бор-ку, ўша, боласини кўтаргандек қўлтиқлааб олли!.. Баркашига олиб кирди. Оғзим ланг очилди, Бозор!.. Қарасам, баркаш учяпти! «Ўлдим!.. Энди болаларим ўлигимният тополмайди!» деб ўйлай дейман, қани, ўйласам!.. Сира қўрқмадим. «Уйингга тушасанми?» деб сўради хипча бел жонивор. «Тушаман» дедим. «Мени тинч кўйинглар. Ўн икки болам бор, раҳминглар келсин, мусулмонман», деб ялиниб ёлвордим. «Топишим уйимдан ортмайди, худо ҳаққи, босиб қўйган мол-давлатим йўқ. Беш кундан кейин уйимда тўй – ўғил уйлаяпман» дедим.

– Жавоб бердими?

– Жавоб қайда! – Нарзиқул амаки шундай деб атайн Бозорни синамоқчилик жим туриб қолди. Пича фурсат ўтказиб, сўнг, гапирди: – Сени сўради.

– Мени?!

– Сени!.. «Аминвойга ким бўлади?» деди. «Оқсоқолни кўрганми?» деди. «Йўқ» дедим. «Топиши қандай?» деди. «Камбағал, етимча», дедим. «Нега заводга ўтди ишга?» деб сўради. «Билмадим» дедим. Кейин... кўрқитди. Баркашнинг эшиги очилди-да, мени ташлаб юбормоқчи бўлли! Нақ абжағ бўлардим, Бозор!.. Ҳовлининг ўртасига тушиб ер минан текис бўлардим!.. – Нарзиқул амаки боядан бери йиғламай кўйганини эслагандек бурнини торта-торта пикиллади. Ўпкаси тўлиб, овози баттар бўғилди: – Сен эҳтиёtingни қил, Бозор!.. Айтдим, ўлиб қомай, осмондан ташлаб юбормасин, деган хавотирда айтдим: «Бозор Оқсоқолни кўрган. Бирга кўрганмиз» дедим. «Бозорнинг топишини Аминвойдан сўранглар» дедим... Бундай қарасам ҳовлимда – молхонанинг ёнида ётибман!.. Қандоқ тушдим, уларга нега шундай дедим, қандоқ тилим борди – ўллай агар билсан, Бозор?! Энди нима қиласиз, иним?.. Ким деган одам бўллим?..

18

Бозор мийигида кулимсиради, бехосдан овоз чиқариб ҳиринглади, ҳайрон бўлиб кулди, нега кулаётганини билмай ажабланиб кулди, Нарзиқул амакининг тентакбашаралигидан истеҳзоли кулди, амакининг учар баркаш ичидаги ахволда ўтирганини тасаввур қилиб, одамсимон маҳлукларга ялиниб-ёлборгандарини, ялтоқланганларини кўз ўнгига келтириб тиржайди, илжайди, қиқирлаб кулди... дарғазаб бўлиб кулди, тишларининг орасидан тупук сачратиб, жигибийронлигидан тилини тишлаб олгудай бўлиб кулди, Нарзиқул амаки қовун туширганидан хабар топган Аминвой гуппи қай ахволга тушажагини тахминлаб... дами ичига тушиб кулди, Давлатовнинг айқникидай сумбати кичрайиб кўзлари бежоланишини эслаб, ваҳиманинг зўридан шайтонлашини эслаб кўркувга тўлиб-тошиб кулди... Номсиз маҳлуклар учар баркашга миндириб олгудай бўлса, сўроққа тут-

са – Бозор жавоб қайтармаса, улар ҳоли-жонига қўймай сўрайверса... Бозор оёгини тираб тураверса (ҳеч вақони билмаса нима деб жавоб қиласди ахир!), баркаш гувиллабми-гувилламай ҳовлисининг тепасига бориб тўхтаса, «айт» деса – айтмаса, «Айтмасанг, ташлаб юбораверайликми?» деса, «Кўлингдан келса, ташлаб юборавер!» деб тураверса Бозор, «Хотинчангни оёғи остига тушиб мажак-мажағинг чиқиб кетса ҳам майлимий?» деса, Бозор без бўлиб тураверса, уни қўл-оёғидан кўтариб баркашнинг очиқ эшигига судраб келишса, энди туртиб юборишмоқчи бўлганда, «Тўхтанглар! Қонхўрлар!.. Келгиндилар!.. Одамхўрлар!.. Иблислар!..» ва яна алланимабалолар деб сўкса, шовкин кўтарса, жон аччиғида васвасага тушиб совуқдан-совуқ маҳлуқларга ташланиб муштлаб-дўппослаб хумордан чиқмоққа чоғланса, лекин ҳарчанд даф солмасин дўппослаш у ёқда турсин, қўлини кўтаролмаса, маҳлуқларнинг афтига лоақал тик қаролмай мажолсизланиб, ҳолдан кетиб... хўнграб юборса, ялинса-ёлборса, ахир, Шабнам оғироёқ, ўзи туролмаяпти – хотини шўрликнинг юрагида юрак колмади! – уч терак бўйи тепаликдан чалпакдек бўлиб ерга тушган Бозорнинг оёқ-қўллари тўрт томонга тарвакайлаб отилиб кетса, мияси мажакланиб кўзлари косасидан ситилиб чиқса... шундайига ҳам адои тамом бўлиб юрган Шабнамнинг юраги ёрилса... уйдан югуриб чиқсан онаси ўғлининг жасадини танимай ўзини келинининг жонсиз танаси устига ташлаб уввос солса, кон қақшаб фарёд кўтарса – кўни-кўшнилардан биронтаси «Нима гап?» деб чиқмаса – кейинги пайтда Бозорнинг уйидагиларга ким рўпара келса орқасига қарамай қочадиган, сўрашмай ўтадиган одат чиқарди-ку! – аллақачон ой-куни етиб муддатидан ўн-ўн беш ҳафта ўтган шўрлик Шабнамнинг жонига оро кирадиган бирорта диёнатли мўмин топилмаяптию! – сўнг бурда-бурда бўлиб титилиб ётган ўғлининг жасадини таниб қолган онасининг ўша жойда эси оғиб қолса... Кўнглида тўфон кўтараётган ноаён ваҳмга бас келолмай уқубат ва аянч билан кулди Бозор... озор чекиб, рутубатли кулди... кўз ўнги қоронғилашиб кулди... телбаларча кулди... ҳали дунёга келмаган ўғли

фироқида қон йиғлаб кулди.. Хайр-хўшни насия қилиб, кула-кула чиқди амакининг уйидан, кула-кула излади Аминвойни, кулиб-йиғлаб, йиғлаб-кулиб айтди Аминвойга бор гапни... Аминвой шараклаб кулди, бехосдан кулди... Ҳайрон бўлиб, кўзлари олайиб, итлиги тутиб ижирғаниб, иржайиб кулди... – «Ўчир!» деди туйкус!.. «Турқинг қурсин!» деди, «Сўтак! Даюслар!» деди, «Латтачайнар!» деди, сўкинди, бўралатиб сўқди... Кимларнидир остин-устун қилиб онасини... Бозор ҳушини йиғавермади, ниҳоят, қулоқ чаккаси шараклаб кетди – чайқалиб бориб бошини деворга урди – кўзидан ўт чақнади – ҳушини йиғди, чаккаларини чангллаганича деворга ҳолсиз суюнди...

– Очиб кўйибдими, куласан, ит! – деб кекирдаги йиртилгудай бақиришга тушди гуппи. – Сенларни қатимга олган мен аҳмоқ! Мен! Одам қиласман девдим!.. Сенлар сотасанлар!.. Сендақа хотинчалиш дўстлардан етти ёт бегона афзал, душман афзал! Душман!..

Аминвой ғазабдан тушмай Бозорни хотинчалишдан олиб хотинчалишга солаётиб бирдан овози ўзгарди. Бозорнинг назарида гуппи йиғламсирагандай бўлди. Боядан бери ичи қизиб, боши қизиб гап тўплаётган эди – бир бошласа гуппининг оғзини очирмай кўйгудай эди, тўсатдан унинг ўзи юмшади. Бозор буни кутмаганди. Унинг назарида бу яқин-атрофда Аминвой акасидек қудратли, Аминвой гуппидек дасти дароз инсон йўқдек эди. Аминвой гуппи истаса Раҳматовни ҳам, Давлатовни ҳам қўйруғига чўп суқилган хўrozқанддек ўйнатишини Бозор яхши биларди. Аминвой ҳатто ўша қишлоққа танда кўйган одамсимон келгиндилар билан ҳам тил топишиши, улар билан апоқ-чапоқ бўлиб кетиши ҳеч гап эмас деб ўйлар эди. Шундай тахминлар билан кўнглининг овлоқ бир чеккасини хотиржам қилиб юрган Бозор олдida, мана, Аминвой йиғламсираб турибди, бурнини тортиб...

– Бетингни арт, юр, – буюрди синиқ овозда Аминвой. Бозор унинг айтганини қилди – бетини артди, энгилбошини тузатди, кўчага чиқмай ҳовлида ҳозир бўлган «Жигули»нинг ёнига гуппининг изидан эргашиб борди.

Гуппи «Жигули»нинг орқа эшигини очиб «Кир» деди, Бозорнинг назарида Аминвой акаси уни лаҳадга тикиб юбораётгандек сесканди – юраги орқага тортдию, кирди, кетидан Аминвой кириб ёнига ўтириди. «Хайрият, ўзиям чиқди» деб кўнгли таскин топди Бозорнинг ва ён-орқа ойналари махсус қоронғилаштирилган «Жигули»нинг ичидаги ҳайронлигини яширолмай аланглайверди.

«Жигули» на рўпарасидан, на ён-веридан ўтаётган мошинларга парво қилмай елиб, узоқ юрди. Аминвой тилини ютиб юборган одамдек чурқ этмади, Бозор ҳам журъат қилиб оғиз очмади. Тоғ этагига яқинлашганларида мошин икки-уч бурилдию, мутлақо нотаниш йўлга тушди. Бозор трактор ҳайдаганида яқин-атрофда ўзи билмайдиган йўлу чўл қолмаган деб ўйларди. Афсуски, ҳаммаси аксинча – Бозорбой билмайдиган йўллар, у бош суқиб кўрмаган кўчалар ҳали жуда-жуда кўп эди...

«Жигули» бир ёни бош кўтариб тепасига қаралса, дўппи тушиб кетадиган даражада қиялик, иккинчи ёни тубсиз сойлик йўлдан елдек учиб бораётсиб тўсатдан тўхтади, тўхтагани замони Аминвой ҳе йўқ-бе йўқ мошиндан тушиб эшикни қарсиллатиб ёпдию, сойлик томон шахдам юриб кетди. Бозор ҳайрон бўлиб улгурмай «Жигули» кўзғалиб йўлга тушди.

– Қаерга келдик? – журъатсизланиб сўради Бозор.

Ҳайдовчи индамади.

Бозор рўпарадаги ойнадан атрофни кузатиб кетаверди. Биронта йўловчи мошин учрамас, одамнинг қораси кўринмас, факат тобора ҳаво мулойимлашиб бораётганини сезди Бозор.

– Токқа қор тушибдими? – савол қотди у беихтиёр.

«Жигули» бир маромда кетаверди. Орага бояги-бояги жимлик чўқди. Икки-уч бурилишдан сўнг йўлнинг қоқ ўртасида кўндаланг турган катта оқ эшак кўринди. «Жигули»нинг юриши секинлашмади. Бозор трактор ҳайдаган кезларда бундай ҳолатларга кўп дуч келган эмасми, беихтиёр эшакнинг қай томонидан ўтиш маъкулроқ эканини мўлжаллади – «ўнг томон кенгрок» деб чамалади, чамалади, «Жигули» тезликни заррача пасайтирмай чап томонга бурилганини кўриб кўзини чирт юмиб олди – назарида мошиннинг чап қаноти

туртиб чикқан харсанг тошга ёки ўнг қаноти эшакнинг куйруғига тарақлаб уриладигандек эди, йўқ, мошин бир чайқалдию, йўлнинг ўртасига тушиб олди.

– Ҳеч зоғ йўқ жойда эшакка бало борми?! – деб юборди Бозор азбаройи чўчиганидан.

Ҳайдовчи индамади, «Жигули» йўлидан қолмади. Бозор қаёқка, не мақсад-муддаода бу қадар елиб кетаётганини билолмай тинмай таажжубланар, саволлари тўнкадек ўтирган ҳайдовчига кор қилмаётганига багтар ғижинаётган эди. У ҳайдовчининг пешонасига теккудек турган шапалоқдек кўзгуга қаради – афтидан дурустгина одам, ўзи тенги, эҳтимол бир-икки кўйлакни ортикроқ тўзғитган бўлса бордир. Манглайнинг ўнг чеккасида қиялаб тушган чуқур чандик изи демаса, хушрўйгина, мулойим йигит кўринади. Бозор уни қаерда кўрганини эсламоқчи бўлди. Тунов куни заводдан чақиртириб гуппининг ёнига эргаштириб борган ҳайдовчига мутлақо ўхшамади. Униси – ёши катта, қўнғиз мўйлабли эди. У ҳам чурқ этиб оғиз очмаганди бора-borgunicha... Аминвой тайинлаган бўлса керак-да... Бўлмаса одам-ку, шунча юриб ичи қизиб кетмаганини-чи??!

Шу пайт «Жигули» дарё устига курилган омонат кўприкдан ўта бошлади. Кўприк, кўприкка қўшилиб «Жигули» қаттиқ лопиллади.

– Қайси дарё бу, биродар? – сўради Бозор хаёл аралаш ва саволига жавоб кутмай ён-верига аланглади.

Хийла узун кўприкдан эсон-омон ўтиб олган «Жигули» яна тезликни оширди. «Қаёқка шошаётганини ўзи билармикан?» деб ўлади Бозор. Бу йигит ҳам Аминвойга орқа қилган кўринади, ўшанинг хизматидаги йигитга ўхшайди... Нимасига кеккайди?.. Мен еб, у қуруқ қолгандай!.. Ёки гунг-соқовмикан?..

Бозор илкис хаёлига келган фикрдан ўнғайсизланди, боядан бери шўрлик ҳайдовчидан ноўрин ранжиб келаётганидан, ичida уни тўнкадан олиб тўнкага, сўқимдан олиб сўқимга соганидан хижолат чекди, шапалоқдек кўзгудан ҳайдовчини қайта кузата бошлади. Шу пайт тоғ томонда қандайдир күш қичқирдими-сайрадими – ҳайдовчи чўчиб бошини бурди – сайраган қүшни тополмади чоғи, бошини сараклатди.

Бозор тахмини хато эканига икрор бўлди. «Гунг бўлса, күшнинг сайрашини эшитадими!» деб кўнглидан ўтказди. Беихтиёр сўради:

– Ғалати сайрар экан-а?..

Бозор лоақал шу саволи жавобсиз қолмайдигандек эди, йўқ, бу умиди ҳам пучга чиқди. Пучга чиқибина колмай, Бозорнинг тамом ҳафсаласи пир бўлди. «Гаплашмасанг – ундан нарига!» деди-да, момик баҳмал филофли суюнчиққа ясланиб кўзини юмди – бели зирқ-зирқ қилиб симиллаётганини, қандайдир темир қайиш белини тобора қаттикроқ қисаётгандек, қаршилик кўрсатмай ўтираверса ҳализамон умуртқаси қарсиллаб синадигандек туюлди – оҳиста ўриндиқнинг бир томонига сурилди, бироқ оғриқ аримади, – «Манави тўнка бир оғиз гапирса ҳам енгил тортар эдим!» – лекин шофёр учун Бозор йўқдек эди гўё... «Кўзим юмилиб боряпти... хушимни йўқотмаяпманми?.. Ёки туни минан мижжа қоқмаганимнинг касрими?..»

Бозор на ухлаётганини, на ҳушидан айрилаётганини, на оғриқнинг боисини, на-да қаёққа елдек учиб бораётганини англаган – фаҳми инон-ихтиёридан холи, асов кулундек тутқич бермаётган эди... Ўзи талvasага тушгани етмагандай ҳомиладор хотинининг пинжига кириб олди-я... Ӯша ётишидан қайнотаси хабар топса борми! «Қизимни сизга ишонамиз, ўғлим», деб кетган қайнонаси билса-чи!.. Онаси нима дейди?.. «Эркак кишининг ўлгани яхши, улим! Ким айтади, сени ота бўлади деб!» Нақ кўзини очирмай жавраб ташлайди онаси... Раҳматли отаси ҳаёт бўлсаю, яккаю ёлғиз ишонганди тоғи – ўғли қаёқдаги нотайин-ножинс келгиндилардан қочиб-ҳуркиб оғироёқ хотинининг путига биқиниб жон сақлаганини эшитса!.. У-у, бундай исноддан кўра ӯша учар маҳлукларнинг қўлида нимта-нимта бўп кетгани афзалроқ!.. Бозор бурнини жийирди – димоғига ўрнашиб қолган сичқон иси кўнглини ағдарди... кеча тунда, ўринида ётган жойида ҳам бирдан димоғига шу қўланса ис урилган эди – хотини ҳам уч-тўрт қайта босим ўқчили...

«Жигули» қаттиқ ғийқиллаб тўхтади, Бозор сапчиб кўзини очди, беихтиёр кўйнидаги пичокқа кўл сукди:

– Нима гап?! – деб юборди ҳовликиб.

«Жигули» бояги-бояги шитоб билан олға интилди. Хаёллари тўзғиб кетган Бозор юрагининг аллақаерларини укубатларга солиб ўртаётган ўй-хотирага берилгиси келди – пичокқа узатилган кафтини чап кўксига босиб шиддат билан ураётган юрагини тинчлантиришга уринди.

«Отаси, онаси, қайнона-қайнотаси билмаса – хотини кўрди-ку, ахволини... ўзи гувоҳ бўлдию, ўзининг нималарга кодирлигига! Ўзининг, Шабнамгинасининг олдида ким деган одам энди у?! Вақти келиб хотини ўғлига айтиб берса-чи!.. «Сенга ҳомиладор вактимда шундай-шундай бўлган... Бошимизга кў-ўп кулфатлар тушган... Учар баркашда келадиган одамсимон махлуклар қишлоғимиздагиларнинг барини бир чеккадан сўроққа тутган... Сўрокни аввалбош отангдан бошлаган... Бир куни отанг эсхонаси чиқиб кўрпанинг остига кириб кетган... Сен қорнимда эдинг... отанг қорнимни силабсийпаб сал ўзига келган, юрак ютиб кўрпа остидан чиқкан... Шунда бирор деразамизни чертган, кейин отанг икки-уч кун дом-дараксиз кетган, деса... Икки кун... Қайтиб келгунича хавотирдан ўладиган бўлганман, деса... Отанг келганда «Қаттайдийиз?» деб сўрасам жавоб қилмаган деса... Қатга бордим дейман? Кетавурдим, кетавурдим, шоғир айтмади, каёққа оборганини дейдими?! Тентакми, ўзи бу? Қаёққа бораётганини биладими?.. Дунёнинг чеккасига етиб келдик-ку?! Нақ анави келгиндиларнинг кўлига тушармиди, манави тўнка! Гапирган минан нафи кўринмаяпти. Ахир...

– Аминвой ака кутиб қолгандир? – сўраб юборди Бозор тоқатсизланиб таваккалига. Ҳайдовчи индамади.

– Эшитяпсизми? – сўради Бозор. Ҳайдовчи индамади.

– Мошин тош-пошга урилмагуничча ҳайдайверасизми?

Ҳайдовчи жим.

– Э, қанақа одамсиз-ей? Кулоқми, бу, ёки?! Ҳайдовчи қалқиб кетди. «Жигули» чайқалди. Бозор ғазабдан бўғриқди.

– Ёки учар келгиндиларга рўпара кип қўяйми? – деди сўккандан баттар бўғилиб. У ҳайдовчининг елкасидан тутиб силтамок учун қўл чўзганди ҳамки, мошин шовқинсиз-несиз майин тўхтади. Бозор атрофга аланглаб қаерга келишганини фаҳмлаб-чамалаб улгурмай «Жигули»нинг эшиги очилиб Аминвой гуппининг тунд башараси кўринди.

19

Ҳаво очик бўлса-да, куёш кўринмас, дим, дарахт япроқлари қилт этмас – қишлоқ томон олиб бораётган «Жигули»да ўтирган учала одамнинг дарди дунёсию чехраси ҳам шу дамдаги ҳавонинг диққинаfasлигидан кўпда фарқланмас – ҳарқалай Бозорга шундай туюлаётган эди.

– Шофирига нима дединг? – сўради Аминвой «Жигули» тўхтаб, ундан тушганлари заҳоти.

– Нима дебман? – қарши савол котди тўнглик билан Бозор, пинагини бузмай.

Аминвой аканинг йўл бўйи тундлашиб келган башарасига ним табассум югурди. У қулдими, кулганга ўхшадими – димоғи чоғ одамдек овоз чиқариб деди:

– Ўладиган қибсан-ку, ҳар балони сўрайвериб?

Шундагина Бозор ҳайдовчини сухбатга тортмоққа беҳуда уринганларини эслади.

– Келгинди дўстларингдан ўргандингми, сўрокқа тутишни, Бозор? – чиройи очилиб қулди Аминвой.

Бозор унинг кулгисига зимдан эътибор қилди – кулгига жўр бўлмоқчи эдию, гуппининг кулгиси остида қандайдир шум ният пинҳонлигини сезди. Сездию, сир бой бермади.

Аминвой Бозорни ҳовуридан тушираётган эди. «Шофирига кўшиб юборди, шофири уни пичоқсиз сўйди, сўймади, нимталади!.. Товага солиб ўтда тоблади, мана, энди буниси унинг бошидан сув пуркаяпти... Пуркайди, пуркайди-да, сўнг...» Аминвой яна нималарга қодирлиги ёки бўлмаса кейинги пайтларда ўзини ҳар қадамда қандайин кўргуликлар кутаётганини олдиндан билишга уриниш Бозор учун битмас-туганмас укубатлар келтираётган эди. «Келгинди дўстларинг» эмиш! Давлатов

«канавиларинг» деганди, Нарзиқул амаки, «Сенинг касофатинг» деди, Амин гуппи эса... буларнинг тили бир!..»

– Энди бундай, Бозорбой, – деди туйкус Аминвой Бозорнинг хаёлини бузиб. Сўнг унга синовчан бўзрайиб қараб турди-да, нигохини «тутиб» олгач уни қўлдан чиқармасликка уриниб сўради: – Чарчадинг-а?..

Бозор жавоб бермади.

– Ранг кўр – ҳол сўр бўлиб турибсан-ку, тан олавур, ука.

Бозор гуппининг муддаога кўчишини кутаётган эди. Гуппи ҳам сезгандек муддаони юзага чиқара бошлади. Ва тўсатдан чўрт кесди:

– Гап шундай: Нарзиқулнинг мазаси йўқ. Ҳозир уни касалхонага опкетишиди. Дўхтирларга тайинланган... – Аминвой шундай деб Бозордан кўзини олиб қочди, кўлини узун, қора чарм камзулининг чўнтакларига сукди. Сўнг гапининг давомини айтди: – Агар бери қайта-вермаса... Қайтмаса керак... сен ёнига бориб ётасан...

Бозор юриб бораётган жойида тўхтади. Аминвой ундан уч қадам илгарилаб тўхтади ва аста орқасига ўгирилди. Гуппининг нигоҳидан бирон мазмун-муддаони англаш иложсиз эди. Бозор бирдан мадорсизланган оёқларини сургаб Аминвойга тенглашди, ғудранди:

– Мен нима қиласман, aka?..

– Мўлтайма! – тўсатдан дўқ ура кетди Аминвой. – Ҳамма бало ўзингдан бошланди. Нарзиқул қовун туширди, уқдингми?! Қовун!!.. Тағин «нима қиласман» дейсан!.. – Гуппининг овози бирдан мулойимлашди: – Борасан, ётасан – дам оласан... Нарзиқулнинг дамини олдирасан... Кулоғига қуясан... Кулоғига кўргошин эритиб куиши керак энди!.. – Аминвой ёмон сўкинди. – Кейин... кейингисини кейин айтаман... Изма-из етиб бораман... Боришимни айта кўрма!..

Бозор қулоғи том битган одамдек миясида нимадир гувиллай бошлади. Мулоҳаза юритишга чоғи келмай қолди. Шу ахволда эсига келган саводдан севиниб кетди:

– Оқсоқолга айтдингларми, у кишини сўраганини? – деди Аминвойга сирдош одамдек ялтоқланиб.

– Оқсоқолнинг ўзи келадиган бўлди... – Аминвой

беихтиёр шундай дедию, тилини тишлади. Сирни очиб кўйганидан аттанглаб қизариб кетди. Бозорга тескари ўгирилди. Хатосини тузатмоқчи бўлди шекилли, тайсаллаб туриб атайин салмокланди: – Келиши номаълум... Гуллаб юрмагин ҳали...

Бу хабардан Бозорнинг ичида чироқ ёқилгандай бўлса-да, у енгил тортганини яширди:

– Йўғ-э, нима деб гуллайман, – деди-кўйди.

Пиёда, ёлғиз кета-кетгунича шуни ўлади. Тўғрида, «Кишлоққа Оқсоқол келармиш» деб кимга айтади, зарил кебдими айтиб! Ё айтса осмон узилиб ерга тушадими!.. Ёки Оқсоқол деганлари пахтақайнарликларнинг кўзига кўринишдан кўрқадими? Кўрқса, унинг оқсоқоллиги қатта қолади? Раҳматов, Давлатов, Аминвой-дек казо-казолар соясига қуллук қиласидиган зоти олий Пахтақайнарга хуфия келиб кетмаса керак ҳойнаҳой?.. Учар маҳлуклар сўраб-суриштираётгани қулоғига етганмикан Оқсоқолнинг? Бордию, шундан дарак топиб келаётган бўлса-чи!.. У ҳолда Бозорни йўқлаб қолишар ҳойнаҳой?.. Нима, чакиришса, бор гапни яширмайнетмай айтади: сизни сўради, дейди!.. Тағин, Оқсоқол келгандা Бозор жаноблари касалхонада ётса, бу ёғи неча пулдан тушади? Касалхонадан рухсат беришмаса... йў-ў-к, Оқсоқол истаса касалхона тугул, камоқхонадан хам чақиришади уни. Фақат амакининг аҳволи чатоқлашгани чакки бўбди-да!.. Шўрлик, юраги одош бўлган. Баркашига обчиқиб кетибди-я, баччағарлар!.. «Кўрқмадим» дейди амаки тағин, «Аланглаб томоша қилдим» деди. Кейин «Ховлингга ташлаб юборайликми?» деб кўрқитишган. «Ёвуздар!..» Келгиндиларни «ёвуз» деса ўзига ҳамкишлоқ манави одамлар-чи?! Келгиндилар одамсимон маҳлук бўлса, булар – одам-ку! Қаёкларга обормади улар?! Нега олиб борди, муддаоси нима, уни «Жигули»да айлантириб келгунича Аминвой қаёққа кириб чиқди, шофири одамми ё сўқимга бокилган танами? Ким ўзи, улар?! Тағин «шофирин ўладиган қипсан» дейди! Нари борса, Бозор ул-булни сўради, суриштириди, холос – шофёр жавоб бермади, гунг-соқов бўлиб ўтираверди. Бозорнинг хуноби чиқди – сўрайверди-сўрайверди... Ҳа-а-а, сўраш, тинимсиз қистовга олиб де-

ворга тираб савол ёғдириш қандай бўларкан?! Ўсал бўп қолганмиш! Ўсал ҳам гапми? Тағин Бозор дўқ ургани йўқ, унинг гирибонидан бўғиб, қон чиқмайдиган жойига тепиб-нетгани йўқ, айтмайдиган сирларини хамирдан қил суғургандек тортиб чиқаргани ҳам йўқ – онда-сонда битта-яримта савол қотди, холос. Келгиндиларнинг кўлига тушмапти – сўроқнинг азобини чекмапти, ўша сўқим шоғир! Шоғиринг у ёқда турсун, Аминвойнинг ўзи ҳам булбулигё бўлиб кетади уларнинг кўлига тушса!.. Манави пастқам, хилват кавакларга қочиб дўқ уриш осон, сўтакдан олиб сўтакка солиш, «валдира ма, алжирма!» деб дағдага қилиш осон! Сўроққа тутилсанг, билласан унинг азобини!.. Сўтак эмиш!.. Бозорнинг уч-тўрт саволига айикдай шоғиринг ўсал бўлаётганида, тағин Нарзикул ўлиб қомабтию! Нари борса, мазаси йўқ экан. «Дўхтириларга тайинланган» деди. Нима деб тайинлади? Дўхтири ўзи қарайвуради, даволайди-да, иши шу бўлгач? Ёки?.. Ёки?.. Бошқа нимани тайинлаш мумкин дўхтириларга?.. Тўхта-тўхта!.. Нега шундай деб туриб гуппи кўзини олиб қочди? Киссасига суқаётган кўли титрадими? Ёки?.. Кўлига титроқ турганини яширмоқчи бўлдими?.. «Агар бери қайтмаса» эмиш!.. «Қайтмаса керак» деб фотиҳасини ўқиб қўяяпти ҳам! Фотиҳа эмас, жанозасини... жанозасини?!

Бозор таққа тўхтади – мияси қотиб ўнг-сўлига, орқаолдига аланглади – кун чошгоҳдан оққан вақт Бозорнинг ўй-хаёлларини писанд этмай ўтиб борар, қанча вақт ўтмасин Бозор ҳеч вақонинг уддасидан чиқолмаётган – Ер – ўша-ўша қаттиқ, осмон эса ўша-ўша йироқ эди. Бозор замину фалак оралиғида яшаш учун ўзига берилган фурсати ғаниматда жиндек ҳаловат тополмаётган, энди топай-топай деганда янги-янги мушкүлотлар уни исканжасига олаётган, мана, айни чоғда Нарзикулнинг тақдири ўзига келиб тақалаётганига тушунолмай гаранг эди... Дарвоқе, амакининг қулоғига кўрғошин қуйилади, сўнг жанозаси ўқиладиган жойда Бозорга нима бор?.. «Сен ёнига бориб ётасан» деди... Ёнига?.. Нега Бозор Нарзикулнинг ёнига бориб ётиши керак?.. Нарзикулнинг бери қайтмаслиги мукаррар эмиш... бундан чиқди, амакининг тақдири бирёклик

бўлаётганида Бозор унинг ёнида бўлиши шарт эмиш... буни Аминвой ҳал қилар эмиш. Нега?! Аминвой ким ўзи?! Бозор келгинди маҳлукларнинг сўроғидан қочгани жой тополмаётган бўлса, бундан Бозор қолиб, Аминвою Давлатовлар юрак олдирган бўлса, Нарзикул адои тамом бўлган эса, бутун қишлоқ аҳли таҳликаю васва-сага тушган бўлса, нима, Бозорнинг тақдирини, босадиган қадамини Аминвой белгилаб бериши керакми?! Ўзига бериладиган саволлар жавобини ҳар ким ўзи эпласа, бас, гуппи тугул, ундан каттароғи ҳам қўллаб-кувватлашига зорикмайди. Ахир Бозорнинг сўроқдан кўрқадиган жойи йўқ! Унинг учун онаси тинч бўлса, хотини эсон-омон кўзи ёриб қўчқордек ўғил туғиб берса – одатдагидек қириб-киртишлаб, тирмашиб-эрмашиб рўзғорини тебратиб турса бас, бошқа орзу-ҳаваси йўқ Бозорнинг!.. Фақат, банда-да нима қилса ҳам, кўнгли бир суст кетиб қарз-парздан бир йўла қутулиб олай деганди, шу ўйда Аминвойга маслаҳат солганди, холос!.. Нима, Аминвой пахта зовудига юкчи қилиб ишга жойлаштиргани эвазига истаган кўйига солаверадими Бозорни?! Истаган жойига обораверади, истаганича мошинда сарсонини чиқаради, истаган ерида сиқувга олиб, сўкиб-ҳақоратлаб, ерга уриб, иззат-нафсига тупуриб оёқости қиласуврадими? Шундайми?! Аминвой сўроқдан кўрқса Бозорда нима гуноҳ? Ҳар кимнинг жавоби ўзида – бироров бирор учун жавоб бермайди, ахир!.. Нарзикул амаки сўроқдан бир ҳолатга тушган бўлса унинг ёнида Бозор кўриқчилик қилишга маҳкум эмас-ку!.. Ёнида эмас, эҳтимол, унинг ўрнида ётишига тўғри келар?! (Бозор ўзининг шу кашфиётидан кўзи мошдек очилди!) Амаки эмас, Бозорнинг аҳволи бери қайтмай, нари кетиб қолар?! Бозорга хушёрроқ қараш вазифаси ҳам топширилиб қолар ҳойнаҳой, дўхтирларга!.. Бугун амакининг аҳволи оғирлашади, буни Бозор ўз кўзи минан кўради, эртага келгинди маҳлуклар Бозорни сўроққа тутади, гапирмаганига қўймайди, улар, ўзи истаган гапни маъқуллатиб олади-да, бундан дарак топган Аминвой бояги кимсасиз жойига боради, боради-да, аллакимга учрашиб, Бозорни касалхонада даволашни гаплашиб чиқади, ўша ерда туриб дўхтирларга маҳсус тайинлайди – «Бозор алоҳида

парвариш қилинсин» деб амр қилади. Дўхтирлар амри фармонни айтилганидан аълороқ қилиб ўринлатишади, кейин, Бозорбой, қарабисизки, онаизорию, хотинини, бўғзигача ғалваю машмашаларга ботган бу ёруғ дунёга келишни истамай оёқ тираб туриб олган ўғилласини зор қақшатиб, қон йиглатиб ке-етади-қолади. Шундайми... Шуми, ерлик одамсимон махлукларнинг марҳамати?!

20

Бозор йўл юрса ҳам мўл юрди, қадам ташлаши тобора оғирлашаётганига қарамай кетаверди. Тор кўчаларига етай деганида ёнига трактор келиб тўхтади. Бозор эски таниш ҳамкасбини кўриб севинди, илдам юриб кабинага чикди. Трактор тариллаб силкина-силкина жойидан кўзғалди. Бозор тўсатдан барча чарчоқларни, барча ташвишларни унутиб тракторни, унинг тор, аммо лекин файзли (айниқса шу топда) кабинасини кўмсади, танишига ҳаваси келди, афсусларини яширмай чукур уф тортди.

– Ҳа-а, кўринмайсан? – сўради таниши унинг ранг-рўйига кўз югуртириб. – Нима, улфатларингга қўшилиб Кўқдаланинг ортига ўтиб кетганмисан?

Бозор «улфатлар», «Кўқдаланинг орти» деган лук-малар замиридаги кинояни тушунди. Ўлганининг кунидан жилмайди.

– Ишларинг дурустми? Заводда иш каттами, дейман?

Собиқ ҳамкасби билибми-билмайми Бозорнинг нақ гирибонидан олган эди!.. Бозор унинг саволига жавоб берадиган аҳволда эмасди, шу боис қочириққа яраша гапнинг пўсткаласини айтди-кўйди:

– Кўқдаланинг ортига ҳеч ким ўзича ўтиб кетолмайди, жўра, у ерга опкетиб қолади, опкети-иб!..

Унинг бақириб гапиришидан чўчидими ёки Бозорнинг авзои жойида эмаслигидан бирон хатар туйдими, тор кўчанинг бошига етгунча тракторчи қайтиб оғиз очмади. Тор кўчага етгач, тракторни тўхтатдию, ўтни ўчирди.

– Бу ёғи нима бўлади, жўра? – Бозор танишининг жавдираб умидвор қарашидан таъсирланиб унинг гапига

кулоқ солди. Таниши астойдил куюнчаклик билан давом этди: – Бутун қишлоқ, қўшни қишлоқларгача ҳаловатини йўқотди-ку. Одамлар нима бўлади, энди?..

Бозор мушкул жумбоқ ечимини топишга киришган одамдек оғир ўйга толди.

– Ҳамма балони сендан кўраётганлар ҳам бор. Одамлар...

– Одамларни қўя тур, – унинг гапини чўрт кесди Бозор. Ҳозир у яна янги хабарлар эшитадиган, эшитсада, уларни ҳазм қиласидиган аҳволда эмас, балки гапини мухтасар қилиб уйига етиб боришни, уйдагиларни тинчлантиришни кўзлаётганди. – Ўзинг ҳаловатингни йўқотмадингми, ишқилиб?..

Бозор танишига синовчан разм солди. Тракторчи мазмунсиз тиржайди, буни ўзича тушунган Бозор яна савол қотди:

– Бирордан тилинг қисиқлик жойинг борми?

Тиржайганидан лаб-лунжини йигиштириб улгурмаган тракторчи бу саволни эшитиб афти қийшайиб кетди. «Қўрқди» деган ўй кечди Бозорнинг хаёлидан.

– Сўроқлайвериб, жа, ҳоли-жонингга қўймас эканда, ўзиям, анавиларинг!.. Аслида, нимадан қўрқаман?.. Сўраса сўрап...

– Яша! Шундан маъқул гап йўқ оламда! – чўрт кесди Бозор танишини ортиқ гапиртирмай. – Ўзингдан хотиржам бўлсанг, ўзгадан қўрқмайсан. Осмондан эмас, ундан тепароқдан кемайдими анавилар!

Бозор тор кўчадан уйига ета-етгунича gox шу гапни айта олганидан севинса, gox ҳатто шу таниши ҳам маҳлукларни «анавиларинг» деб унга нисбат берганига дили ғашланди. Шундай тинч, хотиржам ишни ташлаб заводга ўтганига яна ўзини койиди. Заводда ишим жа дуруст, жўра. Жуда!.. – кесатди у тишларининг орасидан тупук сачратиб. – Иш катта бўлгандаям у ёқ-бу ёғи йўқ!..

У бутун умр кўрган-кечирганларини тўплаган тақдирда бир бўғчага жо бўладигандек, кейинги икки-уч ой асносидаги машмашалар эса қолган умрига татигудай борлигини эзиз-эзғилаётган – жонига азоблар бераётган эди...

Унинг назарида уйи узоклашиб кетгандай, йўли сира унмаётгандай, шу алфозда яна узок юриши зарурдай, лекин қандай бўлмасин, у бу йўлни босиб ўтишга аҳд қилган – фикр-ёди уйига соғ-омон етиб олиш, онаси-нинг хотинининг ёнида нафас ростлаш, уларни тинчлантириш, юпантериш, сўнг... сўнг-ра... одатдагидек қош қорайиши билан ишига жўнайдими ёки Аминвойнинг йўриғига юриб хотинининг гулдор халтасига чойнак-пиёлани солиб касалхонага йўл оладими – Бозор ҳали бу ёғини йўлаб кўрмаганди...

У дарвозадан ўтиб ҳовлига кирди, ҳаммаёқ жим-жит. Айвон янгигина супурилганини кўриб кўнгли хийла тинчланди, сўнг қаёққа юратини билмай турди-да, пахтали камзулини ечиб айвон устунидаги михга илди. Айвон лабига омонатгина ўтирди. Узунасига тушган катта ҳовлига бу йил ҳеч вақо эколмади, тўй деди – тўй ўтди, кейин пича дам олай деди – дам олди, куёвтўралик суруридан маст бўлиб саркаш хаёллар қанотида уйига тикка кириб-тикка чиқиб юрганида тўй асасаларининг акс садоси янглиф бўйнидаги қарзларни чўтлади, уларни эгаларига қайтариш ҳисобини чамалади, чамаладию, ка-палаги учди, тик қомати дол бўлди-кўйди – энди йўлаб караса ўша капалагига кўшилиб бошидаги хуши учеб кетган дамларда бегуноҳдан-бегуноҳ Шабнамгини кўзига бало-қазодек кўринганди – Бозор шайтоннинг найрангига учмади – «Уйланиш баҳонасида қарзга ботаётган битта менманми!» деб ўзига тасалли берди, кўз очиб кўрган жуфти ҳалолига нисбатан туғила бошлаган шайтоний ўй-хаёлларини қувиб солди – боши ёрилгудай ўйга толган пайтларида ҳам ҳеч кимга ёрилмаганди – иттифоқо Аминвойга ёрилди: икки айтмади, бир айтди, холос: Аминвой кўп ялинтиради деб кутганди, йўқ, иккинчи сафар йўликканида мушкули осон бўлди – тракторини топшириб, заводда ишлай бошлади...

Хулласи калом, Бозор қайтиб ҳовлидаги юмушларга фурсат тополмади. Сўнгги марта режаларини чамалаганида, терим тугасин деб яна пайсалга солди, мана, далада пахта одош бўлай деди ҳамки, машмашалар кун сайин ўзидан урчиб, ўзидан кўпайиб ётибди...

– Ҳа, дайди!

Бозор бехосдан сапчиб турганидан ўзини тутолмай ҳовли ўртасига бориб қолди, беихтиёр осмонга, томларга аланглади. Ҳовлида юрган товуқлар хуркиб қақақлаб қочди, патлари чўғдек қизил хўроz қайдандир етиб келиб товуқларни муҳофазасига олиб гердайганча ер тенинib қуқуқлади. Шабнамнинг шараклаб кулиши ҳовлини жаранглатиб юборди.

– Секинрок чақирмайсанми! Хаёлминан ўтиргандим!.. – деди қути учиб Бозор хотинидан астойдил норозиланиб.

Шу пайт этакдаги уй остонасида Чучук момо кўринди.

– Ҳа, келлингми, улим? – сўради онаси остонаядан тушиб улгурмай. – Қайга йўқоллинглар?

Бозор онаси билан хотини не боисдан ундан хавотирланишмаганига ажабланди. Унинг хаёлида туғилган саволга хотини жавоб берди:

– Бир йигит айтиб кетмаганида йўлга тикилавуриб ўлардик.

– Қандай йигит? – бирдан қизиқиб сўради Бозор. – Танидингми?

– Башарасини кўрмадим... Дарвоза ортидан сўйлашдим. Новча, ориқ йигит... «Бир юмуш билан кўшни қишлоққа кетяпмиз», деди... Қарасам, «Жигули»га миди- да, кетди...

– Ёнида ким бор эди?

– Ёнида... ҳеч ким йўқ, мошиннинг ичи кўринмади.

– Завудларинг тинчми? – сўради ҳовли ўртасига келиб Бозорни саросар кўздан кечирган Чучук момо.

Бозор онасига анграйди, «Ҳа, нега бунақа кааяпсиз?» демоқчи эди, хотини ундан илгарироқ гина аралаш савол қотди:

– Салдан кейин ишга кетарсиз?

Бозор хотинига жавоб бермади – у салдан кейин ишга борадими, касалхонага равона бўладими ёки бўлак кутилмаган юмушлар чиқадими – унинг кўнгли шундан безовта эди! – ўзига ҳам коронғи эди.

– Мен ётай, пича ётай! – деди у хотинидан нигохини олиб қочиб. Шундай деб этакдаги уй томон юрди. Буни кўрган Шабнам ҳайрон бўлди.

– Ётсангиз, уйга киринг... – деди қайноасининг олдида ўнгайсизланаб.

Бозор бош чайқади, лабини қимтиб изига қайтди.

– Давлатобди кўрдингми? – сўради Чучук момо айвонга етган ўғлидан.

Бозор шиддат билан орқасига ўгирилди, қаттиқ хавотир ва сўнгсиз бир ҳадикда онасига ўқрайди – эрининг авзойини кўрган Шабнамнинг кўзлари қинидан чиқиб кетгудай олади.

– Ҳа-а? – деди бунга эътибор қилмай Чучук момо. Бозор сакраб ҳовлига тушди, гурс-гурс юриб бориб онасидан икки қадам берида тўхтади.

– Намунча қистовга олаверасилар?! Нима, мендан бошқа ташвишларинг йўқми?! Заводнинг тинчлиги, Давлатовнинг ҳаловати менинг қўлимдами?! Ҳаммасига мен жавобгарманми?!

Бозорнинг бўғилиб ғазабини сочишини кўрган Чучук момо «Ҳай-ҳай»лаб ўғлини тинчлантироққа уринди-ю, овози чиқмади, эрининг ўз онасига зарда қилишини сира кўрмаган Шабнам худди бақириб юборишдан кўрққандек қўлларини мушт қилиб оғзига босди – эрининг олдига бордию, тек туриб қолди.

Бозор онасига айтишга сўз тополмади чоғи, хотинига ўшқирди: – Йўқол! Бор!..

У шарт-шурт юриб айвонга борди, бир лаҳза ўй ўйлаб турди-да, яна этигини гурсиллатиб изига қайтди – ҳамон хушидан айрилгудай бўлиб турган онаси ва кўзлари жикқа ёшга тўлган хотинининг орқасидан ўтиб, этакдаги уйга кириб кетди.

21

– Мен йўқман!.. – тўнгиллади Бозор ичкаридан.

Шабнам эрининг тунги васвасаси давом этаётганини сезди, қайноасига илтижо ва ўтинч билан қаради, қайноаси эса атрофларини ажин босган қисиқ кўзларини келинига умидвор тикиб турарди.

Бозор Шабнамни чакирди. Чучук момо келинига «киринг» деди-да, ўзи нари кетди. Шабнам қайноасининг уйи остонасидан ўтдию, тўхтади – «Эна, сизди чакиряптилар» деди хавотирли, лекин юмшоқ товушда.

Чучук момо ўғлининг ечинмай-нетмай устига кўрпача ташлаб ётганини кўриб нимадир демоқчи бўлдию, бемор тепасига келгандек ўғлига индамайгина термилди.

— Сен ҳам эшит, — деди Бозор тепасида турган она-сига, бошини кўтармай пойгакда қолган хотинига қарата. — Ким сўраб келса ҳам — мен уйда йўқман!..

Кайнона-келин ҳанг-манг бўлиб колишиди.

— Тушундингларми?.. — сўради Бозор бошини ёстиқдан узиб тирсагига таянаётиб. — Аминвойми, Давлатовми — барибир йўқман!... Анув... Анув... махлукларга ҳам...

Чучук момо ўғлининг гапини дабдурустдан англамади, келини тўсатдан оғзини кўли билан тўсиб, пиқиллаб йиғлаб юборганини кўргач, «Вой, шўри-им!» деганча ув тортди.

— Увламанг!.. Жиминг, она! — жеркиди Бозор.

— Нима, келадиганми, уларинг? — сўради онаси бурнини тортиб.

— Сен нега пиқиллайсан?! — ўшқирди Бозор жавоб ўрнига хотинига ўдағайлаб.— Ўзингни ўйласанг-чи, сен!..

— Бунга нега бақирасан?! Ўзинг, ўчир овозингни!.. — Чучук момо ўрнидан туриб кетди, келинининг елкасига қоқиб ўтди-да, дераза ёнига бориб уни шарақлатиб очиб юборди, очдию, ўша заҳоти ланғиллаб очилган иккала тавақани қайтиб ёпди. Қайтиб ўғлининг тепасига келиб чўнқайди ва ҳозир ўғлига зарда қилганига афсуслангандек ўта мулоиймлик ва меҳрибонлик билан гапирди: — Қандоқ қилиб ўзини ўйлади, бу шўрлик, болам?.. Ётиб тинчимайди, туриб тинчимайди — осонми бунга, Бозор?.. Ундан кўра, мана, пахта ҳам одош бўлли, «терим тугасин, болани кесиб оламиз» деган духтурларга обор. Бу ташвиш турганда, сеники ортиқча, улим...

Шабнам даҳшат аралаш хўрлиги келса-да, овоз чиқармади, кўйлагининг енгини қайириб қўзларига босди.

— Бозор, очик айт. Бизга айтмасанг кимга айтасан, жон болам? Қаёққа бординг, ким келмоқчи уйимизга? Айт, болам.

— Бехавотир, она, — деди ниҳоят тилга кириб Бозор. — Ўзим... иш юзасидан бордик. Аминвой акаминан... ишлари жонга тегди, она, чарчадим. Пича дам олай... сўраб келганларга «Йўқ» денглар, шу...

– Нега учар махлукларди айтяпсан?

Бозор кулди.

– Э, қанақасизлар, ўзи! Ўшалар келган тақдирдаям уйғотманглар, аллақатта кетген деб жавоб қилинглар, деган мақсадда айтдим. Йўқман, тушундингларми, йўқман! Тамом!

– Нафасинг курсин-э! – Чучук момо шундай деб сапиб қаддини ростлади. – Оғзингга қараб гапир, нега йўқ, бўлар экансан?! Э, ишларинг курибгина кетсин-а!.. Хе, онсони чиксин-а, ҳаммасини!..

Бозор онасининг жигибийрон бўлаётгани ўзига дахл-сиздек кўрпачага бурканди. Шабнам эрининг бу тахлит ётиши унинг тунги талвасасининг давоми эканини ту-шунди. Қарийб эшитилмайдиган қилиб пичирлади:

– Майли, бир оз ётсинлар... тунда яхши ухламагандилар...

Бироқ Бозорнинг уйқуси келмади. Ўрнидан турмади, кўзини очмади ҳам – ўйлади, бекарор ўйлар билан олишиб ётди... Раҳматов кўркқанини сездирмаяпти... Давлатовнинг бўлари бўлди – «Иккови бир гўр, бирига «пишт» десанг иккови адо бўлади» кулди Бозор – Аминвой сир бой бермаяптию, илло алланималарнинг пайида ғимиirlаб қолганини яшиrolмаяпти. Тулки!.. Тулки эмас – қашқир!.. – Бозор сапчиб кўзини очди, қўлини ёстиқ остига суқди – қалтираётгандар бармоқлари пичоқни пайпаслаб, пича тин олди, тахмоннинг ёнида пайдо бўлган мушукни кўриб назарида ўзи – сичқону, ҳозир мушукнинг чангалига тушадигандек безовталанди, юрагининг бежо дукурлашини базур босиб амаллаб тили калимага келди «Пишт!..» дедиyo, кигизни муштлади, мушук ўзини эшикка урди... Бозор кўзини қаттиқроқ юмди. «Фаол ўзини осибдими?..» Бозор нафас олмай ётаверди – юраги безовта дукурлай бошлади – шу топда юраги урмаса ҳам рози эди Бозор – начора!.. Кўзини очмай жавоб қилди: «Хабарим йўқ». «Тоққа қайси мошинда борган экан? Аминвойникидами?» – «Билмадим». «Ким билан борибди бўлмаса?» – «Эшитмадим». «Раҳматовнинг отгани ўки йўқмиди Фаолни?» Бозор кўрпачага бурканди. «Раҳматов ёқтирмас эдими?» тақрорланди савол. Бозорнинг оёғи силтанди – у аса-

бийлашаётган эди. «Нима?.. Итдан ёмон кўради?.. Раҳматов, Давлатов... Аминвой ҳамми?.. Итдан ёмон кўрарди – шундайми?.. Шундайми?.. Шундайми?..» Хона жимжит бўлиб қолди. Бозор кўнглидан ўтаётган гапларни тепасида бирор сўзма-сўз такрорлаётганини, бу овоз хипча белли келгиндининг овозига ўхшишини аниқ эшилди – ичида мутлақо ўйламасликка уринди – шубҳасини тасдиқлагандек ташкарида нимадир гувиллади, сўнг гувир садоси оҳиста узоклашди, бирдан шовкини йўқолди... Жимжит, «тиқ» этган садо йўқ, юрак курмағур дукурляяпти, холос. «Йўқман, йўқманку!..» Топиб келди-я! Қийнамади, қистовга олмади, мени қистовга омайди... Фаол, Фаолга нима бўлди? Қачон? Нимадир қаттиқ шитирлади. Бозор жонҳолатда ёстиқ остига кўл югуртириди, кўзи олайиб қинидан чиқиб кетгудай очилди: тахмондаги сандик ёнидаги ғижим қофоз уюми орасига тушиб қолган сичқон «бандилик»дан чиқишига уриниб талпинарди. Бозорни дув тер босди... Ортиқ ётолмади – бошини тиззаларига солинтирганча гангид, ўтириб қолди: тушунтираман, мени тинч қўйинглар, мен Раҳматовди ҳам, Давлатовди ҳам танимайман... Аминвойдан бир марта илтимос қилганман, бир марта, холос... Бошқа ҳеч гап бўлмаган, худо ҳакки, тушунинглар!.. Абдуфаол таги-туги йўқ одам аслида, сурати бор, холос, завудда одам зоти борки, уни бир чақага омайди – туйкус хўroz ҳовлини бошига кўтариб қичқирди!.. – чўчиганидан Бозор ўринга қапишиди, қўллари мушт бўлиб тугилди... Ўзини осганидан бехабарман, тоққа ким билан, қайси мошинда борганини ҳам эшигмадим... Қари онам бўлса, хотиним ҳомиладор, эрта-индин кўзи ёрийди, барака топгурлар, туғилмаган болам ҳурмати, мени тинч қўйинглар... Тушунинглар, маҳлуқ бўлсанглар ҳам одамбашарасизлар-ку! Суратларинг одамга ўхшайди-ку, тушунсанглар-чи!..

22

«Аввал завудга борай, амак келмаса сўнг касалхонага ўтаман... Боришга борарман, лекин амакига қўл теккизмайман. Гуппи қаёққа бошляяпти мени?! Ярамас!..»

Бозор ҳеч бир ўйини адогига етказа олмаётганди.

Ахир, гуппи ишора қилган нарсага, ҳали касалхонага бориб берадиган топшириғига Бозор қодир эмас экан, нега кун бўйи Нарзикулни асраб қолишини ўйламади?! Ҳозироқ боради у касалхонага... Йўқ, йўлакай амакиникига киради. Касалхонага обкетишган бўлса, у ҳолда етиб боролмасачи?.. Гуппи дўхтирларга тайинлаган, дўхтирлар Бозорни кутмай... Агар боя – Аминвойнинг ёнидан қайтаётиб Нарзикулнинг уйига борганида, Раҳимбойни чакиртириб, «Отангиз касалхонага бормасин, иложини топсанглар, бирон қариндошларникига жўнатиб юборинглар» деб тайинласа олам гулистон эди!..

– Раҳимбой акани чакиринг, – деди Бозор дарвозахонада ёшгина жувоннинг қораси кўринган заҳоти.

– Отамди обкетишид... – деди ўзини панага тортиб, енги билан оғзини тўсиб, жувон.

– Қаёқقا?! – сўради Бозор йўлакка отилиб киргундек шиддат билан.

– Касалхонага... Тузук эдилар... дўхтирлар қўймади...

Бозор бошқа сўз қотмади, у қандай қилиб бўлмасин, ҳозироқ касалхонага етиб бориши шарт эди. У катта йўлга чиқиши билан йўловчи мошинни тўхтатди:

– Касалхонага!.. Шошқинч!

Ҳайдовчи бош чайқади.

– Кечиксам чатоқ бўлади, тоға, илтимос!

– Ўтказмаяпти, биродар, – елкасини қисди ҳайдовчи.

– Нега ўтказмайди?

– Одам ўғирланибди!..

Мошин жўнади, Бозор йўл чеккасида турган жойида таҳтадек қотди-қолди. У шу алфоз қанча вақт турди – билмади, бир пайт ёнига келиб тўхтаган мошин ҳайдовчиси, «Қаёқقا, биродар?» деганини эшиитдию, шошиб, саволга жавоб бермай-нетмай ўзини мошинга урди.

– Касалхонага ҳайданг. Тез!

Мошин тезлигини оширди.

– Йўлни тўстганмиш, эшииттийзми? – сўради Бозор.

Ҳайдовчи елкасини қисди.

Катта йўлнинг касалхонага бурилиш жойида чиндан ҳам мелиса мошинлари кўринди. Олатаёқ тутганлардан бири Бозор ўтирган «Москвич»га тўғри йўлни кўрсатди.

– Ким ўғирланибди? Қаердан? – сўради сабрсизланиб ва вазиятдан фойдаланиб Бозор. Мелиса жавоб қилмади.

– Нариги йўлдан юрайлик-чи, – деди Бозор ҳайдовчини шошириб.

Ҳайдовчи сўзсиз унинг амрига бўйсунди. Бироқ қасалхонага бориладиган бошқа йўл ҳам тўсилган эди. Бозор мелисаларга нималарнидир тушунтириб, ўтиш учун рухсат сўради, ҳарчанд холи-жонига қўймасин, мелисалардан рухсат тегмади. Нихоят, унинг қўярда-қўймай, «Касалхонадан бемор ўғирландими?» деган саволига мелисалардан бири тоқат қилмади шекилли:

– Касалхона тинч... ёнидаги йўлдан, – деди.

«Демак, Нарзиқул амакини эмас, – деб бирдан енгил тортди Бозор. – Хайрият, бошқа одам ўғирланган. Кимни, ким ўғирлаган?.. Пахтақайнар Пахтақайнар бўлиб одам тугул мол ўғирланганини бирор эшитмаган... Қандайин осуда, ажойиб қишлоқ эди-я!.. Одамлари-чи!..» На Бозор, на Бозорларнинг оиласи бирордан ёмонлик кўрмаган – унинг назарида Пахтақайнарда чакки-чукки одам йўқ эди... Ёшлигидан ҳеч кимсага очиқ айтмаса-да, «Уйлансан, болаларим кўпайса, отам-онам невараларини бағирларига босиб ўтирса... отам билан онам сингари кексайганда ҳам аҳил-тотув яшасак хотиним билан...» деган ниятларни ўзича бот-бот ўйларди – отаси кутилмаганда раҳматли бўлиб кетдию, Бозорнинг бири-биридан ширин орзу-ўйларига қирон келди. Қўйди, ўртанди, дунё кўзига тангу тор кўринди – тагинам онаси пухта экан – отасининг йили ўтар-ўтмас Бозорни уйлади – Бозор ўзи мўлжалини олгандек хушсурат, одобу фаросатда ягона қиз насиб этиб, турмуши шира боғлади!.. Ҳаёт юз чандон, минг чандон гўзаллашди – Бозор толикиш нелигини билмай кун бўйи трактор ҳайдар, ишда, кўчада, уйда – қаерда бўлмасин одамлар билан ўйнаб-кулиб, суюб-севиб муомала қилар, бегам-беташвиш – етти иқлимда ундан баҳтиёрроқ инсон боласи йўқ эди!.. Шабнамнинг бўйида бўлганида-чи... Э-эҳ-ҳ!.. Кеч эди – Бозор уйга хийла ҳаяллаб қайтган – хотини келтирган макарон шўрвани хўриллатиб-ютоқиб, нон бўктириб-бўктириб косаси билан кўтарди – онаси «яхши ётинглар»

деб этакдаги уйга кетди – Шабнам даҳанини муштига кўйганича хонтахта чеккасида эридан кўз узмай ўтирди. Бозорнинг эсида – Шабнам пушти ранг, ҳарир кўйлакда эди, бошида ялтироқ дурра... «Тағин овқат опкелай» деди у Бозор косани бўшатгач. «Йўқ, – деди Бозор, – чой ичаман». «Пешинда кутдим-кутдим... овқат тайёр эди – келмадингиз», ўпкалади Шабнам. «Келолмадим, Шабнам, узоққа кетгандим», деди Бозор бир нарсадан қуруқ қолаётгандек чойни ҳовлиқиб ичаётиб. – Эртага тушликка келаман, Шабнам». – «Эртадан далага чиқаман, чопиққа... Опа чакиритирибди». Бозор хотинини ишга чакиришаётганидан хабардор эди. «Чопиққа чиқдим деб кечгача кетмонни кўтариб юраверма, ўзингга қара» деди Бозор меҳрибонлик қилиб. Дедио, бирдан, ҳа-ҳа, беихтиёр хотинига синчков термилди. – Шабнамнинг оппок юзи одатдагидан тиник, қош-кўзлари ҳар қачонгидан қоп-қора, сулув... бамисоли рўпарасида сувратда чизилган малойика жонлангану Бозор билан сухбат қуриб ўтиргандек!.. «Нега қарайпсиз?» деб кулимсиради Шабнам. «Шабнам...» деди Бозор лаб-лунжини сочиққа артиб, ҳамон хотинидан кўз узмай. «Ҳа, кўрмаганмисиз мени?» деди кулиб Шабнам. «Шабнам!..» деди Бозор хотинининг чиройига сукланиб, «Унақа қараманг...» деди Шабнам, шундайин бир навозиш билан! Бозор азбаройи энтикиб кетди. «Шабнам!..»дан бўлак сўз тилига келмади яна. «Айтайми?» сўради Шабнам кув қараш қилиб. «Нимани?» сўради Бозор. «Айтайми?» деди Бозорнинг жонига чўғ қалаб Шабнам. «Айт, Шабнам, нима бўлса ҳам айт!» деди Бозор хотинининг жамолига тўймай. Шабнам «дик» этиб турдио, уйга кириб кетди. Бозор Шабнамни худди биринчи марта кўраётгандек ичи таталади. Сабри етмай иргиб турдио, хотинига эргашди. Уй остонасидан ўтиши билан Шабнам унинг бўйнига осилди. Бозор Шабнамнинг белидан қучди. «Секин!..» деди Шабнам жуда сирли оҳангда. «Нега?» сўради Бозор ҳайрон бўлиб. «Ёш боламисиз!» кулди Шабнам. «Нега ундей деяпсан. Айтсанг-чи, нима бўлди?» кўярда-кўймай сўради Бозор. «Айтсан, нима оберасиз?..» Шабнам ўзига ярашган навозиш билан юзини эрининг юзига босди – Бозор адои тамом бўлди: боши айланиб хушини

йўқотгудай кўз олди қоронғилашди – инсон зотига насиб этмаган бахтга мушарраф бўлаётгандай ададсиз масрурликдан маст эди... Шабнамнинг таниш, ҳушни ўғирловчи хиди унинг ҳушини қайта жойига келтирди, Бозор эса сархушликдан чикишни истамас, аксинча маст бўлиб хотинини бағрига босгиси, уни тўйиб-энтикиб эркалагиси, ўпиб-қучгиси келаётган эди... мана, энди ундаи сархушликлар қаерда – энди нималари биландир ўша ҳолатнинг айнан такроридек туюлган ҳолатдан аксинча ҳушини сира йиғиб ололмаяпти, ҳарчанд уринмасин на бораётган жойини, на кўнглига туккан мақсадини идрок қилоляпти... «Хоҳлаганингни обераман, жоним», деди ўшанда хотинини бағридан чиқармай, «Қўғирчоқдек ясатиб-ясантириб кўяман, жоним», деб эркалади, «Сен менга ўғил ҳадя этасану, мен сендан жонимни айманми, Шабнам» деди... Дедию, эртасига, йўғ-э, аниқ эсида – қоқ ярим кечаси, ним коронги уйда уйғониб кетди – қайтиб мижжа кокмади. Шабнам толиқкан, шу боис ширин тушлар оғушида ухлаётган, Бозор эса уйланганидан буён энди биринчи марта ўй ўйга, хаёл хаёлга уланиб қарз-ҳаволани чўтга солаётган эди!.. Эҳ, хом сут эмган экан, Бозор бола!.. Бўғзигача қарзга ботиб ётибдию, хотинчасини қўғирчоқдек ясатиб қўймоқ, унинг чиройига чирой қўшмоқ ва кейин жамолига суқланиб ўтиromoқ умидида ял-ял тақинчоклар обермоқчи!.. Ола-а!..

Шу-шу тинчи йўқолди унинг. Ҳафта ўйлади, ой ўйлади – на ўзи тинди, на тракторини тиндириди – шундай қиласа пулнинг остида қолиб кетадигандек эди – аммолекин қўлига тушган акчаси қарзга тўлаш тугул, кундалик рўзғордан ортмади... У ўйини ўйлагунича бу ёқда Шабнам кўйлакчалар, қалпоқчалар тикишга киришди, қайноаси танда қўйди, онаси келинини пуф-пуфлаб уни ёлғиз қолдирмайдиган одат чиқарди... Ана шундагина Бозор бу аҳволда осмондан чалпак тушмаслигига иқрор бўлди – «Пахта заводида ишловчиларнинг топиши зўр!» деган гапни дилига тугдию, чиқмаган жондан умид қабилида Аминвойга йўлиқди...

– Касалхонага бордингми? – салом-аликни нася килиб сўради Раҳматов.

– Ўтказмади, – деди Бозор ўзининг бегуноҳлигига ишончи комиллигидан бамайлихотир.

– Ўтказмади?.. Ким ўтказмайди?! – Овозини дағаллаштири Раҳматов.

– Йўлни мелисалар тўсибди... Иккала йўлдан бордим, бўмади. – Бозор шундай деб туриб тўсатдан онасиning уйида ётгандаги эшигнлари ёдига тушди. Тушдию, ранги ўчиб директорга қаради: – Абдуфаол ака каердалар?..

– Нима қиласан Фаолни? – энсаси қотди Раҳматовнинг.

– Эшигнлизми?

– Нимани?! – деди Раҳматов Бозорнинг авзойидан хунук воқеа юз берганини сезиб.

Бозор энди лаб жуфтлаган ҳам эдики, завод дарвозасидан ўқдек кириб келган «Жигули» нам асфальт майдончада сирғалиб бориб тўхтади. Эшик ланг очилиб ичидан Давлатов отилиб чиқди. Ва мошин тезлигига монанд шиддат билан юриб келди-да, Раҳматов билан Бозорнинг олдига етиб келишга мажоли қолмагандек тиззалари букилиб, қалтираб тўхтади, ўпкаси тўлиб:

– Бўлам!.. Аминвой бўлам йўқ!.. – деб ёш боладек бўзлаб юборди.

23

Раҳматов бехосдан орқасига тисарилиб кетди. «Нима... Н... мм!» деб ғўлдирадио, гапини англаб бўлмади. Ранги докадек оқарган Бозор турган жойидан кимир этмай Давлатовдан кўз узолмай қолди. Бош ҳисобчининг эса рангида ранг йўқ, жағи тушиб, қалин, сергўшт лаби осилиб қолган, бор қувватини шум хабарни айтишга сарфлаб адо қилгандек бошқа бир сўз деёлмай, йиқилиб тушгудай ҳолсиз-мадорсиз турарди.

– Аниқми?

Давлатов директорнинг афтига қаролмай «ха» деган маънода бош ирғади.

– Уйидамиди?..

Давлатов бош чайқади, сўнг «Йўлда...» деб баттар мунғайди. Раҳматов чўзиб уф тортди. Ва:

– Кўчада юриб бўмай қолли, уларнинг дастидан, – деди бўшашиб.

– Баркашига миндириб кетиб сўрок қилаётганмиш... – Бозор Давлатовдек одамнинг асл қиёфасини ху-у бирда, окшом қоронғисида пахта ғарами ортида кўрган бўлса-да, уни ҳозиргидек ожиз, ҳозиргидек нотавон аҳволда учратиши эҳтимолини тасаввурига сиғира олмасди. Шу боис у нимадир деб гапга қўшилмоқчи, бирдек аянчли аҳволда қолган, зигирдек суюнчик-тасаллига зорманда икки хирсдай одамга далда бермоқчи эди, бош ҳисобчи шипшиди: – Кўқдалада одам зотини қўймабди... Бедапояннинг ярмини сўрокка тутибди...

– Навбат бизга етибди-да, – илова қилди Раҳматов. – Кўч-кўрону, бола-чақанинг баҳридан ўтиб бош олиб қочамизми энди?

– Қочамизми?.. – такрорлади Давлатов.

– Қаёққа қочасиз?

Раҳматов ёnlарида Бозор турганини унутган экани, туйқус сапчиб тушди. Бозорга «ялт» этиб кўзини чақчайтириб қаради-да, пичинг қилди:

– Нима, жон сақламай, даряга бориб сўрок берайинми?

– Берсангиз берибсиз-да, безиён бўл...

Бозор гапини тутатолмади – Давлатов йўғон, этли қўлларини ҳаволатиб бир зум мўлжални олди-да, ўлжасига ҳамла қилган бургутдек панжалари билан Бозорнинг бўғзига чанг солди.

– Қанжиқ! – деди бақириб. – Касофат!.. Сўроқ қиладию, безиён бўладими?! Тергов безиён бўладими, латта?! Одамларнинг уйини кўйдирди-ку, келгиндилалинг, палакат!.. Сендан бошланди бари! Сендан!.. Тиррақи!.. Йўқол!.. Дап бўл, кўзимдан, ўлдириб қўймасимдан! Йўқол, деяпман!..

Бозор бўғзини халос этиш учун қаттиқ силтанди – Давлатов бутун оғирлигини Бозорга солиб турганидан мункиб кетдию, йикилмади. У рўпарасида турган, ўзининг ярмича келмайдиган болани мижиглаб ташлагудай важоҳат билан қад ростлади. Бозор томон икки одим қўйдию, «Шу чақди мени, шу», деганча нажот

истаб ҳамон серрайиб қотиб турган Раҳматовга ўтирилди.

Шу бир оғиз сўз неча йиллардан буён Раҳматов билан Давлатовни чирмаб боғлаган сирдошлиқ-ҳамтовоқлик ришталарини «чирт» этиб узди-қўйди. Шу топда Раҳматовниг оёғи ерга тегмаётгандек эди, у юрсам йиқиласман деган хаёлда тек турмокчи эди, боши оғирлашиб бутун жасадини оркага торта бошлади. У Давлатов ҳам Бозор сингари келгиндишлар сўроғига йўлиққанини, Аминвой билан Абдуфаолнинг иши иш-каллашганини, энди навбат ўзига етганини шу сонияларда тўсатдан, лекин жуда аниқ-равshan фаҳмлади. Бироқ Раҳматов айни шундай мушкул вазиятлардан осон холос бўлиш бобидаги устомонлиги билан ҳам Раҳматов эди!

– Э-э, қалови топилмайдиган иш бор эканми дунёда, – деди у ичидан зил кетиб турганини хаспўшлаш учун зўраки кулиб. – Сизга тикилган ўша келгиндишлар билан шундайин тил топишамизки ҳали, токи ер юзида Пахтақайнар деган қишлоқ борлигини унутиб юборсин ўшалар!..

– Аминвой бўлам-чи?!

Раҳматов ғўлдиради, кути ўчди, лекин шу заҳоти гап топди:

– Оқсоқол кеб кетсин, йўлини қиласиз, топамиз йўли...

– Йўли битта! – Раҳматов гапи оғзида қолиб орага суқилган Бозорнинг оғзига анграйди. Давлатов ҳам бирдан умид учқунлари чараклагандек ҳозиргина ўзи бўғиб ўлдирмоқчи бўлган «бола»га умидвор мўлтиради. Бозор бир нафас жим туриб иккала сухбатдошининг бардошини ўтда «тоблади-да», сўнг давом этди: – Йўли – ҳар ким ўзини ўзи сўроққа тутиш!.. Нима, келгинди жондорлар сўраётганини ўзимиз сўролмаймизми? Сўраб-сўраб жавобимизни пишитиб қўёлмаймизми?!

Директор билан бош ҳисобчи лом-мим демай қотиб тураверишди. Ниҳоят Давлатов ғўлдиради:

– Аминвой-чи?..

– Аминвой ака ўзи учун ўзи жавоб топади. Сиз...

– Ўзини бир нима қип қўяди у...

– Жавобни ўзидан топишга кўниккан одам ўз жонига қасд қилмайди. Сиз ўзингизни ўйланг.

– Аминвой нима бўлади? Бошқалар-чи?..

– Сиз ўзингизни ўйланг, – Бозор Давлатовнинг гайришуурий алфозда такрорлаётган гапига беихтиёр жавоб қайтараётиб Раҳматовнинг беўхшов қийшайиб кетаётган афт-башарасига разм солди. Директор дам нафаси қисаётган одамдек бўғзини чангллар, дам мувозанатини йўқотган дорбоздек кўлларини икки ёнга ёйиб юборар, дам устига тоғ қулаётган ва унга чап бермоқчидек бошини елкалари орасига тортиб букчайиб олар... бу ахволни кўрган Бозорнинг шуури «ярқ» этиб ёнган шульладан илкис ёришиду, ўша нур кўзларини чараклатиб юборди – у дабдурустдан рухида қандайин ўзгариш юз бераётганини идрок қилолмай гарантсиб турди, кўзини юмиб-очди, бошини силкиди ва... шундай енгил тортдики!.. Бозор укпарга айлангану, ҳавога кўтарилиб шамоллар қанотида учи-иб кетгиси, учиб бориб ўз ҳовлисига кўнгиси ва «Она!.. Шабнам! Топдим, келинглар, топдим!» деб кувончдан ёрилиб кетмаслиги учун онаси ва хотинидан уялмай-нетмай ўйинга тушгиси келди.

– Баркашга миниб бўлсаям, майли эди! – деди у кўзлари севинчдан порлаб.

– Нима?! – деди Давлатов унинг гапига тушунмай ҳарсиллаб.

– Майли эди!.. Майли!.. Кетаман, хозироқ етиб бораман!..

Бозор шундай деб ўзидан кўз узмай турган одамларни унутиб дарвоза томон юрди. Давлатов лапанглаб Раҳматовнинг ёнига борди.

– Тўхтатинг! Тўхтатсангиз-чи, савдоини! – деб директорнинг кўлидан тутиб силтади.

Раҳматов, «Жим!.. Секин! Ҳозир чақираман!» деган маънода бош ҳисобчини тинчлантириди, сўнг Бозорни чақирмоқчи бўлди – оғзини очди-юмди, очди-юмди, лекин овози чиқмади...

24

«Топдим, Шабнам, суюнчини беравур, жоним, – деди Бозор севинчдан терисига сифмай, – бу ёғи беха-

вотир, ҳаммаси яхшиликка кўчади. Худо хоҳласа эсономон қутуласан – ўғил туғиб берасан, ўғил! Хотиржам яшаймиз. Фақат-чи, Шабнам, анави ваъда қилган нарсаларимни оберишга шоширмай турасан, хўпми, жоним?.. Обераман, завуддан кетмайман, Нарзиқул амак кетса кетавурсин, мен ҳеч кимдан, ҳеч нимадан кўрқадиган жойим йўқ, жоним – қаерда ишласам ҳам барибир айтгандаримни обераман, шундай ясантирайки, ўғилчамизни елкамга миндириб, сен – ёнимда, Пахтақайнарнинг кўчаларидан ўтганимизда-чи, Шабнам, кўрганлар «оҳ» демаса отимни бошқа қўяман!.. Онам ҳам қариган чоғларида бошлари осмонга етади... Фақат-чи, Шабнам, менга қара, нега йиғлајапсан,вой, жиннивой-еъ, шу йиғлайдиган гапми, яхшиликкайм йиғлайдими, одам?! Ўшанда кўрасан – огоҳлантирмай-нетмай Жийдабулоққа борамиз, шундоқ эшиқдан кириб борсак-чи, онанг танимай қоладилар, отанг бўлса...»

«Нимани топганингизни айтмайсизми, Бозор aka?..

«Одамлар-чи, ҳамма-чи... ўзидан кўрқадиган бўп қолган...»

Ўзим кимман, қандоқ ишлар қип юрибман дунёда, гуноҳим борми-йўқми, дуруст одамманми ёки туриштурмушим худою бандасига малолми, бирор туйкус сўраб қолса, қисди-бастига олиб сўроққа тутиб қолса ўтакам ёрилмайдими, чўчимай-нетмай жавоб қайтара оламанми, йўқ, буларни ўйламайди. Ўйлашга кўрқади. Ўйлашга кўрқадиганлар бўлиб қолганимиз, Шабнам. Ўйловдан кўрққан одамнинг юраги чумчук пир этса адо бўлади. Кўрқоклигидан ўзининг қуёнюраклигини яшириш пайида ўзганинг ташвишини тортаётган қилиб кўрсатади ўзини... Ўзгаларнинг ташвиши ортига яширинади. Тушуняпсанми, Шабнам, ўзининг ғалваларидан қочади-да, паноҳни ўзганинг ташвишу ғалваларидан излайди!.. Давлатов худди шундай қилди ҳозир – ўзи қочарга жой тополмаяптию, бўласини суриштиргани-суриштирган!.. Ўзининг бошига келаётган балони ўйласа юраги ёрилади. Раҳматовга ўхшаб!.. Давлатовнинг ахволини – довдираётганини кўриб директор ўзини ўйладию, телба бўлиб қолаёзди – тилдан қолди, банди девонадек типирчилади, майли, нима бўлгандаям,

ўзини билгани яхши-да, тўсатдан келгиндиларга рўпара келса – жавоби тайёр бўлса, юраги ёрилмайди, қанча савол бўлса – жавобни дўндиравуради. Яхши-да... Ўзига яхши!.. Келгиндилар сўроққа тутгунича жавобга ҳозир бўлса ўзига осон эмасми?!» «Нимани топдим деб кувоняпсиз, Бозор ака, ўшани айтинг?..» «Айтаман... лекин сен мени бошқача тушунмагин, Шабнам, мен учар келгиндилар, ўша одамсимон маҳлуклар келиб ҳамкишлодаримизни истаганича сўроққа тутавурсин, бизни истаган кўйига соловурсин демоқчимасман, балки учар баркашда келадими-бошқа ёқдан пайдо бўладими – кимлигидан қатъи назар сўроққа тутгундай бўлса жавобга тайёр бўлайлик, шундай жавоблар қиласликки, терговчилар сену бизни саволга тутганига уялсин, но-мусларга қолсин!»

«Нега чўчиб тушяпсиз, Бозор ака?» «Нега қувонаётганимни айтаман, жоним, сенга айтмасам кимга ҳам айтардим!.. Мана, сен гуноҳинг борми? Сира гуноҳ иш қилганмисан?.. Майли, болалигингдами, кейинми?.. Мисол учун отангни ё онангни беҳурмат қилганмисан, одамларни алдаганмисан, бирон нарса ўғирлаганмисан? Ёки...» «Жиннимисиз?! Ўзингиз нега қалтираяпсиз?» «Нега кўрқяпсан, Шабнам? Нима, ота-онанг норозими, сендан? Ёки алдоқчимисан?.. Айт, Шабнам, нега нафасинг ичининг тушиб кетди?.. Нима, сира ўйламаганмисан шуларни?.. Ҳа-а, ана шуни топдим, жоним! Машмашаю ғалванинг боши шунда – ўзимизни сўроқ қилишга одатланмаганмиз-да!.. Завуднинг казо-казолари ҳам, Нарзиқул амак ҳам, қўшни қишлоқдагилар ҳам – ҳеч ким ўзини шу қабилда тергамаган. Тушундингми, Шабнам? Аминвойдек қашқир ҳам, қашқир эмас – тулки, тулки эмас – қари бўри ҳам хаёлига келтирмаган. Мени савол-жавобга тутадиган одам онасидан түғилмаган деб юраверган, Аминвойдақа калондимоғлар!.. Ия, тўхта!.. Соат неча бўлди?.. Худо урай дебдию!.. Мен кетдим! Идорага бораману қайтаман. Икки оғиз гапим бор – айтаману қайтаман... Эшитяпсанми, жоним, бораману қайтаман изимга... Ҳаммаси яхшиликка кўчади!..»

Шабнам яшиндек отилиб чиқиб кетаётган эрининг изидан «Ҳай-ҳай»лаганича қолди. Унинг мияси шишиб

кеттган – тинмай гувиллар, оғзи куриб ташналиқдан баттар ҳолсизланган, эрининг бу қадар эзма, овсарга айла-нишини биринчи бор кўраётган, унинг айтганларини ўйлай деса, акли етмаётган эди.

Орадан қанча фурсат ўтди – номаълум, Шабнам бир кўнгли этакдаги уйга боргиси, ҳеч нарсани ўйламай, онасидан-да меҳрибонроқ қайнонасининг ёнига кириб ётгиси келди, бир кўнгли эрини кутишни ихтиёр қилди – аллақанча вақт бир қарорга келолмай ўтирганида ташқаридан оёқ товуши эшитилди – Бозор худди бирров ташқарилагану, узилиб қолган гапини давом этти-раётгандай – бояги оҳангда куйиб-ёниб жавраганича қайтиб кириб келди: «Айтдим-ку, каттадан-кичик – бари юрак олдириб бўлган. Шуни Оқсоқолга тайниламоқчи эдим – идорага бордим. Котиба ўламан саттор ичкарига йўлатмайман деб туриб олди. «Кирај, бир чеккада ўтираман, мажлисга халал бермайман» дедим. «Йўқ, рухсат йўқ» деди. Кирмокчи эдим – бир барзанги пайдо бўлли – «Чик» деди ўқрайиб. Ичкари – жим, фақат кимдир ғўнфилляпти. Кулоқ соллим – гапни англамадим. Сўнг, «хўп» кирмасам кирмабман-да, деб турдим-да, котиба билан барзангининг кўзини шамғалат қип туриб ўзимни эшикка урдим. Очдиму ичкарига кирдим, ҳеч зоф йўқ!.. Ҳайҳотдай хона – жимжит!.. Қатор-қатор юмшоқ курси қўйилган, холос... Чап томонда эшик бор экан – овоз ўшоқдан эшитилди – югурдим. Оқсоқолни бирров кўрсам бас, айтадиганимни шартта-шартта бетига айттардим, «Ўзингиз сўроқдан қўрқмайсизми?» дер эдиму, чикардим-кетардим – эшикни очдим – яна ҳеч зоф йўқ! Жимжит!..» «Айтсангиз-чи, нега қалтирайдиган бўп қоллингиз, Бозор ака?» «Бояги ғўнфиллаган товуш энди ҳайҳотдай хона томондан эшитилди – қайтдим – яна одам қораси кўринмади – бир оғиз саволга бир уй одам қочиб юрса-я! – энди ичкари хонадан овоз келди – қарсак чалинди-ғўнгиллаш давом этди – ҳайрон бўлиб тургандим, кимдир қўлимни орқамга қайирди, қарасам, бояги барзанги «Кимсан?!» деди. «Вой, шўрим!» «Кимлигингни ўзингдан сўраганмисан, биродар?» дедим пинагимни бузмай ўдағайлаб, – барзанги бақа бўп қолли – қўлимни бўшатди, «Ўзим чиқаман» дедим, «Оқсоқолингга айт,

Рахматовга, Опага, Раисга ҳам, муовинларига ҳам етказ – биронтаси ўзининг кимлигини билармикан ё умри бошқаларга амри фармон минан ўтавурадими? Ўзлари сўроққа тутилса, қочишга жой ахтариб колишмайдими ишклилиб? Шуни маҳсус сўра, қулоғингда бўлсин, хўпми?» дедим, чиқдим-жўнадим, Шабнам». «Майли, кеч бўлли, ётақолинг, Бозор ака. Қоганини эрга айтарсиз, жо-он, Бозор ака». «Йўқ, бугун, ҳозир гаплашамиз... Сен ўйладингми, ўзингни тергадингми, Шабнам? Нега қалтираяпсан?» «Вой, ўзингиз қалтираяпсиз-ку...» «Ахир, мен бир ой, йўқ – икки ой, йўқ – уч ойдан бўён ўзимни тергаяпман... саволларга кўмилиб кетдим Шабнам. Саволларга кўмилганим сайин бошқача бўлиб қоляпман-кўрқмайдиган одам бўп коляпман, тушун-япсанми, кўрқмаяпман!.. Тасаввур қигин – ичимдаги вахиманинг барини қувиб соляпман, сўнг, кўрқмайдиган одамга айланаман, кўркув не эканини унутаман-да, одамга айланаман, одамга!..» «Бозор ака, юрагими-ни ёрманг, тинч ётинг, ётақолинг!..» «Гапимни бўлма, Шабнам, ичимни бўшатиб олай – ана ўшандা бутун Пахтақайнарда биринчи кўрқмайдиган одам деб овоза бўламан, яна миш-миш бошланади, яна саволлару-сўрокларга тутиламан – «Қандоқ қилиб кўрқмайдиган бўп қоллингиз, Бозорбой?» дея қисди-басдига олади-ган бўлишади. Газитга чикаради, радиёlda гапиртира-ди. Кўшни қишлоқлардан сўраб-сuriштириб кела...» «Бозор ака! Вой, ўлмасам!...» «Фақат-чи, Шабнам, сен ҳам сира кўрқмагин, одамга айлансанг, у-у, жони-миз киради-я! Осмондан тушадими, ердан чиқадими – сўроқчи зотидан чўчимайсан, негаки, жавобинг та-йин бўлади. Тинчиймиз, сен тинчлансанг анави тинч-ланади, ана ўшандা у эсон-омон туғилади. Пахтақай-нарда кўркувни билмайдиган яна бир одам туғила-ди! Кўрқмайдиган одамларимиз кўпаяди. Оҳ, бунинг ажойиблигини тушунгин, хотин?! Фақат йиғлама – менинг юрагимни ўртама, Шабнам, кўзингни арт. Ке, ўзим артай Шабнам. Сен эсон-омон қутулсанг бутун қишлоқ тинчийди, жоним. Хўпми, Шабнам, шундай қилайлик, жоним...»

1991 йил.